

VALERIUS FLACCUS

LES ARGONAUTIQUES (5587 vers)

AR_1 v.1 Prima deum magnis canimus freta pervia natis
 2 fatidicamque ratem, Scythici quae Phasidis oras
 3 ausa sequi mediosque inter juga concita cursus
 4 rumpere flammifero tandem consedit Olympo.
 5 Phoebe, mone, si Cumaeae mihi conscia vatis
 6 stat casta cortina domo, si laurea digna
 7 fronte viret, tuque, o pelagi cui major aperti
 8 fama, Caledonius postquam tua carbasa vexit
 9 Oceanus, Phrygios prius indignatus Iulos,
 10 eripe me populis et habenti nubila terrae
 11 (namque potes) veteruque fave, venerande, canenti
 12 facta virum. Versam proles tua pandit Idumen
 13 sancte pater, Solymo nigrantem et pulvere fratrem
 14 spargentemque faces et in omni turre furentem.
 15 Ille tibi cultusque deum delubraque gentis
 16 instituet cum jam, genitor, lucebis ab omni
 17 parte poli. Neque enim Tyriae Cynosura carinis
 18 certior aut Graeis Helice servanda magistris
 19 tu si signa dabis, sed te duce Graecia mittet
 20 et Sidon Nilusque rates. Nunc nostra serenus
 21 orsa juves haec ut Latias vox impleat urbes.
 22 Haemoniam primis Pelias frenabat ab annis,
 23 jam gravis et longus populis metus : illius amnes
 24 Ionium quicumque petunt, ille Othryn et Haemum
 25 adque imum felix versabat vomere Olympum.
 26 Sed non ulla quies animo fratrisque paventi
 27 progeniem divumque minas ; hunc nam fore regi
 28 exitio vatesque canunt pecudumque per aras
 29 terrifici monitus iterant : super ipsius ingens
 30 instat fama viri virtusque haud laeta tyranno.
 31 Ergo anteire metus juvenemque extinguere pergit
 32 Aesonium letique vias ac tempora versat.
 33 Sed neque bella videt Graias neque monstra per urbes
 34 ulla : Cleonaeo jam tempora clusus hiatu
 35 Alcides ; olim Lernae defensus ab angue
 36 Arcas et ambobus jam cornua fracta juvenicis.
 37 Ira maris vastique placent discrimina ponti.
 38 Tum juvenem tranquilla tuens nec fronte timendus
 39 occupat et fictis dat vultum et pondera dictis.
 40 "Hanc mihi militiam, veterum quae pulchrior actis,
 41 adnue daque animum. Nostri de sanguine Phrixus
 42 Cretheos ut patrias audis effugerit aras.
 43 Hunc feras Aetes, Scythiam Phasinque rigentem
 44 qui colit (heu magni Solis pudor), hospita vina
 45 inter et attonitae mactat sollempnia mensae
 46 nil nostri divumque memor. Non nuntia tantum
 47 fama refert : ipsum juvenem tam saeva gementem,
 48 ipsum ego, cum serus fessos sopor alligat artus,
 49 aspicio, lacera adsiduis namque illius umbra

50 questibus et magni numen maris excitat Helle.
 51 Si mihi quae quondam vires, tum pendere poenas
 52 Colchida jam et regis caput hic atque arma videres.
 53 Olim annis ille ardor hebet, necdum mea proles
 54 imperio et belli rebus matura marique.
 55 Tu, cui jam curaeque vigent animique viriles,
 56 i, decus, et pecoris Nephelaei vellera Graio
 57 redde tholo ac tantis temet dignare periclis."
 58 Talibus hortatur juvenem propiorque jubenti
 59 conticuit, certus Scythico concurrere ponto
 60 Cyaneas tantoque silet possessa dracone
 61 vellera, multifidas regis quem filia linguas
 62 vibrantem ex adytis cantu dapibusque vocabat
 63 et dabat externo liventia mella veneno.
 64 Mox taciti patuere doli nec vellera curae
 65 esse viro sed sese odiis immania cogi
 66 in freta. Qua jussos sectantem quaerere Colchos
 67 arte queat ? Nunc aerii plantaria vellet
 68 Perseos aut currus et quos frenasse dracones
 69 creditus ignaras Cereris qui vomere terras
 70 imbuit et flava quercum damnavit arista.
 71 Heu quid agat ? Populumne levem veterique tyranno
 72 infensum atque olim miserantes Aesona patres
 73 advocet ? An socia Junone et Pallade fretus
 74 armisona speret magis et freta jussa capessat,
 75 siqua operis tanti domito consurgere ponto
 76 fama queat ? Tu sola animos mentemque peruris,
 77 Gloria ; te viridem videt immunemque senectae
 78 Phasidis in ripa stantem juvenesque vocantem.
 79 Tandem animum incertum confusaque pectora firmat
 80 religio tendensque pias ad sidera palmas
 81 "Omnipotens regina", inquit, "quam, turbidus atro
 82 aethere caeruleum quateret cum Juppiter imbrem,
 83 ipse ego praecipiti tumidum per Enipea nimbo
 84 in campos et tuta tuli nec credere quivi
 85 ante deam quam te tonitru nutuque reposci
 86 conjugis et subita raptam formidine vidi,
 87 da Scythiam Phasingue mihi ; tuque, innuba Pallas,
 88 eripe me. Vestris egomet tum vellera templis
 89 illa dabo, dabit auratis et cornibus igni
 90 colla pater niveique greges altaria cingent."
 91 Accepere deae celerique per aethera lapsu
 92 diversas petiere vias. In moenia pernix
 93 Thespiaca ad carum Tritonia devolat Argum.
 94 Moliri hunc puppem jubet et demittere ferro
 95 robora, Peliacas et jam comes exit in umbras.
 96 At Juno Argolicas pariter Macetumque per urbes
 97 spargit inexpertos temptare parentibus Austros
 98 Aesoniden ; jam stare ratem remisque superbam
 99 poscere quos revehat rebusque in saecula tollat.
 100 Omnis adest quae jam bellis spectataque fama
 101 turba ducum, primae seu quos in flore juventae
 102 temptamenta tenent necdum data copia rerum :
 103 at quibus arborum studiumque insontis aratri,
 104 hos stimulant magnaue ratem per lustra viasque
 105 visi laude canunt manifesto in lumine Fauni
 106 silvarumque deae atque elatis cornibus Amnes.
 107 Protinus Inachiis ultro Tirynthius Argis

108 advolat, Arcadio cujus flammata veneno
109 tela puer facilesque umeris gaudentibus arcus
110 gestat Hylas : velit ille quidem sed dextera nondum
111 par oneri clavaeque capax. Quos talibus amens
112 insequitur solitosque novat Saturnia questus :
113 "O utinam Graiae rueret non omne juventae
114 in nova fata decus, nostrique Eurystheos haec nunc
115 jussa forent. Imbrem et tenebras saevumque tridentem
116 jam jam ego et inviti torsissem conjugis ignem.
117 Nunc quoque nec socium nostrae columenve carinae
118 esse velim Herculeis nec me unquam fidere fas sit
119 auxiliis comiti et tantum debere superbo."
120 Dixit et Haemonias oculos detorquet ad undas.
121 Fervere cuncta virum coetu, simul undique cernit
122 delatum nemus et docta resonare bipenni
123 litora ; jam pinus gracili dissolvere lamna
124 Thespiaden jungique latus lentoque sequaces
125 molliri videt igne trabes remisque paratis
126 Pallada velifero quaerentem bracchia malo.
127 Constitit ut, longo moles non pervia ponto,
128 puppis, et ut tenues subiere latentia cerae
129 lumina, picturae varios super addit honores.
130 Hic insperatos Tyrrheni tergore piscis
131 Peleos in thalamos vehitur Thetis ; aequora delphin
132 corripit, ipsa sedet dejecta in lumina palla
133 nec Jove majorem nasci suspirat Achillem.
134 Hanc Panope Dotoque soror laetataque fluctu
135 prosequitur nitidis pariter Galatea lacertis
136 alta petens : Siculo revocat de litore Cyclops.
137 Contra ignis viridique torus de fronde dapesque
138 vinaque et aequoreos inter cum conjuge divos
139 Aeacides, pulsatque chelyn post pocula Chiron.
140 Parte alia Pholoe multoque insanus Iaccho
141 Rhoetus et Atracia subitae de virgine pugnae.
142 Crateres mensaeque volant araeque deorum
143 poculaque, insignis veterum labor. Optimus hasta
144 hic Peleus, hic ense furens agnoscitur Aeson ;
145 fert gravis invito victorem Nestora tergo
146 Monychus, ardenti peragit Clanis Actora quercu ;
147 nigro Nessus equo fugit adclinisque tapetis
148 in mediis vacuo condit caput Hippasus auro.
149 Nec, quamquam miranda viris, stupet Aesone natus,
150 et secum : "Heu miseros nostrum natosque patresque !
151 Hacine nos animae faciles rate nubila contra
152 mittimur ? In solum nunc saeviet Aesona pontus ?
153 Non juvenem in casus eademque pericula Acastum
154 abripiam ? Invisae Pelias freta tuta carinae
155 optet et exoret nostris cum matribus undas."
156 Talia cunctanti laevum Jovis armiger aethra
157 advenit et validis fixam erigit unguibus agnam.
158 At procul e stabulis trepidi clamore sequuntur
159 pastores fremitusque canum ; citus occupat auras
160 raptor et Aegaei super effugit alta profundi.
161 Accipit augurium Aesonides laetusque superbi
162 tecta petit Peliae. Prior huic tum regia proles
163 advolat amplexus fraternaue pectora jungens.
164 Ductor ait : "Non degeneres, ut reris, Acaste,
165 venimus ad questus : socium te jungere coeptis

166 est animus ; neque enim Telamon aut Canthus et Idas
167 Tyndareusque puer mihi vellere dignior Helles.
168 O quantum terrae, quantum cognoscere caeli
169 permissum est, pelagus quantos aperimus in usus !
170 Nunc forsán grave reris opus ; sed laeta recurret
171 cum ratis et caram cum jam mihi reddet Iolcon,
172 quis pudor heu nostros tibi tunc audire labores,
173 quam referam visas tua per suspiria gentes."
174 Nec passus rex plura virum : "Sat multa parato
175 in quaecumque vocas ; nec nos", ait, "optume, segnes
176 credideris patriisve magis confidere regnis
177 quam tibi, si primos duce te virtutis honores
178 carpere fraternae, si des ad crescere famae.
179 Quin ego, nequa metu nimio me cura parentis
180 impediát, fallam ignarum subitusque paratis
181 tunc adero, primas linquet cum puppis harenas."
182 Dixerat. Ille animos promissaque talia laetus
183 accipit et gressus avidos ad litora vertit.
184 At ducis imperiis Minyae monituque frequentes
185 puppem umeris subeunt et tento poplite proni
186 decurrunt intrantque fretum. Non clamor anhelis
187 nauticus aut blandus testudine defuit Orpheus.
188 Tum laeti statuunt aras. Tibi, rector aquarum,
189 summus honor, tibi caeruleis in litore vittis
190 et Zephyris Glaucoque bovem Thetidique juvencam
191 deicit Ancaeus. Non illo certior alter
192 pingua letifera perfringere colla bipenni.
193 Ipse ter aequoreo libans carchesia patri
194 sic ait Aesonides : "O qui spumantia nutu
195 regna quatis terrasque salo complecteris omnes,
196 da veniam. Scio me cunctis e gentibus unum
197 inlicitas temptare vias hiememque mereri :
198 sed non sponte feror nec nunc mihi jungere montes
199 mens tamen aut summo deoscere fulmen Olympo.
200 Ne Peliae te vota trahant : ille aspera jussa
201 repperit et Colchos in me luctumque meorum :
202 illum ego... tu tantum non indignantibus undis
203 hoc caput accipias et pressam regibus alnum."
204 Sic fatus pingui cumulat libamine flammam.
205 Protulit ut crinem densis luctatus in extis
206 ignis et escendit salientia viscera tauri,
207 ecce sacer totusque dei per litora Mopsus
208 immanis visu vittamque comamque per auras
209 surgentem laurusque rotat. Vox reddita tandem,
210 vox horrenda viris ; tum facta silentia vati :
211 "Heu quaenam aspicio ! Nostris modo concitus ausis
212 aequoreos vocat ecce deos Neptunus et ingens
213 concilium. Fremere et legem defendere cuncti
214 hortantur. Sic amplexu, sic pectora fratris,
215 Juno, tene, tuque o puppem ne desere, Pallas :
216 nunc patrui nunc flecte minas. Cessere ratemque
217 accipere mari. Per quot discrimina rerum
218 expeditior ! Subita cur pulcher harundine crines
219 velat Hylas ? unde urna umeris niveosque per artus
220 caeruleae vestes ? unde haec tibi vulnera, Pollux ?
221 quantum io tumidis taurorum e naribus ignis !
222 Tollunt se galeae sulcisque ex omnibus hastae
223 et jam jamque umeri ! Quem circum vellera Martem

224 aspicio ! Quaenam aligeris secat anguibus auras
 225 caede madens ? Quos ense ferit ? Miser eripe parvos
 226 Aesonide. Cerno et thalamos ardere jugales."
 227 Jamdudum longa Minyas ambage ducemque
 228 terrificat ; sed enim contra Phoebius Idmon,
 229 non pallore viris, non ullo horrore comarum
 230 terribilis, plenus fati Phoeboque quieto,
 231 cui genitor tribuit monitu praenosceret divum
 232 omina, seu flammam seu lubrica comminus exta
 233 seu plenum certis interroget aera pinnis,
 234 sic sociis Mopsoque canit : "Quantum augur Apollo
 235 flammaque prima docet, praeduri plena laboris
 236 cerno equidem, patiens sed quae ratis omnia vincet.
 237 Ingentes durate animae dulcesque parentum
 238 tendite ad amplexus." Lacrimae cecidere canenti
 239 quod sibi jam clusos invenit in ignibus Argos.
 240 Vix ea fatus erat jungit cum talia ductor
 241 Aesonius : "Superum quando consulta videtis,
 242 o socii tantisque datur spes maxima coeptis,
 243 vos quoque nunc vires animosque adfert paternos.
 244 Non mihi Thessalici pietas culpanda tyranni
 245 suspectivae doli : deus haec, deus omine dextro
 246 imperat ; ipse suo volvit commercia mundo
 247 Juppiter et tantos hominum miscere labores.
 248 Ite, viri, mecum dubiisque evincite rebus
 249 quae meminisse juvet nostrisque nepotibus instent.
 250 Hanc vero, socii, venientem in litore laeti
 251 dulcibus adloquiis ludoque educite noctem."
 252 Paretur. Molli juvenes funduntur in alga
 253 conspicuusque toris Tirynthius. Exta ministri
 254 rapta simul veribus Cereremque dedere canistris.
 255 Jamque aderat summo decurrens vertice Chiron
 256 clamantemque patri procul ostendebat Achillem.
 257 Ut puer ad notas erectum Pelea voces
 258 vidit et ingenti tendentem brachia passu,
 259 adsiluit caraque diu cervice pependit.
 260 Illum nec valido spumantia pocula Baccho
 261 sollicitant veteri nec conspicienda metallo
 262 signa tenent ; stupet in ducibus magnumque sonantes
 263 haurit et Herculeo fert comminus ora leoni.
 264 Laetus at impliciti Peleus rapit oscula nati
 265 suspiciensque polum "Placido si currere fluctu
 266 Pelea vultis", ait, "ventosque optare ferentes,
 267 hoc, superi, servate caput. Tu cetera, Chilon,
 268 da mihi. Te parvus lituos et bella loquentem
 269 miretur ; sub te puerilia tela magistro
 270 venator ferat et nostram festinet ad hastam."
 271 Omnibus inde viae calor additus : ire per altum
 272 magna mente volunt. Phrivi promittitur absens
 273 vellus et auratis Argo reditura corymbis.
 274 Sol ruit et totum Minyis laetantibus undae
 275 deduxere diem. Sparguntur litore curvo
 276 lumina nondum ullis terras monstrantia nautis.
 277 Thracius hic noctem dulci testudine vates
 278 extrahit, ut steterit redimitus tempora vittis
 279 Phrixus et injustas contectus nubibus aras
 280 fugerit Inoo linquens Athamanta Learcho ;
 281 aureus ut juvenem miserantibus intulit undis

282 vector et adstrictis ut sedit cornibus Helle.
 283 Septem Aurora vices totidemque peregerat umbras
 284 luna polo dirimique procul non aequore visa
 285 coeperat a gemina discedere Sestos Abydo.
 286 Hic soror Aeoliden aevum mansura per omne
 287 deserit, heu saevae nequiquam erepta novercae.
 288 Illa quidem fessis longe petit umida palmis
 289 vellera sed bibulas urgenti pondere vestes
 290 unda trahit levique manus labuntur ab auro.
 291 Quis tibi, Phrixe, dolor, rapido cum concitus aestu
 292 respiceres miserae clamantia virginis ora
 293 extremasque manus sparsosque per aequora crines !
 294 Jamque mero ludoque modus positique quietis
 295 conticuere toris ; solus quibus ordine fusis
 296 impatiens somni ductor manet. Hunc gravis Aeson
 297 et pariter vigil Alcimede spectantque tenentque
 298 pleni oculos. Illis placidi sermonis Iason
 299 suggerit adfatus turbataque pectora mulcet.
 300 Mox, ubi victa gravi ceciderunt lumina somno,
 301 visa coronatae fulgens tutela carinae
 302 vocibus his instare duci : "Dodonida quercum
 303 ingredior nec fatidicis avellere silvis
 304 me nisi promisso potuit Saturnia caelo.
 305 Tempus adest ; age rumpe moras, dumque aequore toto
 306 currimus, incertus si nubila duxerit aether,
 307 jam nunc mitte metus fidens superisque mihique."
 308 Chaoniique vides famulam Jovis. Aequora tecum
 309 dixerat. Ille pavens, laeto quamquam omine divum,
 310 prosiluit stratis. Minyas simul obtulit omnes
 311 alma novo crispans pelagus Tithonia Phoebo.
 312 Discurrunt transtris ; hi celso cornua malo
 313 expediunt, alii tonsas in marmore summo
 314 praetemptant, prora funem legit Argus ab alta.
 315 Increscunt matrum gemitus et fortia languent
 316 corda patrum ; longis flentes amplexibus haerent.
 317 Vox tamen Alcimedes planctus supereminet omnes.
 318 Femineis tantum illa furens ululatibus obstat,
 319 obruit Idaeam quantum tuba Martia buxum,
 320 fatur et haec : "Nate indignos aditure labores,
 321 dividimur ; nec ad hos animum componere casus
 322 ante datum sed bella tibi terrasque timebam.
 323 Vota aliis facienda deis. Si fata reducunt
 324 te mihi, si trepidis placabile matribus aequor,
 325 possum equidem lucemque pati longumque timorem.
 326 Sin aliud fortuna parat, miserere parentum,
 327 Mors bona, dum metus est nec adhuc dolor. Ei mihi, Colchos
 328 unde ego et avecti timuissem vellera Phrixi ?
 329 quos jam mente dies, quam saeva insomnia curis
 330 prospicio. Quotiens raucos ad litoris ictus
 331 deficiam Scythicum metuens pontumque polumque
 332 nec de te credam nostris ingrata serenis.
 333 Da, precor, amplexus haesuraque verba relinque
 334 auribus et dulci jam nunc preme lumina dextra."
 335 Talibus Alcimede maeret sed fortior Aeson
 336 attollens dictis animos : "O si mihi sanguis
 337 quantus erat cum signiferum cratera minantem
 338 non levio Pholum manus haec compescuit auro,
 339 primus in aeratis posuissem puppibus arma

340 concussoque ratem gauderem tollere remo ;
341 sed patriae valuere preces auditaque magnis
342 vota deis : video nostro tot in aequore reges
343 teque ducem. Tales, tales ego ducere suetus
344 atque sequi. Nunc ille dies (det Juppiter oro),
345 ille super, quo te Scythici regisque marisque
346 victorem atque umeros ardentem vellere raptio
347 accipiam cedantque tuae mea facta juventae."
348 Sic ait. Ille suo collapsam pectore matrem
349 sustinuit magnaque senem cervice recepit.
350 Et jam finis erat. Zephyrumque ratemque morantes
351 solverat amplexus tristi tuba tertia signo.
352 Dant remo sua quisque viri, dant nomina transtris.
353 Hinc laevum Telamon pelagus tenet, altior inde
354 occupat Alcides aliud mare, cetera pubes
355 dividitur ; celer Asterion, quem matre cadentem
356 Peresius gemino fovit pater amne Cometes
357 segnior Apidani vires ubi sentit Enipeus ;
358 nititur hinc Talaus fratrisque Leodocus urget
359 remo terga sui, quos nobile contulit Argos.
360 Hinc quoque missus adest quamvis arcentibus Idmon
361 alitibus (sed turpe viro timuisse futura).
362 Hic et Naubolides tortas consurgit in undas
363 Iphitus, hic patrium frangit Neptunius aequor
364 qui tenet undisonam Psamathen semperque patentem
365 Taenaron Euphemus mollique a litore Pellae
366 Deucalion certus jaculis et comminus ense
367 nobilis Amphion pariter quos edidit Hypso
368 nec potuit similes volvitve ediscere vultus.
369 Tum valida Clymenus percusso pectore tonsa
370 frater et Iphiclus puppem trahit, et face saeva
371 in tua mox Danaos acturus saxa, Caphereu,
372 Nauplius, et tortum non a Jove fulmen Oileus
373 qui gemet, Euboicas nato stridente per undas,
374 quique Erymanthei sudantem pondere monstri
375 Amphitryoniaden Tegeaeo limine Cepheus
376 juvit et Amphidamas (at frater plenior actis
377 maluit Ancaeo vellus contingere Phrixi)
378 tectus et Eurytion servato colla capillo
379 quem pater Aonias reducem tondebit ad aras.
380 Te quoque Thessalicae, Nestor, rapit in freta puppis
381 fama, Mycenaeis olim qui candida velis
382 aequora nec nantes mirabere mille magistris.
383 Hic vates, Phoebique fides non vana parentis,
384 Mopsus, puniceo cui circumfusa cothurno
385 palla imos ferit alba pedes, vittataque frontem
386 cassis et in summo laurus Peneia cono.
387 Quin etiam Herculeo consurgit ab ordine Tydeus
388 Nelidesque Periclymenus, quem parva Methone
389 felixque Elis equis et fluctibus obvis Aulon
390 caestibus adversos viderunt frangere vultus.
391 Tu quoque Phrixeos remo, Poeantie, Colchos
392 bis Lemnon visure petis, nunc cuspide patris
393 inclitus, Herculeas olim moture sagittas.
394 Proximus hinc Butes Actaeis dives ab oris ;
395 innumeras nam claudit apes longaque superbus
396 fuscatur nube diem dum plenas nectare cellas
397 pandit et in dulcem reges dimittit Hymetton.

398 Insequeris casusque tuos expressa, Phalere,
399 arma geris ; vidua nam lapsus ab arbore parvum
400 ter quater ardenti tergo circumvenit anguis :
401 stat procul intendens dubium pater anxius arcum.
402 Tum caelata metus alios gerit arma Eribotes.
403 Nec Peleus fretus soceris et conjuge diva
404 defuit ac prora splendet tua cuspis ab alta,
405 Aeacide : tantum haec aliis excelsior hastis
406 quantum Peliacas in vertice vicerat ornos.
407 Linquit et Actorides natum Chironis in antro
408 ut socius caro pariter meditetur Achilli
409 fila lyrae pariterque leves puer incitet hastas,
410 discat eques placidi conscendere terga magistri,
411 et quem fama genus non est decepta Lyaei
412 Phlias immissus patrios de vertice crines.
413 Nec timet Ancaeum genetrix committere ponto
414 plena tulit quem rege maris. Securus in aequor
415 haut minus Erginus, proles Neptunia, fertur,
416 qui maris insidias, clarae qui sidera noctis
417 norit et e clausis quem destinet Aeolus antris,
418 non metuat cui regna ratis, cui tradere caelum
419 adsidua Tiphys vultum lassatus ab Arcto.
420 Taurea vulnifico portat celer aspera plumbo
421 terga Lacon, saltem in vacuos ut bracchia ventos
422 spargat et Oebalium Pagaseia puppis alumnum
423 spectet securo celebrantem litora ludo ;
424 oraque Thessalico melior contundere freno
425 vectorem pavidae Castor dum quaereret Helles,
426 passus Amyclaea pinguescere Cyllaron herba.
427 Illis Taenario pariter tremat ignea fuco
428 purpura, quod gemina mater spectabile tela
429 duxit opus ; bis Taygeton silvasque comantes
430 struxerat, Eurotan molli bis fuderat auro ;
431 quemque suus sonipes niveo de stamine portat
432 et volat amborum patrius de pectore cycnus.
433 At tibi collectas solvit jam fibula vestes
434 ostenditque umeros fortes spatiumque superbi
435 pectoris Herculeis aequum, Meleagre, lacertis.
436 Hic numerosa phalanx, proles Cyllenia : certus
437 Aethalides subitas nervo redeunte sagittas
438 cogere ; tu medios gladio bonus ire per hostes,
439 Euryte ; nec patrio Minyis ignobilis usu
440 nuntia verba ducis populis qui reddit, Echion.
441 Sed non, Iphi, tuis Argo reditura lacertis
442 heu cinerem Scythica te maesta relinquet harena
443 cessantemque tuum lugebit in ordine remum.
444 Te quoque dant campi tanto pastore Pheraei
445 felices, Admete ; tuis nam pendit in arvis
446 Delius, irato Steropen quod fuderat arcu.
447 A quotiens famulo notis soror obvia silvis
448 flevit, ubi Ossaeae captaret frigora quercus
449 perderet et pingui miseros Boebeide crines.
450 Insurgit transtris et remo Nerea versat
451 Canthus, in Aeaeo volvet quem barbara cuspis
452 pulvere ; at interea clari decus adjacet orbis
453 quem genitor gestabat Abas : secat aurea fluctu
454 tegmina Chalcidicas fugiens Euripus harenas
455 celsaque semiferum contorquens frena luporum

456 surgis ab ostrifero medius, Neptune, Geraesto.
 457 At tibi Palladia pinu, Polypheme, revector
 458 ante urbem arduas restat deprendere patris
 459 reliquias, multum famulis pia justa moratis,
 460 si venias. Breviore petit jam caerulea remo
 461 occupat et longe sua transtra novissimus Idas.
 462 At frater magnos Lynceus servatus in usus
 463 quem tulit Arene, possit qui rumpere terras
 464 et Stygia transmissis tacitam deprendere visu.
 465 Fluctibus e mediis terras dabit ille magistro
 466 et dabit astra rati, cumque aethera Juppiter umbra
 467 perdiderit, solus transibit nubila Lynceus.
 468 Quin et Cecropiae proles vacat Orithyiae
 469 temperet ut tremulos Zetes fraterque ceruchos.
 470 Nec vero Odrisyus transtris impenditur Orpheus
 471 aut pontum remo subigit, sed carmine tonsas
 472 ire docet summo passim ne gurgite pugnent.
 473 Donat et Iphiclo pelagus juvenumque labores
 474 Aesonides, fessum Phylace quem miserat aevo
 475 non jam operum in partem, monitus sed tradat ut acres
 476 magnorumque viros qui laudibus urat avorum.
 477 Arge, tuae tibi cura ratis, te moenia doctum
 478 Thespia Palladio dant munere ; sors tibi nequa
 479 parte trahat tacitum puppis mare fissaque fluctu
 480 vel pice vel molli conducere vulnera cera.
 481 Pervigil Arcadio Tiphys pendebat ab astro
 482 Hagniades, felix stellis qui segnibus usum
 483 et dedit aequoreos caelo duce tendere cursus.
 484 Ecce per obliqui rapidum compendia montis
 485 ductor ovans laetusque dolis agnoscit Acastum
 486 horrentem jaculis et parmae luce coruscum.
 487 Ille ubi se mediae per scuta virosque carinae
 488 intulit, ardenti Aesonides retinacula ferro
 489 abscidit ; haut aliter saltus vastataque pernix
 490 venator quam lustra fugit dominoque timentem
 491 urget equum teneras compressus pectore tigres
 492 quas astu rapuit pavido dum saeva relictis
 493 mater in averso catulis venatur Amano.
 494 It pariter propulsa ratis ; stant litore matres
 495 claraque vela oculis percussaque sole sequuntur
 496 scuta virum, donec jam celsior arbore pontus
 497 immensusque ratem spectantibus abstulit aer.
 498 Siderea tunc arce pater pulcherrima Graium
 499 coepta tuens tantamque operis consurgere molem
 500 laetatur (patrii neque enim probat otia regni).
 501 Una omnes gaudent superi venturaque mundo
 502 tempora quaeque vias cernunt sibi crescere Parcae.
 503 Sed non et Scythici genitor discrimine nati
 504 intrepidus tales fundit Sol pectore voces :
 505 "Summe sator, cui nostra dies volventibus annis
 506 tot peragit reficitque vices, tuane ista voluntas ?
 507 Graiaque nunc undis duce te nutuque secundo
 508 it ratis ? An meritis fas est mihi rumpere questus ?
 509 Hoc metuens et nequa foret manus invida nato,
 510 non mediae telluris opes, non improba legi
 511 divitis arva plagae (teneant uberrima Teucer
 512 et Libys et vestri Pelopis domus) : horrida saevo
 513 quae premis arva gelu strictosque insedimus amnes.

514 Cederet his etiam et sese sine honore referret
515 ulterius, sed nube rigens ac nescia frugum
516 stat super et nostros jam zona reverberat ignes.
517 Quid regio immanis, quid barbarus amnibus ullis
518 Phasis et aversis proles mea gentibus obstat ?
519 Quid Minyae meruere queri ? Num vellere Graio
520 vi potitur ? Profugo quin agmina jungere Phrixo
521 abnuvit Inoas ultro nec venit ad aras,
522 imperii sed parte virum nataeque moratus
523 conjugio videt e Graia nunc stirpe nepotes
524 et generos vocat et junctas sibi sanguine terras.
525 Flecte ratem motusque, pater, nec vulnere nostro
526 aequora pande viris : veteris sat conscia luctus
527 silva Padi et viso flentes genitore sorores."
528 Adfremit his quassatque caput qui vellera dono
529 Bellipotens sibi fixa videt temptataque, contra
530 Pallas et amborum gemuit Saturnia questus.
531 Tum genitor "Vetera haec nobis et condita pergunt
532 ordine cuncta suo rerumque a principe cursu
533 fixa manent (neque enim terris tum sanguis in ullis
534 noster erat cum fata darem justique facultas
535 hinc mihi, cum varios struerem per saecula reges)
536 adque ego curarum repetam decreta mearum :
537 jam pridem regio, quae virginis aequor ad Helles
538 et Tanai tenus immenso descendit ab Euro,
539 undat equis floretque viris nec tollere contra
540 ulla pares animos nomenque capessere bellis
541 ausa manus ; sic fata, locos sic ipse fovebam.
542 Accelerat sed summa dies Asiamque labantem
543 linquimus et poscunt jam me sua tempora Grai.
544 Inde meae quercus tripodesque animaeque parentum
545 hanc pelago misere manum. Via facta per undas
546 perque hiemes, Bellona, tibi. Nec vellera tantum
547 indignanda manent propiorque ex virgine rapta
548 ille dolor, sed (nulla magis sententia menti
549 fixa meae) veniet Phrygia jam pastor ab Ida
550 qui gemitus irasque pares et mutua Grai
551 dona ferat. Quae classe dehinc effusa procorum
552 bella, quot ad Trojam flentes hiberna Mycenae,
553 quot proceres natosque deum, quae robora cernes
554 oppetere et magnis Asiam concedere fati.
555 Hinc Danaum de fine sedet gentesque fovebo
556 mox alias. Pateant montes silvaeque lacusque
557 cunctaque claustra maris ; spes et metus omnibus esto.
558 Arbiter ipse locos terrenaque summa movendo
559 experiar, quaenam populis longissima cunctis
560 regna velim linquamque datas ubi certus habenas."
561 Tunc oculos Aegaea refert ad caerula robur
562 Herculeum Ledaque tuens genus, atque ita fatur :
563 "Tendite in astra, viri : me primum regia mundo
564 Iapeti post bella trucis Phlegraeque labores
565 imposuit : durum vobis iter et grave caeli
566 institui. Sic ecce meus, sic orbe peracto
567 Liber et expertus terras remeavit Apollo."
568 Dixit et ingenti flammantem nubila sulco
569 derexit per inane facem, quae puppe propinqua
570 in bifidum discessit iter fratresque petivit
571 Tyndareos placida et mediis in frontibus haesit

572 protinus amborum lumenque innoxia fundit
573 purpureum, miseris olim implorabile nautis.
574 Interea medio saevus permissa profundo
575 carbasa Pangaea Boreas speculatus ab arce
576 continuo Aeoliam Tyrrhenaque tendit ad antra
577 concitus. Omne dei rapidis nemus ingemit alis,
578 strata Ceres, motuque niger sub praepete pontus.
579 Aequore Trinacrio refugique a parte Pelori
580 stat rupes horrenda fretis : quot in aethera surgit
581 molibus, infernas totidem demissa sub undas.
582 Nec scopulos aut antra minor juxta altera tellus
583 cernitur. Illam Acamans habitat nudusque Pyracmon,
584 has nimbi ventique domos et naufraga servat
585 tempestas. Hinc in terras latumque profundum
586 est iter, hinc olim soliti miscere polumque
587 infelixque fretum (neque enim tunc Aeolus illis
588 rector erat Libya cum rumperet advena Calpen
589 Oceanus, cum flens Siculos Oenotria fines
590 perderet et mediis intrarent montibus undae)
591 intonuit donec pavidis ex aethere ventis
592 Omnipotens regemque dedit quem jussa vereri
593 saeva cohors ; tum monte chalybs iterataque muris
594 saxa domant Euros. Cum jam cohibere frementum
595 ora nequit, rex tunc aditus et claustra refringit
596 ipse volens placatque data fera murmura porta.
597 Nuntius hunc solio Boreas proturbat ab alto :
598 "Pangaea quod ab arce nefas", ait, "Aeole, vidi !
599 Graia novam ferro molem commenta juvenus
600 pergit et ingenti gaudens domat aequora velo
601 nec mihi libertas imis freta tollere harenis...
602 qualis eram nondum vinclis et carcere clausus !
603 Hinc animi structaeque viris fiducia puppis
604 quod Borean sub rege vident. Da mergere Graios
605 insanamque ratem : nil me mea pignora tangunt,
606 tantum hominum compesce minas, dum litora juxta
607 Thessala necdum aliae viderunt carbasa terrae."
608 Dixerat. At cuncti fremere intus et aequora venti
609 poscere. Tum validam contorto turbine portam
610 impulit Hippotades. Fundunt se carcere laeti
611 Thraces equi Zephyrusque et nocti concolor alas
612 nimborum cum prole Notus crinemque procellis
613 hispidus et multa flavus caput Eurus arena ;
614 induxere hiemem raucoque ad litora tractu
615 unanimi freta curva ferunt nec sola Tridentis
616 regna movent : vasto pariter ruit igneus aether
617 cum tonitru piceoque premit nox omnia caelo.
618 Excussi manibus remi conversaque frontem
619 puppis in obliquum resonos latus accipit ictus,
620 vela super tremulum subitus volitantia malum
621 turbo rapit. Qui tum Minyis trepidantibus horror
622 cum picei fulsere poli pavidamque coruscae
623 ante ratem cecidere faces antemnaque laevo
624 prona dehiscentem cornu cum sustulit undam.
625 Non hiemem missosque putant consurgere ventos
626 ignari sed tale fretum. Tum murmure maesto :
627 "Hoc erat inlicitas temerare rudentibus undas
628 quod nostri timuere patres. Vix litore puppem
629 solvimus et (quanto fremitu) se sustulit Aegon.

630 Hocine Cyaneae concurrunt aequore cautes ?
631 Tristius an miseris superest mare ? Linquite, terrae,
632 spem pelagi sacrosque iterum seponite fluctus."
633 haec iterant segni flentes occumbere leto.
634 Magnanimus spectat pharetras et inutile robur
635 Amphitryoniades ; miscent suprema paventes
636 verba alii junguntque manus atque ora fatigant
637 aspectu in misero tota, cum protinus alnus
638 solvitur et vasto puppis mare sorbet hiatu.
639 Illam huc atque illuc nunc torquens verberat Eurus,
640 nunc stridens Zephyris aufert Notus ; undique fervent
641 aequora, cum subitus trifida Neptunus in hasta
642 caeruleum fundo caput extulit. "Hanc mihi Pallas
643 et soror hanc", inquit, "mulcens mea pectora fletu
644 abstulerint ; veniant Phariae Tyriaeque carinae
645 permissumque putent. Quotiens mox rapta videbo
646 vela Notis plenasque aliis clamoribus undas.
647 Non meus Orion aut saevus Pliade Taurus
648 mortis causa novae. Miseris tu gentibus, Argo,
649 fata paras nec jam merito tibi, Tiphy, quietum
650 ulla parens volet Elysium manesque piorum."
651 Haec ait et pontum pater ac turbata reponit
652 litora depellitque Notos, quos caeruleus horror
653 et madido gravis unda sinu longeque secutus
654 imber ad Aeoliae tendunt simul aequore portae.
655 Emicuit reserata dies caelumque resolvit
656 arcus et in summos redierunt nubila montes.
657 Jam placidis ratis exstat aquis quam gurgite ab imo
658 et Thetis et magnis Nereus socer erigit ulnis.
659 Ergo umeros ductor sacro velatur amictu
660 Aesoniamque capit pateram, quam munere gaudens
661 liquerat hospitio pharetrasque rependerat auro
662 Salmoneus, nondum ille furens cum fingeret alti
663 quadrifida trabe tela Jovis contraque ruenti
664 aut Athon aut Rhodopen maestae nemora ardua Pisae
665 aemulus et miseros ipse ureret Elidis agros.
666 Hac pelago libat latices et talibus infit :
667 "Di, quibus undarum tempestatisque sonorae
668 imperium et magno penitus par regia caelo,
669 tuque, fretum divosque pater sortite bifformes,
670 seu casus nox ista fuit seu, volvitur axis
671 ut superum, sic stare operam tollique vicissim
672 pontus habet, seu te subitae nova puppis imago
673 armorumque hominumque truces consurgere in iras
674 impulit, haec luerim satis et tua numina, rector,
675 jam fuerint meliora mihi. Da reddere terris
676 has animas patriaeque amplecti limina portae.
677 Tum quocumque loco meritas tibi plurimus aras
678 pascit honos ibi, quamque rotis horrendus equisque
679 stas, pater, atque ingens utrimque fluentia Triton
680 frena tenet, tantus nostras condere per urbes."
681 Dixerat haec. Oritur clamor dextraeque sequentum
682 verba ducis. Sic cum stabulis et messibus ingens
683 ira deum et Calabri populator Sirius arvi
684 incubuit, coit agrestum manus anxia priscum
685 in nemus, et miseris dictat pia vota sacerdos.
686 Ecce autem molli Zephyros descendere lapsu
687 aspiciunt ; volat immissis cava pinus habenis

688 infinditque salum et spumas vomit aere tridenti :
689 Tiphys agit tacitique sedent ad jussa ministri,
690 qualiter ad summi solium Jovis omnia circum
691 prona parata deo ventique imbresque nivesque
692 fulguraque et tonitrus et adhuc in fontibus amnes.
693 At subitus curaque duces metus acrior omni
694 mensque mali praesaga quatit quod regis adortus
695 progeniem raptoque dolis crudelis Acasto
696 cetera nuda neci medioque in crimine patrem
697 liquerit ac nullis inopem vallaverit armis,
698 ipse procul nunc tuta tenens (ruat omnis in illos
699 quippe furor) nec vana pavet trepidatque futuris.
700 Saevit atrox Pelias inimicaque vertice ab alto
701 vela videt nec qua se ardens effundere possit.
702 Nil animi, nil regna juvant ; fremit obice ponti
703 clausa cohors telisque salum facibusque coruscat.
704 Haud secus, aerisona volucer cum Daedalus ora
705 prosiluit juxtaque comes brevioribus alis,
706 nube nova linquente domos Minoia frustra
707 infremuit manus et visu lassatur inani
708 omnis eques plenisque redit Gortyna pharetris.
709 Quin etiam in thalamis primoque in limine Acasti
710 fusus humo juvenis gressus et inania signa
711 ore premit sparsisque legens vestigia canis
712 "Te quoque jam maesti forsitan genitoris imago,
713 nate", ait, "et luctus subeunt suspiria nostri,
714 jamque dolos circumque trucis discrimina leti
715 mille vides. Qua te, infelix, quibus insequar oris ?
716 Non Scythicas ferus ille domos nec ad ostia Ponti
717 tendit iter falsae sed captum laudis amore
718 te, puer, in nostrae durus tormenta senectae
719 nunc lacerat. Celsis an si freta puppibus essent
720 pervia, non ultro juvenes classemque dedissem ?
721 O domus, o freti nequiquam prole penates."
722 Dixit et extemplo furiis iraque minaci
723 terribilis : "Sunt hic etiam tua vulnera, praedo,
724 sunt lacrimae carusque parens." Simul aedibus altis
725 itque reditque fremens rerumque asperrima versat :
726 Bistonas ad meritos cum cornua saeva Thyoneus
727 torsit et infelix jam mille furoribus Haemus,
728 jam Rhodopes nemora alta gemunt, talem incita longis
729 porticibus conjunxque fugit natiqque Lycurgum.
730 Tartareo tum sacra Jovi Stygiisque ferebat
731 manibus Alcimedea, tanto super anxia nato
732 siquid ab excitis melius praenosceret umbris.
733 Ipsum etiam curisque parem talesque prementem
734 corde metus ducit, facilem tamen, Aesona conjunx.
735 In scrobibus cruor et largus Phlegethontis operti
736 stagnat honos saevoque vocat grandaeva tumultu
737 Thessalis exanimes atavos magnaepotem
738 Pleiones. Et jam tenues ad carmina vultus
739 extulerat maestosque tuens natumque nurumque
740 talia libato pandebat sanguine Cretheus :
741 "Mitte metus, volat ille mari quantumque propinquat,
742 jam magis atque magis variis stupet Aea deorum
743 prodigiis quatiuntque truces oracula Colchos.
744 Heu quibus ingreditur fatis, qui gentibus horror
745 pergit. Mox Scythiae spoliis nuribusque superbus

746 adveniet ; cuperem ipse graves tum rumpere terras.
747 Sed tibi triste nefas fraternaue turbidus arma
748 rex parat et saevos irarum concipit ignes.
749 Quin rapis hinc animam et tremulos citus effugis artus ?
750 I, meus es, jam te in lucos pia turba silentum
751 secretisque ciet volitans pater Aeolus arvis."
752 Horruit interea famulum clamore supremo
753 maesta domus regemque fragor per moenia differt
754 mille ciere manus et jam dare jussa vocatis.
755 Flagrantes aras vestemque nemusque sacerdos
756 praecipitat subitisque pavens circumspicit Aeson
757 quid moveat. Quam multa leo cunctatur in arta
758 mole virum rictuque genas et lumina pressit,
759 sic curae subiere ducem, ferrumne capessat
760 imbelle atque aevi senior gestamina primi
761 an patres regnique acuat mutabile vulgus.
762 Contra effusa manus haerensque in pectore conjunx
763 "Me quoque", ait, "casus comitem quicumque propinquat
764 accipies nec fata traham natumque videbo
765 te sine, sat caeli patiens, cum prima per altum
766 vela edit, potui quae tantum ferre dolorem."
767 Talia per lacrimas. Et jam circumspicit Aeson
768 praeveniat quo fine minas, quae fata capessat
769 digna satis : magnos obitus natumque domumque
770 et genus Aeolium pugnataque poscere bella.
771 Est etiam ante oculos aevi rudis altera proles,
772 ingentes animos et fortia discere facta
773 quem velit atque olim leti meminisse paterni.
774 Ergo sacra novat. Veteris sub nocte cupressi
775 sordidus et multa pallens ferrugine taurus
776 stabat adhuc, cui caeruleae per cornua vittae
777 et taxi frons hirta comis ; ipse aeger anhelans
778 impatiensque loci visaque exterritus umbra
779 (hunc sibi praecipuum gentis de more nefandae
780 Thessalis in seros Ditis servaverat usus).
781 Tergeminam tum placat eram Stygiasque supremo
782 obsecrat igne domos, jamjam exorabile retro
783 carmen agens ; neque enim ante leves niger avehit umbras
784 portitor et cunctae primis stant faucibus Orci.
785 Illum ubi terrificis superesse in tempore sacris
786 conspexit, statuit leto supremaque fatur
787 ipse manu tangens damnati cornua tauri :
788 "Vos, quibus imperium Jovis et non segne peractum
789 lucis iter, mihi conciliis, mihi cognita bellis
790 nomina magnorum fama sacrata nepotum ;
791 tuque excite parens umbris ut nostra videres
792 funera et oblitos superum paterere dolores,
793 da placidae mihi sedis iter meque hostia vestris
794 conciliet praemissa locis. Tu, nuntia sontum
795 virgo Jovi, terras oculis quae prospicis aequis,
796 ultricesque deae Fasque et grandaeva Furorum
797 Poena parens, meritis regis succedite tectis
798 et saevas inferte faces. Sacer effera raptet
799 corda pavor ; nec sola mei gravia adfore nati
800 arma ratemque putet : classes et Pontica signa
801 atque indignatos temerato litore reges
802 mente agitet semperque metu decurrat ad undas
803 arma ciens ; mors sera viam temptataque claudat

804 effugia et nostras nequeat praecurrere diras
 805 sed reduces jam jamque viros auroque coruscum
 806 cernat iter. Stabo insultans et ovantia contra
 807 ora manusque feram. Tum, vobis si quod inausum
 808 arcanumque nefas et adhuc incognita leti
 809 sors superest, date fallaci pudibunda senectae
 810 exitia indecoresque obitus. Non Marte nec armis
 811 aut nati precor ille mei dignatus ut umquam
 812 ense cadat ; quae fida manus, quae cara suorum
 813 diripiat laceretque senem nec membra sepulchro
 814 contegat. Haec noster de rege piacula sanguis
 815 sumat et, heu, cunctae, quas misit in aequora, gentes."
 816 adstitit et nigro fumantia pocula tabo
 817 porrigit ipsa gravi Furiarum maxima dextra ;
 818 illi avide exceptum pateris hausere cruorem.
 819 Fit fragor, irrumpunt sonitu qui saeva ferebant
 820 imperia et strictos jussis regalibus enses ;
 821 in media jam morte senes suffectaque leto
 822 lumina et undanti revomentes veste cruorem
 823 conspiciunt ; primoque rudem sub limine rerum
 824 te, puer, et visa pallentem morte parentum
 825 diripiunt adduntque tuis. Procul horruit Aeson
 826 excedens memoremque tulit sub nubibus umbram.
 827 Cardine sub nostro rebusque abscisa supernis
 828 Tartarei sedet aula patris, non illa ruenti
 829 accessura polo, victam si volvere molem
 830 ingenti jacet ore Chaos quod pondere fessam
 831 materiem lapsumque queat consumere mundum.
 832 Hic geminae aeternum portae quarum altera dura
 833 semper lege patens populos regesque receptat ;
 834 ast aliam temptare nefas et tendere contra :
 835 rara et sponte patet siquando pectore ductor
 836 vulnera nota gerens, galeis praefixa rotisque
 837 cui domus aut studium mortales pellere curas,
 838 culta fides, longe metus atque ignota cupido,
 839 seu venit in vittis castaque in veste sacerdos.
 840 Quos omnes levibus plantis et lampada quassans
 841 progenies Atlantis agit. Lucet via late
 842 igne dei, donec silvas et amoena piorum
 843 deveniant camposque ubi sol totumque per annum
 844 durat aprica dies thiasique chorique virorum
 845 carminaque, et quorum populis jam nulla cupido.
 846 Has pater in sedes aeternaque moenia natum
 847 inducitque nurum. Tum porta quanta sinistra
 848 poena docet maneat Pelian, quot limine monstra.
 849 Mirantur tantos strepitus turbamque ruentem
 850 et loca et infernos almae virtutis honores.

AR_2 v.1 Interea scelerum luctusque ignarus Iason
 2 alta secat ; neque enim patrios cognoscere casus
 3 Juno sinit, mediis ardens ne flectat ab undis
 4 ac temere in Pelian et adhuc obstantia regis
 5 fata ruat placitosque deis ne deserat actus.
 6 Jamque fretis summas aequatum Pelion ornos
 7 templaque Tisaeae mergunt obliqua Dianae,

8 jam Sciathos subsedit aquis, jam longa recessit
9 Sepias, attollit tondentes pabula Magnes
10 campus equos. Vidisse putant Dolopeia busta
11 intrantemque Amyron curvas quaesita per oras
12 aequora, flumineo cujus redeuntia vento
13 vela legunt : remis insurgitur ; inde salutant
14 Eurymenas. Recipit velumque fretumque reversus
15 Auster et in nubem Minyis repetentibus altum
16 Ossa redit. Metus ecce deum damnataque bello
17 Pallene circumque vident immania monstra
18 terrigenum caelo quondam adversata Gigantum,
19 quos scopulis trabibusque parens miserata jugisque
20 induit et versos exstruxit in aethera montes.
21 Quisque suas in rupe minas pugnamque metusque
22 servat adhuc, quatit ipse hiemes et torquet ab alto
23 fulmina crebra Pater, scopulis sed maximus illis
24 horror abest, Sicala pressus tellure Typhoeus.
25 Hunc profugum et sacras revomentem pectore flammam
26 (ut memorant) prensam ipse comis Neptunus in altum
27 abstulit implicuitque vadis totiensque cruenta
28 mole resurgentem torquentemque anguibus undas
29 Sicanium dedit usque fretum cumque urbibus Aetnam
30 intulit ora premens. Trux ille ejectat adesi
31 fundamenta jugi : pariter tunc omnis anhelat
32 Trinacria, injectam fesso dum pectore molem
33 commovet experiens gemituque reponit inani.
34 Jamque Hyperionius metas maris urget Hiberi
35 currus et evectae prono laxantur habenae
36 aethere, cum palmas Tethys grandaeva sinusque
37 sustulit et rupto sonuit sacer aequore Titan.
38 Auxerat hora metus, jam se vertentis Olympi
39 ut faciem raptosque simul montesque locosque
40 ex oculis circumque graves videre tenebras :
41 ipsa quies rerum mundique silentia terrent
42 astraque et effusis stellatus crinibus aether.
43 Ac velut ignota captus regione viarum
44 noctivagum qui carpit iter non aure quiescit,
45 non oculis, noctisque metus niger auget utrimque
46 campus et occurrens umbris majoribus arbor,
47 haud aliter trepidare viri. Sed pectora firmans
48 Hagniadēs "Non hanc", inquit, "sine numine pinum
49 derigimus, nec me tantum Tritonia cursus
50 erudiit ; saepe ipsa manu dignata carinam est.
51 An non experti, subitus cum luce fugata
52 horruit imbre dies ? Quantis, pro Juppiter, Austris
53 restitimus, quanta quotiens et Pallados arte
54 incassum decimae cecidit tumor arduus undae !
55 Quin agite, o socii ; micat immutabile caelum
56 puraque nec gravido surrexit Cynthia cornu
57 (nullus in ore rubor), certusque ad talia Titan
58 integer in fluctus et in uno decedit Euro.
59 Adde quod in noctem venti veloque marique
60 incumbunt magis et tacitis ratis ocior horis.
61 Adque adeo non illa sequi mihi sidera monstrat
62 quae delapsa polo reficit mare (tantus Orion
63 jam cadit, irato jam stridet in aequore Perseus),
64 sed mihi dux, vetitis qui nunquam conditus undis
65 axe nitet, Serpens, septenosque implicat ignes."

66 sic ait et certi memorat qui vultus Olympi,
67 Pleiones Hyadumque locos, quo sidere vibret
68 Ensis, et Actaeus niteat qua luce Bootes.
69 Haec ubi dicta dedit, Cereris tum munere fessas
70 restituunt vires et parco corpora Baccho.
71 Mox somno cessere ; regunt sua sidera puppem.
72 Jamque sub Eoae dubio Pallantidos igne
73 albet ager motique truces ab ovilibus ursi
74 tuta domosque petunt, raras et litus in altum
75 mittit aves, cum primus equis exegit anhelis
76 Phoebus Athon mediasque diem dispersit in undas.
77 Certatim remis agitur mare rostraque cursu
78 prima tremunt, et jam summis Vulcania surgit
79 Lemnos aquis, tibi per varios defleta labores,
80 Ignipotens, nec te furiis et crimine matrum
81 terra fugat, meritique piget meminisse prioris.
82 Tempore quo primum fremitus insurgere opertos
83 caelicolum et regni sensit novitate tumentes
84 Juppiter aetheriae nec stare silentia pacis,
85 Junonem volucris primam suspendit Olympo,
86 horrendum chaos ostendens poenasque barathri.
87 Mox etiam pavidae temptantem vincula matris
88 solvere praerupti Vulcanum vertice caeli
89 devolvit ; ruit ille polo noctemque diemque
90 turbinis in morem, Lemni dum litore tandem
91 insonuit. Vox inde repens ut perculit urbem,
92 adclinem scopulo inveniunt miserentque fiventque
93 alternos aegro cunctantem poplite gressus.
94 Hinc, reduci superas postquam pater adnuit arces,
95 Lemnos cara deo (nec fama notior Aetne
96 aut Lipares domus) : has epulas, haec templa peracta
97 aegide et horridi formatis fulminis alis
98 laetus adit. Contra Veneris stat frigida semper
99 ara loco, meritas postquam dea conjugis iras
100 horruit et tacitae Martem tenuere catenae.
101 Quocirca struit illa nefas Lemnoque merenti
102 exitium furiale movet. Neque enim alma videri
103 jam tum ea cum tereti crinem subnectitur auro
104 sidereos diffusa sinus ; eadem effera et ingens
105 et maculis suffecta genas pinumque sonantem
106 virginibus Stygiis nigramque simillima pallam.
107 Jamque dies aderat. Thracas qui fuderat armis
108 dux Lemni, puppes tenui contexere canna
109 ausus et inducto cratem defendere tergo,
110 laeta mari tum signa refert plenasque movebant
111 armentis nuribusque rates : it barbara vestis
112 et torques insigne loci. Sonat aequore clamor
113 "O patria, o variis conjunx nunc anxia curis,
114 has agimus longi famulas tibi praemia belli",
115 cum dea se piceo per sudum turbida nimbo
116 praecipitat Famamque vagam vestigat in umbra.
117 Quam pater omnipotens digna atque indigna canentem
118 spargentemque metus placidis regionibus arcet
119 aetheris : illa fremens habitat sub nubibus imis,
120 non Erebi, non diva poli, terrasque fatigat
121 quas datur. Audentem primi spernuntque fiventque,
122 mox omnes agit et motis quatit oppida linguis.
123 Talem diva sibi scelerisque dolique ministram

124 quaerit avens. Videt illa prior ; jamque advolat ultro
125 impatiens, jamque ora parat, jam suscitatur aures.
126 Hanc superincendit Venus atque his vocibus implet :
127 "Vade age et aequoream, virgo, delabere Lemnon
128 et cunctas mihi verte domos, praecurrere qualis
129 bella soles, cum mille tubas armataque campis
130 agmina et innumerum flatum cum fingis equorum.
131 Adfore jam luxu turpique cupidine captos
132 fare viros caraque toris inducere Thressas.
133 Haec tibi principia, hinc rabidas dolor undique matres
134 instimulet : mox ipsa adero ducamque paratas."
135 Illa abit et mediam gaudens defertur in urbem
136 et primam Eurynomen ad proxima limina Codri,
137 occupat exesam curis castumque cubile
138 servantem : manet illa viro famulasque fatigat
139 litoribus, tardi reputant quae tempora belli
140 ante torum et longo mulcent insomnia penso.
141 Huic dea cum lacrimis et nota veste Neaerae
142 icta genas "Utinam non hic tibi nuntius essem,
143 o soror, aut nostros", inquit, "prius unda dolores
144 obruat, in tali quoniam tibi tempore conjunx
145 sic merita, votis quem tu fletuque requiris,
146 heu furit et captae indigno famulatur amore.
147 Jamque aderunt, thalamisque tuis Threissa propinquat
148 non forma, non arte colus, non laude pudoris
149 par tibi nec magni proles praeclara Dorycli,
150 picta manus ustoque placet sed barbara mento.
151 Ac tamen hos aliis forsitan solabere casus
152 tu thalamis fatoque leges meliore penates ;
153 me tua matris egens damnataque paelice proles
154 exanimat, quam jam miseros transversa tuentem
155 letalesque dapes infectaque pocula cerno.
156 Scis simile ut flammis simus genus ; adde cruentis
157 quod patrium saevire Dahis. Jam lacte ferino,
158 jam veniet durata gelu. Sed me quoque pulsam
159 fama viro nostrosque toros virgata tenebit
160 et plaustro derepta nurus." Sic fata querellas
161 abscidit et curis pavidam lacrimisque relinquit.
162 Transit ad Iphinoen isdemque Amythaonis implet
163 Olenique domum furiis ; totam inde per urbem
164 personat ut cunctas agitent expellere Lemno,
165 ipsi urbem Thressaeque regant. Dolor iraque surgit,
166 obvia quaeque eadem traditque auditque, neque ulli
167 vana fides. Tum voce deos tum questibus implent,
168 oscula jamque toris atque oscula postibus ipsis
169 ingeminant lacrimisque iterum visuque morantur.
170 Prosiliunt nec tecta virum thalamosque revisunt
171 amplius, adglomerant sese nudisque sub astris
172 condensae fletus acuunt ac dira precantur
173 conjugia et Stygias infanda ad foedera taedas.
174 Has inter medias Dryopes in imagine maestae
175 flet Venus et saevis ardens dea planctibus instat
176 primaque "Sarmaticas utinam Fortuna dedisset
177 insedissem domos tristesque habitasse pruinas,
178 plaustra sequi, vel jam patriae vidisse per ignes
179 culmina agi stragemque deum (nam cetera belli
180 perpetimur). Mene ille novis, me destinat amens
181 servitiis ? Urbem aut fugiens natosque relinquam ?

182 Non prius ense manus raptoque armabimus igne,
 183 dumque silent ducuntque nova cum conjuge somnos,
 184 magnum aliquid spirabit amor ? " Tunc ignea torquens
 185 lumina praecipites excussit ab ubere natos.
 186 Ilicet arrectae mentes evictaque matrum
 187 corda sacer Veneris gemitus rapit : aequora cunctae
 188 prospiciunt simulantque choros delubraque festa
 189 fronde tegunt laetaeque viris venientibus adsunt.
 190 Jamque domos mensasque petunt, discumbitur altis
 191 porticibus, sua cuique furens infestaque conjunx
 192 adjacet, inferni qualis sub nocte barathri
 193 accubat attonitum Phlegyan et Thesea juxta
 194 Tisiphone saevasque dapes et pocula libat,
 195 tormenti genus, et nigris amplectitur hydris.
 196 Ipsa Venus quassans undantem turbine pinum
 197 adglomerat tenebras pugnaeque accincta trementem
 198 desilit in Lemnon ; nimbis et luce fragosa
 199 prosequitur polus et tonitru pater auget honoro.
 200 Inde novam pavidas vocem furibunda per auras
 201 congeminat, qua primus Athos et pontus et, ingens,
 202 Thraca, latus, pariterque toris exhorruit omnis
 203 mater et adstricto riguerunt ubere nati.
 204 Accelerat Pavor et Geticis Discordia demens
 205 e stabulis atraeque genis pallentibus Irae
 206 et Dolus et Rabies et Leti major imago
 207 visa truces exserta manus, ut prima vocatu
 208 intonuit signumque dedit Mavortia conjunx.
 209 Hic aliud Venus et multo magis ipsa tremendum
 210 orsa nefas gemitus fingit vocesque cadentum
 211 inrupitque domos et singultantia gestans
 212 ora manu taboque sinus perfusa recenti
 213 arrectisque comis "Meritos en prima revertor
 214 ulta toros : premit ecce dies." Tum verbere victas
 215 in thalamos agit et cunctantibus inserit enses.
 216 Unde ego tot scelerum facies, tot fata jacentum
 217 exsequar ? Heu, vatem monstris quibus intulit ordo,
 218 quae se aperit series ! O qui me vera canentem
 219 sistat et hac nostras exsolvat imagine noctes.
 220 Invadunt aditus et quondam cara suorum
 221 corpora : pars, ut erant, dapibus vinoque soporos,
 222 pars, conferre manus etiam magnisque paratae
 223 cum facibus quosdam insomnes et cuncta tuentes,
 224 sed temptare fugam prohibetque capessere contra
 225 arma metus ; adeo ingentes inimica videri
 226 diva dabat, notaque sonat vox conjuge major ;
 227 tantum oculos pressere metu velut agmina cernant
 228 Eumenidum ferrumve super Bellona coruscet.
 229 Hoc soror, hoc conjunx, propiorque hoc nata parensque
 230 saeva valet prensosque toris mactatque trahitque
 231 femineum genus, immanes quos sternere Bessi
 232 nec Geticae potuere manus aut aequoris irae.
 233 His cruor in thalamis et anhela in pectore fumant
 234 vulnera, seque toris misero luctamine trunci
 235 devolvunt. Diras aliae ad fastigia taedas
 236 iniciunt adduntque domos pars ignibus atris.
 237 Effugiunt propere set dura in limine conjunx
 238 obsidet et viso repetunt incendia ferro.
 239 Ast aliae Thressas labem causamque furorum

240 diripiunt ; mixti gemitus clamorque precantum
241 barbarus, ignotaque implebant aethera voces.
242 Sed tibi nunc quae digna tuis ingentibus ausis
243 orsa feram, decus et patriae laus una ruentis,
244 Hypsipyle ? Non ulla meo te carmine dictam
245 abstulerint, durent Latii modo saecula fasti
246 Iliacique Lares tantique palatia regni.
247 Inruerant actae pariter nataeque nurusque,
248 totaque jam sparsis exarserat insula monstris
249 illa pias armata manus "Fuge protinus urbem
250 meque, pater. Non hostis," ait, "non moenia laesi
251 Thraces habent : nostrum hoc facinus ; ne quaere quis auctor
252 jam fuge, jam dubiae donum rape mentis et ense
253 tu potius, miser, oro, tene." Tunc excipit artus
254 obnubique caput tacitumque ad conscia Bacchi
255 templa rapit primoque manus a limine tendens
256 "Exime nos sceleri, Pater, et miserere piorum
257 rursus", ait. Tacita pavidum tunc sede locavit
258 sub pedibus dextraque dei ; latet ille receptus
259 veste sacra. Voces chorus et trieterica reddunt
260 aera sonum fixaeque fremunt in limine tigres.
261 Regina ut roseis Auroram surgere bigis
262 vidit et insomni lassatas turbine tandem
263 conticuisse domos, stabilem quando optima facta
264 dant animum majorque piis audacia coeptis,
265serta patri juvenisque comam vestesque Lyaei
266 induit et medium curru locat aeraque circum
267 tympanaque et plenas tacita formidine cistas.
268 Ipsa sinus hederisque ligat famularibus artus
269 pampineamque quatit ventosis ictibus hastam
270 respiciens, teneat virides velatus habenas
271 ut pater, in nivea tumeant ut cornua mitra
272 et sacer ut Bacchum referat scyphus. Impulit acri
273 tum validas stridore fores rapiturque per urbem
274 talia voce canens : "Linque o mihi caede madentem,
275 Bacche, domum ; sine foedatum te funere pontus
276 expiet et referam lotos in templa dracones."
277 Sic medios egressa metus ; facit ipse verendam
278 nam deus et flatu non inscia gliscit anhelus.
279 Jamque senem tacitis saeva procul urbe remotum
280 occulerat silvis, ipsam sed conscius ausi
281 nocte dieque Pavor fraudataque turbat Erinys.
282 Non similes jam ferre choros (semel orgia fallunt)
283 audet, non patrios furiis accendere saltus,
284 et fuga diversas misero quaerenda per artes.
285 Visa ratis saevae defecta laboribus undae,
286 quam Thetidi longinqua dies Glaucoque repostam
287 solibus et canis urebat luna pruinis.
288 Huc genitorem altae per opaca silentia noctis
289 praecipitem silvis rapit et sic maesta profatur :
290 "Quam, genitor, patriam, quantas modo linquis inanes
291 pube domos. Pro dira lues, pro noctis acerbae
292 exitium. Talin possum te credere puppi,
293 care parens ? Possum tantis retinere periculis ?
294 Solvimus heu serum Furiis scelus. Adnue votis,
295 diva, soporiferas quae nunc trahis aequore bigas.
296 Non populos, non dite solum, non ulla parenti
297 regna peto ; patria liceat decedere terra.

298 Quando ego servato mediam genitore per urbem
299 laeta ferar ? Quando hic lacrimas planctusque videbo ? "
300 Dixerat. Ille procul trunca fugit anxius alno
301 Taurorumque locos delubraque saeva Dianae
302 advenit. Hic illum tristi, dea, praeficis arae
303 ense dato ; mora nec terris tibi longa cruentis :
304 jam nemus Egeriae, jam te ciet altus ab Alba
305 Juppiter et soli non mitis Aricia regi.
306 Arcem nata petit, quo jam manus horrida matrum
307 congruerat. Rauco fremitu sedere parentum
308 natorumque locis vacuaeque in moenibus urbis
309 jura novant ; donant solio sceptrisque paternis
310 ut meritam redeuntque piae sua praemia menti.
311 Ecce procul validis Lemnon tendentia remis
312 arma notant ; rapitur subito regina tumultu
313 conciliumque vocat. Non illis obvia tela
314 ferre nec infestos derat furor improbus ignes,
315 ni Veneris saevas fregisset Mulciber iras.
316 Tunc etiam vates Phoebo dilecta Polyxo
317 (non patriam, non certa genus, sed maxima cete
318 Proteaque ambiguum Phariis se patris ab antris
319 huc rexisse vias junctis super aequora phocis ;
320 saepe imis se condit aquis cunctataque paulum
321 surgit ut auditas referens in gurgite voces)
322 "Portum demus" ait "fatis haec, credite, puppis
323 advenit et levior Lemno deus aequore flexit
324 huc Minyas ; Venus ipsa volens dat foedera jungi,
325 dum vires utero maternaque sufficit aetas."
326 Dicta placent, portatque preces ad litora Grais
327 Iphinoe ; nec turba nocens scelerisque recentis
328 signa movent, tollitque loci Cytherea timorem.
329 Protinus ingentem procerum sub nomine taurum
330 deicit, insuetis et jam pia munera templis
331 reddit et hac prima Veneris calet ara juvenca.
332 Ventum erat ad rupem, cujus pendentia nigris
333 fumant saxa jugis coquiturque vaporibus aer.
334 Substitit Aesonides atque hic regina precari
335 hortatur causasque docens "Haec antra videtis
336 Vulcanique", ait, "ecce domos : date vina precesque.
337 Forsitan hoc factum jaceat jam fulmen in antro ;
338 nox dabit ipsa fidem clausae cum murmura flammae,
339 hospes, et incussae sonitum mirabere massae."
340 Moenia tum viresque loci veteresque parentum
341 jactat opes. Mediis famulae convivia tectis
342 expediunt ; Tyrrio vibrat torus igneus ostro.
343 Stat maerens atavos reges regesque maritos
344 Thressa manus, quaecumque faces timuisse jugales
345 credita nec dominae sanctum tetigisse cubile.
346 Jam medio Aesonides, jam se regina locavit,
347 post alii proceres ; sacris dum vincitur extis
348 prima fames, circum pateris it Bacchus, et omnis
349 aula silet ; dapibus coeptis mox tempora fallunt
350 noctis et in seras durant sermonibus umbras
351 praecipueque ducis casus mirata requirit
352 Hypsipyle, quae fata trahant, quae regis agat vis
353 aut unde Haemoniae molem ratis : unius haeret
354 adloquio et blandos paulatim colligit ignes
355 jam non dura toris Veneri nec iniqua reversae,

356 et deus ipse moras spatiumque indulget amori :
357 Pliada lege poli nimboso moverat astro
358 Juppiter aeternum volvens opus, et simul undis
359 cuncta ruunt unoque dei Pangaea sub ictu
360 Gargaraque et Moesi steterunt formidine luci.
361 Saevior haud alio mortales tempore gentes
362 terror agit ; tunc urget enim, tunc flagitat iras
363 in populos Astraera Jovem terrisque relictis
364 invocat adsiduo Saturnia sidera questu.
365 Insequitur niger et magnis cum fratribus Eurus
366 intonat Aegaeo, tenditque ad litora pontus,
367 et lunam quarto densam videt imbribus ortu
368 Thespiades, longus coeptis et fluctibus arcet
369 qui metus. Usque novos divae melioris ad ignes
370 urbe sedent laeti Minyae viduisque vacantes
371 indulgent thalamis nimbosque educere luxu
372 nec jam velle vias, Zephyrosque audire vocantes
373 dissimulant, donec resides Tirynthius heros
374 non tulit, ipse rati invigilans atque integer urbis :
375 invidisse deos tantum maris aequor adortis
376 desertasque domos fraudataque tempore segni
377 vota patrum. Quid et ipse viris cunctantibus adsit ?
378 "O miseri quicumque tuis accessimus actis.
379 Phasin et Aeeten Scythicique pericula ponti
380 redde", ait, "Aesonide : me tecum solus in aequor
381 rerum traxit amor, dum spes mihi sistere montes
382 Cyaneos vigilemque alium spoliare draconem.
383 Si sedet Aegaei scopulos habitare profundi,
384 hoc mecum Telamon peraget meus." Haec ubi dicta,
385 haud secus Aesonides monitis accensus amaris
386 quam bellator equus, longa quem frigida pace
387 terra juvat quique in laevos piger angitur orbis,
388 frena tamen dominumque vellet si Martius aures
389 clamor et obliti rursus fragor impleat aeris.
390 Tunc Argum Tiphynque vocat pelagoque parari
391 praecipitat ; petit ingenti clamore magister
392 arma viros pariter sparsosque in litore remos.
393 Exoritur novus urbe dolor planctusque per omnes
394 et facies antiqua domos : sibi moenia linqui
395 en iterum, et quando natorum pignora, gentem
396 qui recolant, qui sceptrata gerant ? Nunc triste nefandae
397 noctis opus, vidui nunc illa silentia tecti
398 saeva magis, thalamos excussaue vincla quod ausae
399 induere atque iterum tales admittere curas.
400 Ipsa quoque Hypsipyle subitos per litora cursus
401 ut vidit totaque viros decedere Lemno,
402 ingemit et tali compellat Iasona questu :
403 "Jamne placet primo deducere vela sereno,
404 carius o mihi patre caput ? Modo saeva quierunt
405 aequora. Sic portus fugeret ratis, aspera si te
406 Plias in adversae tenuisset litore Thraces.
407 Ergo moras caelo cursumque tenentibus undis
408 debuimus ? " Dixit lacrimans haesuraque caro
409 dona duci promit chlamydem textosque labores.
410 Illic servati genitoris conscia sacra
411 pressit acu currusque pios : stant saeva paventum
412 agmina dantque locum ; viridi circum horrida tela
413 silva tremat ; mediis refugit pater anxius umbris.

414 Ars et frondosae raptus expresserat Idae
415 illustremque fugam pueri ; mox aethere laetus
416 adstabat mensis, quin et Jovis Armiger ipse
417 accipit a Phrygio jam pocula blanda ministro.
418 Tunc ensem notumque ferens insigne Thoantis
419 "Accipe", ait, "bellis mediaeque ut pulvere pugnae
420 sit comes, Aetnaei genitor quae flammea gessit
421 dona dei, nunc digna tuis adjungier armis.
422 I memor, i, terrae quae vos amplexa quieto
423 prima sinu, refer et domitis a Colchidos oris
424 vela, per hunc utero quem linguis Iasona nostro."
425 Sic ait Haemonii labens in colla mariti.
426 Nec minus Orphea tristis cervice tuaque,
427 Aeacide, et gemino conjunx a Castore pendet.
428 Has inter lacrimas legitur piger uncus harenis.
429 Jam remi rapuere ratem, jam flamina portant ;
430 spumea subsequitur fugientis semita clavi.
431 Tunc tenuis Lemnos crescitque Electria tellus
432 Threiciis arcana sacris. Hic numinis ingens
433 horror et incautis decreta piacula linguis.
434 Hanc demissa Jovi non unquam laedere fluctu
435 audet hiems. Sponte ipse deus tunc asperat undas
436 cum vetat infidos sua litora tangere nautas.
437 Obvius at Minyas terris adytisque sacerdos
438 excipit, hospitibus reserans secreta Thyotes.
439 Hactenus in populos, vates, Samothraca, diemque
440 missa : mane, sacrisque metum servemus opertis.
441 Illi sole novo laeti plenique deorum
442 considunt transtris. Jam quas praeviderat urbes
443 navita condebat proraeque accesserat Imbros
444 et sol aetherias medius conscenderat arces.
445 Thessala Dardaniis tunc primum puppis harenis
446 adpulit et fatis Sigeo litore sedit.
447 Desiliunt : pars hinc levibus candentia velis
448 castra levat, tracto pars frangit adorea saxo
449 farra, citum strictis alius de cautibus ignem
450 ostendit foliis et sulphure pascit amico.
451 Alcides Telamonque comes dum litora blando
452 anfractu sinuosa legunt, vox accidit aures
453 flebile succedens ceu fracta remurmurat unda.
454 Attoniti pressere gradum vacuumque secuntur
455 vocis iter. Jam certa sonat desertaque durae
456 virgo neci quem non hominum superumque vocabat ?
457 Acrius hoc instare viri succurrere certi,
458 qualiter, implevit gemitu cum taurus acerbo
459 avia frangentem morsu super alta leonem
460 terga ferens, coit e sparso concita mapali
461 agrestum manus et caeco clamore coloni.
462 Constitit Alcides visuque enisus in alta
463 rupe truces manicas defectaque virginis ora
464 cernit et ad primos turgentia lumina fluctus,
465 exanimum veluti multa tamen arte coactum
466 maeret ebur, Pariusve notas et nomina sumit
467 cum lapis aut liquidi referunt miranda colores.
468 Ductor ait : "Quod, virgo, tibi nomenque genusque,
469 quae sors ista, doce, tendunt cur vincula palmas ? "
470 Illa tremens tristisque oculos dejecta pudore
471 "Non ego digna malis", inquit ; "suprema parentum

472 dona vides, ostro scopulos auroque frequentes.
473 Nos Ili felix quondam genus, invida donec
474 Laomedonteos fugeret fortuna penates.
475 Principio morbi caeloque exacta sereno
476 temperies, arsere rogis certantibus agri.
477 Tum subitus fragor et fluctus Idaea moventes
478 cum stabulis nemora : ecce repens consurgere ponto
479 belua, monstrum ingens ; hanc tu nec montibus ullis
480 nec nostro metire mari. Primaeva furenti
481 huic manus amplexus inter planctusque parentum
482 deditur. Hoc sortes, hoc corniger imperat Hammon,
483 virgineam damnare animam sortitaque Lethen
484 corpora ; crudelis scopulis me destinat urna.
485 Verum o jam redeunt Phrygibus si numina tuque
486 ille ades auguriis promissae et sorte deorum,
487 jam cui candentes votivo in gramine pascit
488 cornipedes genitor, nostrae stata dona salutis,
489 adnue meque, precor, defectaque Pergama monstris
490 eripe, namque potes. Neque enim tam lata videbam
491 pectora Neptunus muros cum jungeret astris,
492 nec tales umeros pharetramque gerebat Apollo."
493 Auxerat haec locus et facies maestissima capti
494 litoris et tumuli caelumque quod incubat urbi,
495 quale laborantis Nemees iter aut Erymanthi
496 vidit et infectae miseratus flumina Lernaee.
497 Dat procul interea signum Neptunus, et una
498 monstriferi mugire sinus Sigeaeque pestis
499 adglomerare fretum, cujus stellantia glauca
500 lumina nube tremunt atque ordine curva trisulco
501 fulmineus quatit ora fragor pelagoque remenso
502 cauda redit passosque sinus rapit ardua cervix.
503 Illam incumbentem per mille volumina pontus
504 prosequitur lateri adsultans trepidisque ruentem
505 litoribus sua cogit hiems. Non fluctibus aequis
506 nubiferi venit unda Noti, non Africus alto
507 tantus ovat patriisque manus cum plenus habenis
508 Orion bipedum flatu mare tollit equorum.
509 Ecce ducem placitae furiis crudescere pugnae
510 surgentemque toris stupet immanemque paratu
511 Aeacides pulsantque graves ut terga pharetrae.
512 Ille patrem pelagique deos suaque arma precatus
513 insiluit scopulo motumque e sedibus aequor
514 horruit et celsi spatiosa volumina monstri.
515 Qualis ubi a gelidi Boreas convallibus Hebri
516 tollitur et volucres Rhipaea per ardua nubes
517 praecipitat (piceo nox tum tenet omnia caelo),
518 illa simul molem horrificam scopulosaque terga
519 promovet ingentique umbra subit ; intremere Ide
520 illidique ratis pronaeque recumbere turres.
521 Occupat Alcides arcu totaque pharetrae
522 nube premit. Non illa magis quam sede movetur
523 magnus Eryx deferre velint quem vallibus imbres.
524 Jam brevis et telo volucris non utilis aer.
525 Tum vero fremitus vanique insania coepti
526 et tacitus pudor et rursus pallescere virgo.
527 Proicit arma manu scopulos vicinaque saxa
528 respicit et quantum ventis adjuta vetustas
529 impulerat pontive fragor, tantum abscidit imi

530 concutiens a sede maris. Jamque agmine toto
531 pistris adest miseraeque inhiat jam proxima praedae.
532 Stat mediis elatus aquis recipitque ruentem
533 Alcides saxoque prior surgentia colla
534 obruit ; hinc vastos nodosi roboris ictus
535 congeminat. Fluctus defertur bellua in imos
536 jam totis resoluta vadis ; Idaeaque mater
537 et chorus et summis ulularunt collibus Amnes.
538 Protinus e speculis et opaca valle resurgunt
539 pastores magnisque petunt clamoribus urbem.
540 Nuntius hinc socios Telamon vocat, ac simul ipsi
541 horrescunt subitoque vident in sanguine puppem.
542 Nec minus in scopulos crudique cacumina saxi
543 emicat Alcides vinclisque tenentibus aufert
544 virgineas de rupe manus aptatque superbis
545 arma umeris. Regem inde petens superabat ovanti
546 litora tuta gradu, qualis per pascua victor
547 ingreditur, tum colla tumens, tum celsior armos,
548 taurus, ubi adsueti pecoris stabula alta revisit
549 et patrium nemus et bello quos ultus amores.
550 Obvia cui contra longis emissa tenebris
551 turba Phrygum parvumque trahens cum conjugate natum
552 Laomedon ; jam maestus equos, jam debita posci
553 dona gemit. Pars acrii fastigia muri
554 cingit et ignotis juvenem mirantur in armis.
555 Illum torva tuens atque acri lubricus astu
556 rex subit et patrio fatur male laetus amore :
557 "Maxime Graiugenum, quem non Sigea petentem
558 litora nec nostrae miserantem funera Trojae
559 adpulit his Fors ipsa locis, si vera parentem
560 fama Jovem summique tibi genus esse Tonantis,
561 noster ades junctisque venis : sator unus et idem
562 stirpis honos, quamquam longis disjungimur oris.
563 Quot mihi post lacrimas, post quanta piacula patrum
564 serus ades, quam parva tuis jam gloria factis !
565 Verum age nunc socios fraternis moenibus infer
566 crastina lux bijuges stabulis ostendet apertis."
567 Dixerat haec tacitusque dolos dirumque volutat
568 corde nefas, clausum ut thalamis somnoque gravatum
569 immolet et rapta ludat responsa pharetra
570 (namque bis Herculeis deberi Pergama telis
571 audierat). Priami sed quis jam vertere regnis
572 fata queat ? Manet immotis nox turica lustris
573 et genus Aeneadum et Trojae melioris honores.
574 "Nos" ait "ad Scythici" Tirynthius "ostia ponti
575 raptat iter ; mox huc vestras revehemur ad oras
576 donaque dicta feram." Tum vero plura vocatis
577 adnuit ille deis. Promissa infida tyranni
578 jam Phryges et miserae flebant discrimina Trojae.
579 Panditur hinc totis in noctem carbasus alis
580 litora et veteris tumulos praelabatur Ili
581 Dardaniumque patrem ; vigili simul omnia ludo
582 festa vident ; hinc unda, sacris hinc ignibus Ide
583 vibrat et horrissonae respondent Gargara buxo.
584 Inde ubi jam medii tenuere silentia ponti
585 stridentesque juvant aerae, Phryxica subibant
586 aequora et angustas quondam sine nomine fauces.
587 Ecce autem prima volucrem sub luce dehiscens

588 terruit unda ratem, vittataque constitit Helle,
589 jam Panopes Thetidisque soror jamque aurea laeva
590 sceptrata tenens. Dum sternit aquas proceresque ducemque
591 aspicit et placidis compellat Iasona dictis :
592 "Te quoque ab Haemoniis ignota per aequora terris
593 regna infesta domo fatisque simillima nostris
594 fata ferunt ; iterum Aeolios fortuna nepotes
595 spargit et infelix Scythicum gens quaeritis amnem.
596 Vasta super tellus, longum (ne defice coeptis)
597 aequor et ipse procul, verum dabit ostia, Phasis.
598 Hic nemus arcanum geminaeque virentibus arae
599 stant tumulis ; hic prima pia sollemnia Phrixo
600 ferte manu cinerique, precor, mea reddite dicta :
601 "Non ego per Stygiae quo rere silentia ripae,
602 frater, agor ; frustra vacui scrutaris Averni,
603 care, vias ; neque enim scopulis me et fluctibus actam
604 frangit hiems : celeri extemplo subiere ruentem
605 Cymothoe Glaucusque manu ; pater ipse profundi
606 has etiam sedes, haec numine tradidit aequo
607 regna nec Inois noster sinus invidet undis."
608 Dixerat et maestos tranquilla sub aequora vultus
609 cum gemitu tulit, ut patrii rediere dolores.
610 Tum pelago vina invergens dux talibus infit :
611 "Undarum decus et gentis, Cretheia virgo,
612 pande viam cursuque tuos age, diva, secundo",
613 immittitque ratem mediasque intervolat urbes,
614 qua brevibus fuit aestus aquis Asiamque prementem
615 effugit abruptis Europa immanior oris.
616 Has etiam terras consertaque gentibus arva
617 sic pelago pulsante, reor, Neptunia quondam
618 cuspis et adversi longus labor abscidit aevi,
619 ut Siculum Libycumque latus, stupuitque fragore
620 Janus et occiduis regnator montibus Atlans.
621 Jam juga Percotes Pariumque infame fragosis
622 exsuperant Pityamque vadis, transmissaque puppi
623 Lampsacus Ogygii quam nec trieterica Bacchi
624 sacra neque arcanis Phrygius furor invehit antris
625 sed suus in Venerem raptat deus. Illius aras
626 urbe super celsique vident velamina templi.
627 Rarior hinc tellus atque ingens undique caelum
628 rursus et incipiens alium prospectus in orbem.
629 Terra sinu medio Pontum jacet inter et Hellen
630 ceu fundo prolata maris ; namque improba caecis
631 intulit arva vadis longoque per aequora dorso
632 litus agit : tenet hinc veterem confinibus oris
633 pars Phrygiam, pars discreti juga pinea montis.
634 Nec procul ad tenuis surgit confinia ponti
635 urbs placidis demissa jugis ; rex divitis agri
636 Cyzicus. Haemoniae qui tum nova signa carinae
637 ut videt, ipse ultro primas procurrit ad undas
638 miraturque viros dextramque amplexus et haerens
639 incipit : "O terris nunc primum cognita nostris
640 Emathiae manus et fama mihi major imago,
641 non tamen haec adeo semota neque ardua tellus
642 regnaque jam populis inter via lucis eoae,
643 cum tales intrasse duces, tot robora cerno.
644 Nam licet hinc saevas tellus alat horrida gentes
645 meque fremens tumido circumfluat ore Propontis,

646 vestra fides ritusque pares et mitia cultu
 647 his etiam mihi corda locis ; procul effera virtus
 648 Bebrycis et Scythici procul inclementia sacri."
 649 Sic memorat laetosque rapit. Simul hospita pandi
 650 tecta jubet templisque sacros largitur honores.
 651 Stant gemmis auroque tori mensaeque paratu
 652 regifico centumque pares primaeva ministri
 653 corpora ; pars epulas manibus, pars aurea gestant
 654 pocula bellorum casus expressa recentum.
 655 Atque ea prima duci porgens carchesia Graio
 656 Cyzicus "Hic portus", inquit, "mihi territat hostis,
 657 has acies sub nocte refert, haec versa Pelasgum
 658 terga vides, meus hic ratibus qui pascitur ignis."
 659 Subicit Aesonides : "Utinam nunc ira Pelasgos
 660 adferat et solitis temptet concurrere furtis
 661 cunctaque se ratibus fundat manus : arma videbis
 662 hospita nec post hanc ultra tibi proelia noctem."
 663 Sic ait hasque inter variis nox plurima dictis
 664 rapta vices nec non simili lux postera tractu.

AR_3 v.1 Tertia jam gelidas Tithonia solverat umbras
 2 exueratque polum, Tiphyn placida alta vocabant.
 3 It tectis Argoa manus, simul urbe profusi
 4 Aenidae caris socium digressibus haerent.
 5 Dant Cererem lectumque pecus nec palmite Bacchum
 6 Bithyno Phrygiove satum, sed quem sua noto
 7 colle per angustae Lesbos freta suggerit Helles.
 8 Ipse agit Aesonidae junctos ad litora gressus
 9 Cyzicus abscessu lacrimans oneratque superbis
 10 quas dabat et picto Clite variaverat auro.
 11 Tum galeam et patriae telum insuperabile dextrae
 12 addidit : ipse ducis pateras et Thessala contra
 13 frena capit manibusque datis junxere penates.
 14 Tu mihi nunc causas infandaque proelia, Clio,
 15 pande virum ; tibi enim superum data, virgo, facultas
 16 nosse animos rerumque vias. Cur talia passus
 17 arma, quid hospitiiis junctas concurrere dextras
 18 Juppiter ? Unde tubae nocturnaque movit Erinys ?
 19 Dindyma sanguineis famulum bacchata lacertis
 20 dum volucris quatit asper equo silvasque fatigat
 21 Cyzicus, ingenti praedae deceptus amore
 22 adsuetum Phrygias dominam vectare per urbes
 23 oppressit jaculo redeuntem ad frena leonem.
 24 Et tunc ille juba captivaque postibus ora
 25 muneribus primas conjunx Percosia vestes
 26 imposuit, spolium infelix divaeque pudendum.
 27 Quae postquam Haemoniam tantae non immemor irae
 28 aerisono de monte ratem praefixaque regum
 29 scuta videt, nova monstra viro, nova funera volvit,
 30 ut socias in nocte manus utque impia bella
 31 conserat et saevis erroribus implicet urbem.
 32 Nox erat et leni canebant aequora sulco
 33 et jam prona leves spargebant sidera somnos.
 34 Aura vehit ; religant tonsas veloque Procneson
 35 et te jam medio flaventem, Rhyndace, ponto

36 spumosumque legunt fracta Scylaceon ab unda.
 37 Ipse diem longe solisque cubilia Tiphys
 38 consulit, ipse ratem vento stellisque ministrat.
 39 Atque illum non ante sopor luctamine tanto
 40 lenit agens divum imperiis ; cadit inscia clavo
 41 dextera demittitque oculos, solataque puppis
 42 turbine flectit iter portuque refertur amico.
 43 Ut notis adlapsa vadis, dant aethere longo
 44 signa tubae vox et mediis emissa tenebris :
 45 "Hostis habet portus, soliti rediere Pelasgi."
 46 Rupta quies ; deus ancipitem lymphaverat urbem
 47 Mygdoniae Pan jussa ferens saevissima matris,
 48 Pan nemorum bellique potens, quem lucis ad horas
 49 antra tenent ; patet ad medias per devia noctes
 50 saetigerum latus et torvae coma sibila frontis.
 51 Vox omnes super una tubas, qua conus et enses,
 52 qua trepidis auriga rotis nocturnaue muris
 53 claustra cadunt, talesque metus non Martia cassis
 54 Eumenidumque comae, non tristis ab aegide Gorgo
 55 sparserit aut tantis aciem raptaverit umbris.
 56 Ludus et ille deo, pavidum praesepibus aufert
 57 cum pecus et profugi sternunt dumeta juvenci.
 58 Ilicet ad regem clamor ruit. Exsilit altis
 59 somnia dira toris simulacraque pallida linquens
 60 Cyzicus. Ecce super foribus Bellona reclusis
 61 nuda latus passuque movens orichalca sonoro
 62 adstitit et triplici pulsans fastigia crista
 63 inde ciere virum. Sequitur per moenia demens
 64 ille deam et fatis extrema in proelia tendit
 65 qualis in Alciden et Thesea Rhoecus iniqui
 66 nube meri geminam Pholoen majoraque cernens
 67 antra ruit, qualisque redit venatibus actis
 68 lustra pater Triviamque canens umeroque Learchum
 69 advehit, at miserae declinant lumina Thebae.
 70 Jamque adeo nec porta ducern nec pone moratur
 71 excubias sortita manus, quae prima furenti
 72 advolat ; hinc alii subeunt, ut proxima quaeque
 73 intremuit domus et motus accepit inanes.
 74 At Minyas anceps fixit pavor ; aegra virorum
 75 corda labant, nec quae regio aut discrimina cernunt,
 76 cur galeae clipeique micent, num pervigil armis
 77 donec et hasta volans immani turbine transtris
 78 insonuit monuitque ratem rapere obvia caeca
 79 arma manu. Princeps galeam constringit Iason
 80 vociferans : "Primam hanc nati, pater, accipe pugnam,
 81 vosque, viri, optatos huc adfore credite Colchos."
 82 Bistonas in medios ceu Martius exsilit astris
 83 currus ubi ingentes animae clamorque tubaeque
 84 sanguineae juvere deum, non segnius ille
 85 occupat arva furens ; sequitur vis omnis Achivum.
 86 Adglomerant latera et densis thoracibus horrens
 87 stat manus aegisono quam nec fera pectore virgo
 88 dispulerit nec dextra Jovis Terrorque Pavorque,
 89 Martis equi. Sic contextis umbonibus urgent
 90 caeruleo veluti cum Juppiter agmine nubem
 91 constituit ; certant Zephyri frustraue rigentem
 92 pulsat utrimque Notus ; pendent mortalia longo
 93 corda metu, quibus illa fretis, quibus incidat arvis.

94 Hinc manus infelix clamore impellere magno
95 saxa facesque atras et tortae pondera fundae ;
96 fert sonitus immota phalanx irasque retentant
97 congeries dum prima fluat. Stellantia Mopsus
98 tegmina et ingentem Corythi notat Eurytus umbram.
99 Restitit ille gradu seseque a lumine ferri
100 sustinuit, praeceps subitum ceu pastor ad amnem,
101 spumantem nimbis fluctuque arbusta ruentem.
102 At Tydeus "En intentis quem viribus", inquit,
103 "opperiar manibusque dari quem comminus optem :
104 quo steteris moriere loco." Subit ilia cuspis
105 Olenii ; dedit ille sonum compressaque mandens
106 aequora purpuream singultibus expulit hastam.
107 Ac velut in medio rupes latet horrida ponto
108 quam super ignari nunquam rexere magistri
109 praecipites impune rates, sic agmine caeco
110 incurrit strictis manus ensibus. Occubat Iron
111 et Cotys et Pyrno melior genitore Bienor.
112 At magis interea diverso turbida motu
113 urbs agitur. Genyso conjunx amoverat arma ;
114 ast illi subitus ventis vivoque reluxit
115 torre focus : telis gaudes, miserande, repertis.
116 Linqvit et undantes mensas infectaque pernox
117 sacra Medon ; chlamys imbelli circumvenit ostro
118 torta manum strictoque vias praefulgurat ense.
119 Talis in arma ruit nec vina dapesque remota
120 statque loco torus incolumes mansere ministri.
121 Inde vagi nec tela modis nec casibus isdem
122 conservere manu et longe jacuere perempti.
123 Ecce gravem nodis pinguique bitumine quassans
124 lampada turbata Phlegyas decurrit ab urbe.
125 Ille leves de more manus aciemque Pelasgum
126 per noctem remeasse ratus pulsumque requirens
127 saepe sibi vano Thamyrum clamore petebat
128 arduus et late fumanti nube coruscus,
129 quantus ubi immenso prospexit ab aethere Typhon
130 igne simul ventisque rubens, quem Juppiter alte
131 crine tenet (trepidant diro sub lumine puppes).
132 Tollitur hinc totusque ruit Tirynthius arcu
133 pectore certa regens adversa spicula flamma :
134 per piceos accensa globos et pectus harundo
135 per medium contenta fugit ; ruit ille comanti
136 ore facem supra majorque apparuit ignis.
137 Ambrosium Peleus, ingentem Ancaeus Echeclum
138 sternit et elatae propius succedere dextrae
139 Telecoonta sinit librataque ora securi
140 disjecit cervice tenus. Simul aspera victor
141 cingula sublustri vibrantia detrahit umbra,
142 "Has precor exuvias et opima cadavera" Nestor
143 "linquite" ait ; "ferro potius mihi dextera, ferro
144 navet opus," presumque manu detruncat Amastrum
145 diversasque simul socios invadere turmas
146 admonuit. Pergunt rupta testudine fusi
147 qua tenebrae campique ferunt. Gravis invenit Ochum
148 Phlias et trepido Pollux impingitur Hebro.
149 Ipse super vultus taboque natantia terga
150 dux campi Martisque potens, ut caeca profundo
151 currit hiems, Zelyn et Bronten Abarinque relinquit

152 semineces : Glaucum sequitur Glaucumque ruentem
 153 occupat et jugulo vulnus molitur aperto.
 154 Ille manu contra telum tenet ultima frustra
 155 verba ciens fixamque videt decrescere cornum.
 156 Hinc Halyn, hinc rigido transcurrens demetit ense
 157 Protin et insignem cithara cantuque fluenti
 158 Dorcea, qui dulci festis adsistere mensis
 159 pectine Bistoniae magnum post ausus alumnum.
 160 Nec pharetram aut acres ultra Tirynthius arcus
 161 exercet, socia sed disicit agmina clava.
 162 Ac veluti magna juvenum cum densa securi
 163 silva labat cuneisque gemit grave robur adactis
 164 jamque abies piceaeque ruunt, sic dura sub ictu
 165 ossa virum malaeque sonant sparsusque cerebro
 166 albet ager. Levis ante pedes subsederat Hidmon ;
 167 occupat os barbamque viri clavamque superne
 168 inrotat "Occumbes en nunc", ait, "Herculis armis,
 169 donum ingens semperque tuis mirabile fatis."
 170 Horruit ille cadens nomenque agnovit amicum
 171 primus et ignaris dirum scelus attulit umbris.
 172 Nec tibi Thessalicos tunc profuit, Ornyte, reges
 173 hospitiiis aut mente moras fovisse benigna
 174 et dapibus sacrasse diem ; procul advenit Idmon
 175 oblatumque ferit, galeam cristasque rubentes,
 176 heu tua dona, gerens. Quem te qualemque videbit
 177 attonitus, Crenaeae, parens. En frigidus orbis
 178 purpureos jam somnus obit, jam candor et anni
 179 deficiunt vitaeque fugit decus omne soluta :
 180 desere nunc nemus et Nympharum durus amores.
 181 At diversa Sagen turbantem fallere nervo
 182 tum primum puer ausus Hylas (spes maxima bellis
 183 pulcher Hylas, si fata sinant, si prospera Juno)
 184 prostravitque virum celeri per pectora telo.
 185 Accessere, nefas, tenebris fallacibus acti
 186 Tyndaridae in sese : Castor prius ibat in ictus
 187 nescius ; ast illos nova lux subitusque diremit
 188 frontis apex. Tum Castor Ityn, qua caerulus ambit
 189 balteus et gemini committunt ora dracones,
 190 frater Hagen Thapsumque securigerumque Nealcen
 191 transigit et Canthi pallentem vulnere Cydrum.
 192 Torserat hic totis conisus viribus hastam
 193 venatori Erymo, brevis hanc sed fata ferentem
 194 prodidit et piceo comitem miserata refulsit
 195 Luna polo ; cessere jubae raptumque per auras
 196 vulnus et extrema sonuit cita cuspide cassis.
 197 Nisaeum Telamon et Ophelten vana sonantem
 198 per clipei cedentis opus cratemque trilicem,
 199 qua stomachi secreta, ferit laetusque profatur :
 200 "Di, precor : hunc regem aut aequae delegerit alta
 201 fors mihi gente satum magnusque et flebilis urbi
 202 conciderit." Super addit Aren fratremque Melanthum
 203 Phoeaque Oleniden, Lelegum qui pulsus ab oris
 204 regis amicitiam et famuli propioris honores
 205 (qua pollens non arte ?) tulit. Nox alta cadentum
 206 ingentes donec sonitus augetque ruinas :
 207 ut magis Inarime, magis ut mugitor anhelat
 208 Vesbius, attonitas acer cum suscitatur urbes,
 209 sic pugnae crebrescit opus ; neque enim ignea cedunt

210 astra loco : lentis haeret nox conscia bigis.
 211 Perge age Tartareae mecum simul omnia noctis,
 212 Musa, sequi. Trepidam Phaethon adflavit ab alto
 213 Tisiphonen graviorque locos jam luce propinqua
 214 umbra premit ; non signa virum, non funera cernunt
 215 et rabie magis ora calent. Vos prodite, divae,
 216 Eumenidum noctisque globos vatique patescat
 217 armorum fragor et tepidi singultibus agri
 218 labentum atque acti Minyis per Litora manes.
 219 Cyzicus hic aciem vanis discursibus implet
 220 fata trahens ; jam pulsa sibi cessisse Pelasgum
 221 agmina, jam passim vacuos disjecta per agros
 222 credit ovans ; tales auditus, ea gaudia fingit
 223 ira deum. Fundo veluti cum Coeus in imo
 224 vincla Jovis fractoque trahens adamante catenas
 225 Saturnum Tityumque vocat spemque aetheris amens
 226 concipit, ast illum fluviis et nocte remensa
 227 tergeminus canis et sparsae juba reppulit Hydrae.
 228 Saevit acerba fremens tardumque a moenibus agmen
 229 increpitat : "Nunquamne dolor virtusve subibit
 230 nil ausas sine rege manus ? At barbara buxus
 231 si vocet et motis ululantia Dindyma sacris,
 232 tunc ensis placeatque furor, modo tela sacerdos
 233 porrigat, et jussa sanguis exuberet ulna."
 234 Talibus insultans jamdudum numine divae
 235 deficit, infracti languescunt frigore cursus,
 236 corda pavent, audit fremitus irasque leonum
 237 cornuaque et motas videt inter nubila turres.
 238 Tunc gravis et certo tendens stridore per umbram
 239 Aesonii venit hasta ducis latumque sub imo
 240 pectore rumpit iter. Quam nunc incognita vellet
 241 lustra sibi nullosque datos venatibus annos.
 242 Talia magnanimi diverso turbine fundunt
 243 tela viri sonitusque pedum suspectaque motu
 244 explorant ; prensant socios vocemque reposcunt.
 245 Quod si tanta lues seros durasset in ortus,
 246 extinctum genus et solas per moenia matres
 247 vidisset stratamque dies in litore gentem.
 248 Tum pater omnipotens tempus jam rege perempto
 249 flectere fata ratus miserisque abrumpere pugnas,
 250 supremam celeravit opem nutuque sereno
 251 intonuit quem Nocte satae, quem turbidus horret
 252 Armipotens : tunc porta trucis coit infera leti.
 253 Continuo dant terga metu versique per agros
 254 diffugiunt, quae sola salus ; nec terga ruentum
 255 mens Minyis conversa sequi : stetit anxia virtus.
 256 Ecce autem primos jam spargere lumine portus
 257 orta dies notaeque, nefas, albescere turres
 258 "Di maris", attonito conclamat ab agmine Tiphus,
 259 "ut mea fatali damnastis pectora somno.
 260 Heu socii quantis complerunt litora monstris."
 261 Illi autem neque adhuc gemitus neque conscia facti
 262 ora levant ; tenet exsanguis rigor horridus artus,
 263 ceu pavet ad crines et tristia Pentheos ora
 264 Thyias, ubi impulsae jam se deus agmine matris
 265 abstulit et caesi vanescunt cornua tauri.
 266 Nec minus effusi grandaevum ad litora vulgus
 267 ut socias videre manus, dare versa retrorsus

268 terga metu. Dextram tendens proclamat Iason
 269 "Quos fugitis ? Vellem hac equidem me strage meosque
 270 procubuisse magis. Deus haec, deus asper utrisque
 271 implicuit. Sumus en Minyae, sumus hospita turba.
 272 Cur etiam flammis miserisque moramur honores ?"
 273 Tum super exsanguis confertae caedis acervos
 274 praecipiti plangore ruunt ; agnoscit in alta
 275 strage virum sua texta parens, sua munera conjunx.
 276 It gemitus toto sinuosa per aequora caelo.
 277 Pars tenues flatus et adhuc stridentia prensant
 278 vulnera, pars sera componunt lumina dextra.
 279 At vero in mediis exsanguis rege reperto
 280 aggeribus, tristi sileant ceu cetera planctu,
 281 sic famulum matrumque dolor, sic omnis ad unum
 282 versa manus. Circa lacrimis ac mentibus aegri
 283 stant Minyae deflentque nefas et cuspidis ictus
 284 Aesoniae sortemque ducis solantur acerbam.
 285 Ille ubi concretos pingui jam sanguine crines
 286 pallentesque genas infractaque pectore caro
 287 tela neque hesternis agnovit in hospite vultus,
 288 ingemit atque artus fatur complexus amicos :
 289 "Te tamen ignarum tanti, miserande, furoris
 290 nox habet et nullo testantem foedera questu ;
 291 at mihi luctificum venit jubar. Heu quibus adsum
 292 conloquiis, cui me hospitio Fortuna revexit !
 293 Exstinguine mea (fatis id defuit unum !)
 294 speravi te posse manu ? Talisve reliqui
 295 has ego, amice, domos ? Quod si jam bella manebant
 296 et placitum hoc superis, nonne haec mea justius issent
 297 funera ? Meque tuus melius nunc plangeret error
 298 nec Clarii nunc antra dei quercusque Tonantis
 299 arguerem ? Talesne acies, talesne triumphos
 300 sorte dabant ? Tantumque nefas mens conscia vatum
 301 conticuit, patriae exitium crudele senectae
 302 et tot acerba canens ? Heu divis visa sinistris
 303 regna mihi. Quinam reditus ! Quae me hospita tellus
 304 accipiet ? Quae non primis prohibebit harenis ?
 305 Invidere dei ne Phasidis arva remoti
 306 et Scythicas populatus opes haec rursus adirem
 307 litora neve tuos irem tunc ultor in hostes.
 308 Fas tamen est conferre genas, fas jungere tecum
 309 pectora et exsanguis miscere amplexibus artus.
 310 Vos age funereas ad litora volvite silvas
 311 et socios lustrate rogos ; date debita caesis
 312 munera quae nostro misisset Cyzicus igni."
 313 Parte alia Clite laceras super ora mariti
 314 fusa comas misera in planctus vocat agmina matrum
 315 fatur et haec : "Primis conjunx ereptus in annis
 316 cuncta trahis, necdum suboles nec gaudia de te
 317 ulla mihi, quis maesta tuos nunc, optime, casus
 318 perpeterer tenui luctum solamine fallens.
 319 Mygdonis arma patrem funestaque proelia nuper
 320 natales rapuere domos Triviaeque potentis
 321 occidit arcana genetrix absumpta sagitta :
 322 tu mihi qui conjunx pariter fraterque parensque
 323 solus et a prima fueras spes una juvena,
 324 deseris heu, totamque deus simul impulit urbem.
 325 Ast ego non media te saltem, Cyzice, vidi

326 tendentem mihi morte manus aut ulla monentis
327 verba tuli ; quin te thalamis modo questa morari
328 (heu talem) tantique metus secura recepi."
329 Illam vix gemino maerens cum Castore Pollux
330 erigit haerentem compressaque colla trahentem.
331 Interea innumeras nudatis montibus urgent
332 certatim decorantque pyras et corpora maesti
333 summa locant. Vadit sonipes cervice remissa
334 venatrix nec turba canum pecudesque morantur ;
335 inferiae, quae cuique manus, quae cura suorum,
336 quae fortuna fuit. Medio rex aggere longe
337 eminent ; hunc crebris quatiens singultibus ora
338 adlevat Aesonides celsoque reponit in ostro.
339 Dat pictas auro atque ardentes murice vestes
340 quas rapuit telis festina vocantibus Austris
341 Hypsipyle ; galeam dilectaque cingula regi
342 inicit. Ille suam vultus conversus ad urbem
343 sceptrum manu veterum retinet gestamen avorum.
344 Nam quia nec proles alius nec denique sanguis,
345 ipse decus regnique refert insigne parenti.
346 Inde ter armatos Minyis referentibus orbem
347 concussi tremuere rogi, ter inhorruit aether
348 luctificum clangente tuba ; jecere supremo
349 tum clamore faces ; regum labor omnis in auras
350 solvitur et celsis conlucent aequora flammis.
351 Scilicet haec illo juvenem populosque manebant
352 tempore, Peliacis caderet cum montibus arbor.
353 Hoc volucrumque minae praesagaque fulmina longo
354 acta mari tulerant. Sed quis non prima refellat
355 monstra deum longosque sibi non auguret annos ?
356 Jamque solutus honos cineri, jam passibus aegris
357 dilapsae cum prole nurus, tandemque quiescunt
358 dissona pervigili planctu vada, qualiter Arctos
359 ad patrias avibus medio jam vere revectis
360 Memphis et aprici statio silet annua Nili.
361 At non inde dies nec quae magis aspera curis
362 nox Minyas tanta caesorum ab imagine solvit.
363 Bis Zephyri jam vela vocant ; fiducia maestis
364 nulla viris, aegra adsidue mens carpitur aestu,
365 necdum omnes lacrimas atque omnia reddita caesis
366 justa putant ; patria ex oculis acerque laborum
367 pulsus amor segnique juvat frigescere luctu.
368 Ipse etiam Aesonides, quamquam tristissima rerum
369 castiganda duci vultuque premenda sereno,
370 dulcibus indulget lacrimis aperitque dolorem.
371 Tum secreta trahens Phoebeum ad litora Mopsum
372 "Quaenam", ait, "ista lues, aut quae sententia divum ?
373 Decretusne venit fato pavor an sibi nectunt
374 corda moras ? Cur immemores famaеque larisque
375 angimur ? Aut pariet quemnam haec ignavia finem ? "
376 "Dicam" ait "ac penitus causas labemque docebo"
377 Mopsus, et astra tuens "Non si mortalia membra
378 sortitusque breves et parvi tempora fati
379 perpetimur, socius superi quondam ignis Olympi,
380 fas ideo miscere neces ferroque morantes
381 exigere hinc animas redituraque semina caelo.
382 Quippe nec in ventos nec in ultima solvimur ossa :
383 ira manet duratque dolor. Cum deinde tremendi

384 ad solium venire Jovis questuque nefandam
385 edocuere necem, patet ollis janua leti
386 atque iterum remeare licet ; comes una sororum
387 additur et pariter terras atque aequora lustrant.
388 Quisque suos sontes inimicaque pectora poenis
389 implicat et varia meritos formidine pulsant.
390 At quibus invito maduerunt sanguine dextrae,
391 si fors saeva tulit miseros sed proxima culpa,
392 hos variis mens ipsa modis agit et sua carpunt
393 facta viros : resides et jam nil amplius ausi
394 in lacrimas humilesque metus aegramque fatiscunt
395 segnitiam, quos ecce vides. Sed nostra requiret
396 cura viam. Memori jam pridem cognita mente
397 est procul ad Stygiae devexa silentia noctis
398 Cimmerium domus et superis incognita tellus,
399 caeruleo tenebrosa situ, quo flammea nunquam
400 Sol juga sidereos nec mittit Juppiter annos.
401 Stant tacitae frondes immotaque silva comanti
402 horret querna jugo ; specus umbrarumque meatus
403 subter et Oceani praeceps fragor arvaque nigro
404 vasta metu et subitae post longa silentia voces.
405 Ensifer hic atraque sedens in veste Celaeneus
406 insontes errore luit culpamque remittens
407 carmina turbatos volvit placantia manes.
408 Ille mihi quae danda forent lustramina caesis
409 prodidit, ille volens Erebum tenebrasque retexit.
410 Ergo ubi puniceas oriens accenderit undas
411 tu socios adhibe sacris armentaue magnis
412 bina deis ; me jam coetus accedere vestros
413 haud fas interea, donec lustralia pernox
414 vota fero. Movet en gelidos Latonia currus :
415 flecte gradum, placitis sileant age litora coeptis."
416 Jamque sopor mediis tellurem presserat horis
417 et circum tacito volitabant somnia mundo,
418 cum vigil arcani speculatus tempora sacri
419 Ampycides petit adversis Aesepia silvis
420 flumina et aequoreas pariter decurrit ad undas.
421 Hic sale purpureo vivaque nitentia lympha
422 membra novat seque horrificis accommodat actis.
423 Tempora tum vittis et supplice castus oliva
424 implicat et stricto designat litora ferro ;
425 circum humiles aras ignotaque nomina divum
426 instituit silvaque super contristat opaca
427 utque metum numenque loco sacramque quietem
428 addidit, ardenti nitidum jubar evocat alto.
429 Atque Argoa manus variis insignis in armis
430 ibat agens lectas aurata fronte bidentes.
431 Delius hic longe candenti veste sacerdos
432 occurrit ramoque vocat ; jamque ipse recenti
433 stat tumulo placida transmittens agmina lauro.
434 Ducit et ad fluvios ac vincula solvebat monstrat
435 prima pedum glaucasque comis praetexere frondes
436 imperat, hinc alte Phoebi surgentis ad orbem
437 ferre manus totisque simul procumbere campis.
438 Tunc piceae mactantur oves prosectaque partim
439 per medios Mopsus, partim gerit obvius Idmon.
440 Ter tacitos egere gradus, ter tristia tangens
441 arma simul vestesque virum lustramina ponto

442 pone jacit ; rapidis adolentur cetera flammis.
 443 Quin etiam truncas nemorum effigiesque virorum
 444 rite locat quercus simulataque subligat arma.
 445 Huc Stygias transire minas iramque severi
 446 agminis, his orat vigilas incumbere curas
 447 atque ita lustrifico cantu vocat : "Ite, perempti,
 448 ac memores abolete animas ; sint otia vobis,
 449 sit Stygiae jam sedis amor ; procul agmine nostro
 450 et procul este mari cunctisque absistite bellis.
 451 Vos ego nec Graias unquam contendere ad urbes
 452 nec triviis ululare velim pecorique satisque
 453 nullae adeo pestes nec luctifer ingruat annus
 454 nec populi nostrive luant ea facta minores."
 455 Dixerat et summas frondentibus intulit aris
 456 libavitque dapes placidi quas protinus angues,
 457 umbrarum famuli, linguis rapuere coruscis.
 458 Continuo puppem petere et considerare transtris
 459 imperat Ampycides nec visum vertere terrae ;
 460 exciderint quae gesta manu, quae debita fatis.
 461 Illi alacres pars arma locant, pars ardua summis
 462 insternunt tabulata toris oriturque trementum
 463 remorum sonus et laetae concordia vocis.
 464 Juppiter urgentem ceu summa Ceraunia nubem
 465 cum pepulit movitque jugis, fulsere repente
 466 et nemora et scopuli nitidusque reducit aether,
 467 sic animi rediere viris jamque ipse magister
 468 nutat ab arce ratis remisque obsistere tendit.
 469 Instaurant primi certamina liber amictu
 470 Eurytus et dictis Talai non territus Idas ;
 471 inde alii increpitant atque aequora pectore tollunt.
 472 Par gemitu pulsuque labor versumque vicissim
 473 mittitur in puppem remo mare. Laetus et ipse
 474 Alcides "Quisnam hos vocat in certamina fluctus ? "
 475 dixit et intortis adsurgens arduus undis
 476 percussit subito deceptum fragmine pectus
 477 atque in terga ruens Talaum fortemque Eriboten
 478 et longe tantae securum Amphiona molis
 479 obruit inque tuo posuit caput, Iphite, transtro.
 480 Jam summas caeli Phoebus candentior arces
 481 vicerat et longas medius revocaverat umbras ;
 482 tardior hinc cessante viro quae proxima Tiphys
 483 litora quosque dabat densa trabe Mysia montes
 484 advehitur. Petit excelsas Tirynthius ornos ;
 485 haeret Hylas lateri passusque moratur iniquos.
 486 Illum ubi Juno poli summo de vertice puppem
 487 deseruisse videt, tempus rata diva nocendi
 488 Pallada consortem curis cursusque regentem,
 489 nequa inde inceptis fieret mora, fallere primam
 490 molitur caroque dolis avertere fratri.
 491 Tum sic adloquitur : "Procerum vi pulsus iniqua
 492 germanique manu (repetis quo crimine) Perses
 493 barbaricas jam movit opes Hyrcanaeque signa.
 494 Aeetes contra thalamis et virgine pacta
 495 conciliat reges Scythicos primusque coacta
 496 advehit Albana Styri gener agmina porta,
 497 bellum ingens, atque ipse citis Gradivus habenis
 498 fundit equos. Viden Arctoo de cardine quanta
 499 tollat se nubes atque aequore pendeat atro ?

500 Corripe prima vias ; finem cum Phasidis alti
 501 transierit Perses aciemque admoverit urbi,
 502 coepta refer paulumque moras et foedera nocte
 503 consiliis atque arte tua. Sponde adfore reges
 504 dis genitos, quis arma volens, quis agmina jungat."
 505 At virgo, quamquam insidias aestusque novercae
 506 sentiat et blandos quaerentem fingere vultus,
 507 obsequitur tamen et jussas petit ocuis oras.
 508 Ingemuit Juno tandemque silentia rumpit :
 509 "En labor, en odiis caput insuperabile nostris,
 510 quam Nemeen tot fessa minis quae belua Lernae
 511 experiar ? Phrygiis ultro concurrere monstris
 512 nempe virum et pulso reserantem Pergama ponto
 513 vidimus. En ego nunc regum soror, et mihi gentis
 514 ullus honos ? Jam tum indecores jussaeque dolorum
 515 primitiae et tenero superati protinus angues.
 516 Debueram nullos juveni jam quaerere casus
 517 victa nec ad tales forsitan descendere pugnas.
 518 Verum animis insiste tuis actumque per omnem
 519 tende, pudor ; mox et Furias Ditemque movebo."
 520 Haec ait et pariter laevi juga pinea montis
 521 respicit ac pulchro venantes agmine Nymphas,
 522 undarum nemorumque decus. Levis omnibus arcus
 523 et manicae virides et stricta myrtus habena,
 524 summo palla genu ; tenui vagus innatat aura
 525 crinis ad obscurae decurrens cingula mammae.
 526 Ipsa citatarum tellus pede plausa sororum
 527 personat et teneris summittit gramina plantis.
 528 E quibus Herculeo Dryope percussa fragore,
 529 cum fugerent jam tela ferae, processerat ultra
 530 turbatum visura nemus, fontemque petebat
 531 rursus et attonitos referebat ab Hercule vultus.
 532 Hanc delapsa polo piceaeque adclinis opacae
 533 Juno vocat prensaue manu sic blanda profatur :
 534 "Quem tibi conjugio tot dedignata dicavi,
 535 Nympha, procos, en Haemonia puer adpulit alno,
 536 clarus Hylas, saltusque tuos montesque pererrat.
 537 Vidistis roseis haec per loca Bacchus habenis
 538 cum domitas acies et eoi fercula regni
 539 duceret ac rursus thiasos et sacra moventem :
 540 hunc tibi vel posito venantem pectine Phoebum
 541 crede dari. Quae spes nymphis aufertur Achaeis,
 542 praereptum quanto proles Boebeia questu
 543 audiet et flavi quam tristis nata Lycormae ! "
 544 Sic ait et celerem frondosa per avia cervum
 545 suscitac ac juveni sublimem cornibus offert.
 546 Ille animos tardusque fugae longumque resistens
 547 sollicitat suadetque pari contendere cursu.
 548 Credit Hylas praedaeque ferox ardore propinqua
 549 insequitur ; simul Alcides hortatibus urget
 550 prospiciens ; jamque ex oculis aufertur uterque,
 551 cum puerum instantem quadripes fessaue minantem
 552 tela manu procul ad nitidi spiracula fontis
 553 ducit et intactas levis ipse superfugit undas.
 554 Hoc pueri spes lusa modo est nec tendere certat
 555 amplius utque artus et concita pectora sudor
 556 diluerat, gratos avidus procumbit ad amnes.
 557 Stagna vaga sic luce micant ubi Cynthia caelo

558 prospicit aut medii transit rota candida Phoebi ;
 559 tale jubar diffundit aquis. Nil umbra comaeque
 560 turbavitque sonus surgentis ad oscula Nymphae.
 561 Illa avidas injecta manus heu sera cientem
 562 auxilia et magni referentem nomen amici
 563 detrahit ; adjunctae prono jam pondere vires.
 564 Jam pater umbrosis Tirynthius arcibus ornum
 565 depulerat magnoque jugis stridore revulsam
 566 terga super fulvi porrexerat horrida monstri
 567 litora curva petens ; alio nam calle reversum
 568 credit Hylan captaque dapes auxisse ferina.
 569 Sed neque apud socios structasque in litore mensas
 570 unanimum videt aeger Hylan nec longius acrem
 571 intendens aciem. Varios hinc excitat aestus
 572 nube mali percussus amor, quibus haeserit oris,
 573 quis tales impune moras casusve laborve
 574 attulerit. Densam interea descendere noctem
 575 jam majore metu (tum vero et pallor et amens
 576 cum piceo sudore rigor). Ceu pectora nautis
 577 congelat hiberni vultus Jovis agricolisve
 578 cum coit umbra minax, comitis sic adficit error
 579 Alciden saevaeque monet meminisse novercae.
 580 Continuo, volucris ceu pectora tactus asilo
 581 emicuit Calabris taurus per confraga saeptis
 582 obvia quaeque ruens, tali se concitat ardens
 583 in juga senta fuga. Pavet omnis conscia late
 584 silva, pavent montes, luctu succensus acerbo
 585 quid struat Alcides tantaque quid apparet ira.
 586 Ille, velut refugi quem contigit improba Mauri
 587 lancea sanguineus vasto leo murmure fertur
 588 frangit et absentem vacuis sub dentibus hostem,
 589 sic furiis accensa gerens Tirynthius ora
 590 fertur et intento discurrit montibus arcu.
 591 Heu miserae quibus ille feris, quibus incidit usquam
 592 immeritis per lustra viris ! Volat ordine nullo
 593 cuncta petens : nunc ad ripas dejectaque saxis
 594 flumina, nunc motas nemorum procurrit ad umbras.
 595 Rursus Hylan et rursus Hylan per longa reclamat
 596 avia : responsant silvae et vaga certat imago.
 597 At sociis immota fides Austrisque secundis
 598 certa, morae est nec parvus Hylas, quamquam omnibus aequae
 599 grata rudimenta ; Herculeo sub nomine pendent.
 600 Illum omnes lacrimis maestisque reposcere votis
 601 incertique metu nunc longas litore voces
 602 spargere, nunc seris ostendere noctibus ignes.
 603 Ipse vel excelsi cum densa silentia montis
 604 strata vel oblatis ductor videt aequora ventis,
 605 stat lacrimans magnoque viri cunctatur amore.
 606 Illius incessus habilemque ad terga pharetram,
 607 illum inter proceres maestaeque silentia mensae
 608 quaerit inops quondam ingenti comprehensa trahentem
 609 vina manu et durae referentem monstra novercae.
 610 Nec minus interea crudelis Iapyga Juno
 611 adsidue movet et primis cum solibus offert.
 612 Jamque morae impatiens cunctantes increpat ausus
 613 Tiphys et oblato monet otia rumpere cursu.
 614 Ergo animum flexus dictis instantis Iason
 615 concedit sociosque simul sic fatur ad omnes :

616 "O utinam, Scythicis struerem cum funera terris,
617 vox mihi mentitas tulerit Parnasia sortes,
618 agmine de tanto, socium qui maximus armis
619 adforet, hunc Jovis imperiis fatoque teneri
620 ante procellosum scopulis errantibus aequor !
621 Necdum fama viri nec certior exstitit auctor.
622 Verum agite et, dubiis variant qui pectora curis,
623 consulite et, motis seu vos via flatibus urget,
624 pergite et inceptos mecum revocate labores,
625 seu plures stat ferre moras rursusque propinquis
626 quaesivisse jugis, pretium haud leve temporis acti."
627 Dixerat ; at studiis jamdudum freta juvenus
628 orat inire vias : unum tanto afore coetu
629 nec minus in sese generis dextrasque potentes
630 esse ferunt. Tali mentem pars maxima flatu
631 erigit et vana gliscunt praecordia lingua,
632 saltibus ut mediis tum demum laeta reducit
633 cervam gregem, tum gestit aper reboatque superbis
634 comminus ursa lupis, cum sese Martia tigris
635 abstulit aut curvo tacitus leo condidit antro.
636 At pius ingenti Telamon jam fluctuat ira
637 cum fremitu, saevisque ferens perjuriam dictis
638 insequitur magnoque implorat numina questu.
639 Idem orans prensatque viros demissaque supplex
640 haeret ad ora ducis : nil se super Hercule fari
641 sed socio quocumque, gemens, namque aspera fama
642 jam loca jamque feras per barbara litora gentes,
643 non alium contra Alciden, non pectora tanta
644 posse dari. Rursum instimulat ducitque faventes
645 magnanimus Calydone satus, potioribus ille
646 deteriora fovens semperque inversa tueri
647 durus et haud ullis unquam superabilis aequis
648 rectorumve memor. "Non Herculis", inquit, "adempti
649 sed tuus in seros haec nostra silentia questus
650 traxit honor, dum jura dares, dum tempora fandi.
651 Septimus hic celsis descendit montibus Auster
652 jamque ratem Scythicis forsitan statuisset in oris ;
653 nos patriae immemores, maneant ceu nulla revectoros
654 gaudia, sed duro saevae sub rege Mycenae,
655 ad medium cunctamur iter. Si finibus ullis
656 has tolerare moras et inania tempora possem,
657 regna hodie et dulcem sceptris Calydone tenerem
658 laetus opum pacisque meae tutusque manerem
659 quis genitor materque locis. Quid deside terra
660 haeremus ? Vacuos cur lassant aequora visus ?
661 Tu comitem Alciden ad Phasidis amplius arva
662 adfore, tu socias ultra tibi rere pharetras ?
663 Non ea fax odiis oblitave numine fesso
664 Juno sui. Nova Tartareo fors semine monstra
665 atque iterum Inachiis jam nuntius urget ab Argis.
666 Non datur haec magni proles Jovis ; at tibi Pollux
667 stirpe pares Castorque manent, at cetera divum
668 progenies nec parva mihi fiducia gentis.
669 En egomet quocumque vocas sequar agmina ferro
670 plura metam ; tibi dicta manus, tibi quicquid in isto
671 sanguine erit, jamque hinc operum quae maxima posco.
672 Scilicet in solis profugi stetit Herculis armis
673 nostra salus, nempe ora aequae mortalia cuncti

674 ecce gerunt ; ibant aequo nempe ordine remi.
675 Ille vel insano jamdudum turbidus aestu
676 vel parta jam laude tumens consortia famae
677 despicit ac nostris ferri comes abnuit actis.
678 Vos, quibus et virtus et spes in limine primo,
679 tendite, dum rerum patiens calor et rude membris
680 robur inest ; neque enim solis dare funera Colchis
681 sit satis et tota pelagus lustrasse juventa.
682 Spes mihi quae tali potuit longissima casu
683 esse fuit, quiscumque virum perquirere silvis
684 egit amor : loca vociferans non ulla reliqui.
685 Nunc quoque, dum vario nutat sententia motu,
686 cernere devexis redeuntem montibus opto.
687 Sat lacrimis comitique datum, quem sortibus aevi
688 crede vel in mediae raptum tibi sanguine pugnae."
689 Talibus Oenides urget ; simul incita dictis
690 heroum manus. Ante omnes Argoa jubebat
691 vincla rapi Calais. Furias miratur ovantum
692 Aeacides, multusque viri cunctantia corda
693 fert dolor an sese comitem tam tristibus actis
694 abneget et celsi maerens petat ardua montis.
695 Non tamen et gemitus et inanes desinit iras
696 fundere. "Quis terris pro Juppiter", inquit, "Achaeis
697 iste dies, saevi capient quae gaudia Colchi !
698 Non hi tum flatu, non ista superbia dictis,
699 litore cum patrio, jam vela petentibus Austris,
700 cunctus ad Alciden versus favor : ipse juvaret,
701 ipse ducis curas meritosque subiret honores.
702 Jamne animis, jam gente pares, aequae inclita vulgi
703 dextera ? Nulla fides, nulli super Hercule fletus ?
704 Nunc Porthaonides, nunc dux mihi Thracia proles ?
705 Aspera nunc pavidos contra ruit agna leones ?
706 Hanc ego magnanimi spoliolum Didymaonis hastam
707 quae neque jam frondes, virides nec proferet umbras
708 ut semel est evulsa jugis ac matre perempta
709 fida ministeria et duras obit horrida pugnas,
710 testor et hoc omni, ductor, tibi numine firmo :
711 saepe metu, saepe in tenui discrimine rerum
712 Herculeas jam serus opes spretique vocabis
713 arma viri nec nos tumida haec tum dicta juvabunt."
714 Talibus Aeacides socios terroribus urgens
715 inlacrimat multaque comas deformat harena.
716 Fata trahunt raptusque virum certamine ductor
717 ibat et obtenta mulcebat lumina palla.
718 Hic vero ingenti repetuntur pectora luctu
719 ut socii sedere locis nullaeque leonis
720 exuviae tantique vacant vestigia transtri.
721 Flet pius Aeacides, maerent Poentia corda,
722 ingemit et dulci frater cum Castore Pollux.
723 Omnis adhuc vocat Alciden fugiente carina,
724 omnis Hylan : medio pereuntia nomina ponto.
725 Dat procul interea toto pater aequore signum
726 Phorcys et immanes intorto murice phocas
727 contrahit antra petens ; simul et Massylus et una
728 Lyctius et Calabris redit armentarius arvis.
729 Ilicet extremi nox litore solis Hiberas
730 condidit alta domos et sidera sustulit axis.
731 Flumina conticuere, jacet cum flatibus aequor.

732 Amphitryoniades nec quae nova lustra requirat
 733 nec quo temptet iter, comitis nec fata parenti
 734 quae referat, videt, aut socios qua mente revisat :
 735 urit amor solisque negat decedere silvis.
 736 Non aliter gemitum quondam lea prolis ademptae
 737 aegra dedit ; sedet inde viis inclusaque longo
 738 pervigilant castella metu ; dolor attrahit orbes
 739 interea et misero manat juba sordida luctu.

AR_4 v.1 Atque ea non oculis divum pater amplius aequis
 2 sustinuit natiq̄ue pios miseratus amores
 3 Junonem ardenti trepidam gravis increpat ira :
 4 "Ut nova nunc tacito te pectore gaudia tollunt :
 5 haeret inops solisque furit Tirynthius oris,
 6 at comite immemores Minyae facilesque relicto
 7 alta tenent. Sic Juno ducem fovet anxia curis
 8 Aesonium, sic arma viro sociosque ministrat.
 9 Jam quibus incertam bellis Scythicaeque paventem
 10 gentis opes, quanta trepidam formidine cernam !
 11 Tum precibus, tum me lacrimis et supplice dextra
 12 attemptare veto ; rerum mihi firma potestas.
 13 I, Furias Veneremque move ; dabit impia poenas
 14 virgo nec Aetae gemitus patiemur inultos."
 15 Dixit et arcano redolentem nectare rorem,
 16 quem penes alta quies liquidique potentia somni,
 17 detulit inque vagi libavit tempora nati.
 18 Ille graves oculos et Hylan resonantia semper
 19 ora ferens, ut nulla deum superare potestas,
 20 procumbit. Tandem fessis pax reddita silvis
 21 fluminaque et vacuis auditae montibus aurae.
 22 Ecce puer summa se tollere visus ab unda
 23 frondibus in croceis et iniquae munere Nymphae
 24 stansque super carum tales caput edere voces :
 25 "Quid, pater, in vanos absumis tempora questus ?
 26 Hoc nemus heu fatis mihi jam domus ; improba quae me
 27 nympha rapit saevae monitu Junonis in amnes,
 28 nunc Jovis accessus et jam mihi limina caeli
 29 conciliat jungitque toros et fontis honores.
 30 O dolor, o dulces quas gessimus ante pharetrae !
 31 Jam socii laetis rapuerunt vincula ventis
 32 hortator postquam furiis et voce nefanda
 33 impulit Oenides. Verum cum gente domoque
 34 ista luet saevaeque aderunt tua numina matri.
 35 Surge age et in duris haud unquam defice ; caelo
 36 mox aderis teque astra ferent. Tu semper amoris
 37 sis memor et cari comitis ne abscedat imago."
 38 Talibus orantem dictis visuque fruentem
 39 ille ultro petit et vacuis amplexibus instat
 40 languentisque movet frustra conamina dextrae :
 41 corpus hebet somno refugaque eluditur umbra.
 42 Tum lacrimis, tum voce sequi, tum rumpere questus,
 43 cum sopor et vano spes maesta resolvitur actu.
 44 Fluctus ab undisoni ceu forte crepidine saxi
 45 cum rapit halcyonis miserae fetumque laremque,
 46 it super aegra parens queriturque tumentibus undis,

47 certa sequi quocumque ferant, audetque pavetque
 48 icta fatiscit aquis donec domus haustaque fluctu est
 49 (illa dolens vocem dedit et se sustulit alis),
 50 haud aliter somni maestus labor. Exsilit amens
 51 effusisque genas lacrimis rigat. "Ibimus", inquit,
 52 "solus et hos montes desertaque lustra tenebis,
 53 care puer, nec res ultra mirabere nostras."
 54 Haec fatus relegitque vias et vallibus exit
 55 incertus quid Juno ferat, quas apparet iras.
 56 Nec minus et socios cernit procul aequore ferri
 57 praecipites tacitumque pudet potuisse relinqui.
 58 Jamque iter ad Teucros atque hospita moenia Trojae
 59 flexerat Iliaci repetens promissa tyranni,
 60 cum maesto Latona simul Dianaque vultu
 61 ante Jovem stetit et supplex sic fatur Apollo :
 62 "In quem alium Alciden, in quae jam tempora differs
 63 Caucaseum, rex magne, senem ? Nullumne malorum
 64 finem adeo poenaeque dabis ? Te cuncta precatur
 65 gens hominum atque ipsi jam te, pater optime, montes
 66 fessaque cum silvis orant juga. Sat tibi furtum
 67 ignis et aetheriae defensa silentia mensae."
 68 Dixit ubi, e scopulis media inter pabula diri
 69 vulturis ipse etiam gemitu maestaque fatigat
 70 voce Jovem saevis relevans ambusta pruinis
 71 lumina ; congeminant amnes rupesque fragorem
 72 Caucaseae, stupet ipse dei clamoribus ales.
 73 Tunc etiam superas Acheronte auditus ad arces
 74 Iapetus ; gravis orantem procul arcet Erinys
 75 respiciens celsi legem Jovis. Ille dearum
 76 fletibus et magno Phoebi commotus honore
 77 velocem roseis demittit nubibus Irin.
 78 "I, Phrygas Alcides et Trojae differat arma ;
 79 nunc", ait, "eripiat dirae Titana volucris."
 80 Diva volat defertque viro celeranda parentis
 81 imperia atque alacrem laetis hortatibus implet.
 82 Jam Minyae mediis clarae per sidera noctis
 83 fluctibus intulerant placido cava lintea cursu
 84 multaque deserto memores super Hercule volvunt.
 85 Thracius at summa sociis e puppe sacerdos
 86 fata deum et miserae solans incommoda vitae
 87 securum numeris agit et medicabile carmen ;
 88 quod simul adsumpta pulsum fide luctus et irae
 89 et labor, et dulces cedunt e pectore nati.
 90 Interea magni jam jam subeuntibus astris
 91 Oceani genitale caput Titania frenis
 92 antra sonant. Sol auricomis cingentibus Horis
 93 multifidum jubar et bissono sidere textam
 94 loricam induitur ; ligat hanc qui nubila contra
 95 balteus undantem variat mortalibus arcum.
 96 Inde super terras et eoi cornua montis
 97 emicuit traxitque diem candentibus undis
 98 et Minyas viso liquerunt flamina Phoebos.
 99 Proxima Bebrycii panduntur litora regni,
 100 pingue solum et duris regio non invida tauris ;
 101 rex Amycus. Regis fatis et numine freti
 102 non muris cinxere domos, non foedera legum
 103 ulla colunt placidas aut jura tenentia mentes.
 104 Quales Aetnaeis rabidi Cyclopes in antris

105 nocte sub hiberna servant freta, sicubi saevis
106 advectet ratis acta Notis tibi pabula dira
107 et miseras, Polypheme, dapes, sic undique in omnes
108 prospiciunt cursantque vias qui corpora regi
109 capta trahant. Ea Neptuno trux ipse parenti
110 sacrifici pro rupe jugi media aequora supra
111 torquet agens. Sin forma viris praestantior adsit,
112 tum legere arma jubet sumptisque occurrere contra
113 cestibus : haec miseris sors est aequissima leti.
114 Huc ubi devectam Neptunus gurgite puppem
115 sensit et extremum nati prospexit in oras
116 et quondam laetos domini certamine campos,
117 ingemit ac tales evolvit pectore questus :
118 "Infelix, imas quondam mihi rapta sub undas
119 nec potius magno, Melie, tum mixta Tonanti !
120 Usque adeone meam quacumque ab origine prolem
121 tristia fata manent ? Sic te olim pergere sensi,
122 Juppiter, injustae quando mihi virginis armis
123 concidit infelix et nunc chaos implet Orion.
124 Nec tibi nunc virtus aut det fiducia nostri,
125 nate, animos opibusque ultra ne crede paternis.
126 Jam jam aliae vires majoraque sanguine nostro
127 vincunt fata Jovis, potior cui cura suorum est.
128 Atque ideo neque ego hanc tumidis avertere ventis
129 temptavi tenuive ratem nec jam mora morti
130 hinc erit ulla tuae (reges preme, dure, secundos !)"
131 abstulit inde oculos natumque et tristia linquens
132 proelia sanguineo terras pater adluit aestu.
133 Principio fluvios gentemque et litora ductor
134 explorare jubet paulumque egressus Echion
135 invenit obscura gemitus in valle trahentem
136 clam juvenem et caesi maerentem nomen amici ;
137 ille virum ut contra venientem umbrataque vidit
138 tempora Parrhasio patris de more galero
139 paciferaeque manu nequiquam insignia virgae,
140 "Heu fuge", ait, "certo, quicumque es, perditte, passu,
141 dum datur." Obstipuit visu Nonacria proles,
142 quid ferat admirans. Postquam remeare monentem
143 ocius et dictis perstantem cernit in isdem,
144 adripit et sociis quae sint ea promere cogit.
145 Ille manum tendens "non haec", ait, "hospita vobis
146 terra, viri, non hic ullos reverentia ritus
147 pectora : mors habitat saevaeque hoc litore pugnae.
148 Jam veniet diros Amycus qui tollere caestus
149 imperet et vasto qui vertice nubila pulset.
150 Talis in advectos Neptuni credita proles
151 aeternum furit, atque aequae virtutis egentes
152 ceu superum segnes ad iniqua altaria tauros
153 constituit, tandem ut misero lavet arma cerebro.
154 Consulite atque fugae medium ne temnite tempus.
155 Namque isti frustra quisquam concurrere monstro
156 audeat, et quaenam talem vidisse voluptas ? "
157 Ductor ad haec : "Bebryxne venis diversaque regi
158 corda gerens (melior vulgi nam saepe voluntas)
159 hostis an externis fato delatus ab oris,
160 et tua cur Amycus caestu nondum obruit ora ? "
161 "Nomen", ait, "praedulce mihi nomen que secutus
162 Otreos unanimi. Decus ille et laeta suorum

163 gloria nec vestros comes aspernandus in actus,
164 Hesionam et Phrygiae peteret cum gaudia nuptae,
165 hic Amycum contra jussus stetit atque ego palmas
166 implicui ; sed prima procul vixdum ora levantis
167 fulminea frontem dextra disjectaque fudit
168 lumina. Me nunquam leto dignatus et armis
169 sed lacrimis potius luctuque absumor inertis.
170 Spes tamen, his fando si nuntius exstitit oris
171 et Mariandynum patrias penetravit ad urbes
172 unde genus fraterque viro (sed et ille quierit
173 oro nec vanis cladem Lycus augeat armis !)"
174 Haec ubi non ulla juvenes formidine moti
175 accipiunt, dolet, et dura sic pergere mente,
176 terga sequi properosque jubet conjungere gressus.
177 Litore in extremo spelunca apparuit ingens
178 arboribus super et dorso contacta minanti,
179 non quae dona deum, non quae trahat aetheris ignem,
180 infelix domus et sonitu tremebunda profundi.
181 At varii pro rupe metus ; hinc trunca rotatis
182 bracchia rapta viris strictoque immortua caestu
183 ossaque taetra situ et capitum maestissimus ordo
184 per piceas, quibus adverso sub vulnere nulla
185 jam facies nec nomen erat ; media ipsius arma
186 sacra metu magnique aris imposta parentis.
187 Hospitis hic primum monitus rediere Dymantis
188 et pavor et monstri subiit absentis imago
189 atque oculos cuncti inter se tenere silentes,
190 donec sidereo Pollux interritus ore
191 "Te tamen, hac quicumque es", ait, "formidine, faxo
192 jam tua silva ferat, modo sint tibi sanguis et artus."
193 Omnibus idem animus forti decernere pugna
194 exoptantque virum contraque occurrere poscunt.
195 Qualiter ignotis spumantem funditus amnem
196 pandit iter, mox omne pecus formidine pulsa
197 pone subit jamque et mediis procedit ab undis.
198 At procul e silvis sese gregibusque ferebat
199 saevus in antra gigas. Quem nec sua turba tuendo
200 it taciti secreta metus. Mortalia nusquam
201 signa manent ; instar scopuli qui montibus altis
202 summus abit longaque jugo stat solus ab omni.
203 Devolat inde furens, nec quo via curve profecti
204 nec genus ante rogat sed tali protonat ira :
205 "Incipite, o juvenes. Etenim fiducia, credo,
206 huc tulit auditas et sponte lacessitis oras.
207 Sin errore viae necdum mens gnara locorum,
208 hic mihi lex caestus adversaque tollere contra
209 bracchia. Sic ingens Asiae plaga quique per Arcton
210 dexter et in laevum pontus jacet haec mea visit
211 hospitium, hoc functi remeant certamine reges.
212 Neptuni domus atque egomet Neptunia proles.
213 Jam pridem caestus resides et frigida raris
214 dentibus aret humus. Quis mecum foedera junget ?
215 Prima manu cui dona fero ? Mox omnibus idem
216 ibit honos. Fuga sub terras, fuga nulla per auras.
217 Nec lacrimae (ne ferte preces) superive vocati
218 pectora nostra movent : aliis rex Juppiter oris.
219 Faxo Bebrycium nequeat transcendere puppis
220 ulla fretum et ponto volitet Symplegas inani."

221 Talia dicta dabat, cum protinus asper Iason
 222 et simul Aeacidae simul et Calydonis alumni
 223 Nelidesque Idasque prior quae maxima surgunt
 224 nomina ; sed nudo steterat jam pectore Pollux.
 225 Tum pavor et gelidus defixit Castora sanguis.
 226 Nam nec ad Elei pugnam videt ora parentis
 227 nec sonat Oebalius caveae favor aut juga nota
 228 Taygeti, lavitur patrios ubi victor ad amnes,
 229 nec pretium sonipes aut sacrae taurus harenae
 230 praemia sed manes reclusaque janua leti.
 231 Illum Amycus nec fronte trucem nec mole tremendum,
 232 vixdum etiam primae spargentem signa juventae
 233 ore renidenti lustrans obit et fremit ausum
 234 sanguineosque rotat furiis ardentibus orbis.
 235 Non aliter jam regna poli, jam capta Typhoeus
 236 astra ferens Bacchum ante acies primamque deorum
 237 Pallada et oppositos doluit sibi virginis angues.
 238 Sic adeo insequitur rabidoque ita murmure terret :
 239 "Quisquis es, infelix celeras, puer : haud tibi pulchrae
 240 manserit hoc ultra frontis decus orave matri
 241 nota ferēs. Tunc a sociis electus iniquis ?
 242 Tunc Amyci moriere manu ? " Nec plura moratus
 243 ingentes umeros spatiosaque pectoris ossa
 244 protulit horrendosque toris informibus artus.
 245 Deficiunt visu Minyae, miratur et ipse
 246 Tyndarides ; redit Alcidae jam sera cupido
 247 et vacuos maesto lustrarunt lumine montes.
 248 At satus aequoreo fatur tunc talia rege :
 249 "Aspice et haec crudis durata volumina tauris ;
 250 nec pete sortis opem sed quos potes indue caestus."
 251 Dixit et urgentis (pro sera piacula) fati
 252 nescius extremum hoc armis innectere palmas
 253 dat famulis, dat et inde Lacon. Odia aspera surgunt
 254 ignotis prius atque incensa mente feruntur
 255 in medium sanguis Jovis et Neptunia proles.
 256 Hinc illinc dubiis intenta silentia votis,
 257 et pater orantes caesorum Tartarus umbras
 258 nube cava tandem ad meritae spectacula poenae
 259 emittit ; summi nigrescunt culmina montis.
 260 Continuo Bebryx, Maleae velut arce fragosa
 261 turbo rapax, vix ora virum, vix tollere passus
 262 brachia torrenti praeceps agit undique nimbo
 263 cursibus involvens totaque immanis harena
 264 insequitur. Vigil ille metu cum pectore et armis
 265 huc alternus et huc, semper cervice reducta
 266 semper et in digitis it summi pulvere campi,
 267 projectusque redit. Spumanti qualis in alto
 268 Pliade capta ratis trepidi quam sola magistri
 269 cura tenet, rapidum ventis certantibus aequor
 270 intemerata secat, Pollux sic providus ictus
 271 servat et Oebalia dubium caput eripit arte.
 272 Ut deinde urgentes effudit nutibus iras
 273 ardoremque viri, paulatim insurgere fesso
 274 integer et summos manibus deducere caestus.
 275 Ille dies aegros Amyci sudoribus artus
 276 primus et arenti cunctantem vidit hiatu
 277 nec sua defessum noscunt loca nec sua regem
 278 agmina. Respirant ambo paulumque reponunt

279 bracchia, ceu Lapithas aut Paeonas aequore in ipso
 280 cum refovet fixaque silet Gradivus in hasta.
 281 Vix steterant et jam ecce ruunt inflictaque late
 282 terga sonant ; nova vis iterum, nova corpora surgunt.
 283 Hunc pudor, hunc noto jam spes audentior hoste
 284 instimulant. Fumant crebro praecordia pulsu ;
 285 avia responsant gemitu juga, pervigil ut cum
 286 artificum notat Aetna manus et fulmina Cyclops
 287 prosubigit, pulsus strepitant incudibus urbes.
 288 Emitat hic dextramque parat dextramque minatur
 289 Tyndarides ; redit huc oculis et pondere Bebryx
 290 sic ratus, ille autem celeri rapit ora sinistra.
 291 Conclamant socii et subitas dant gaudia voces.
 292 Illum insperata turbatum fraude furentemque
 293 Oebalides prima refugit dum detonet ira,
 294 territus ipse etiam atque ingentis conscius ausi.
 295 Saevit inops Amycus nullo discrimine sese
 296 praecipitans avidusque viri (respectat ovantes
 297 quippe procul Minyas) ; tum caestu elatus utroque
 298 inruit. Hos inter Pollux subit et trucis ultro
 299 advolat ora viri ; nec spes effecta sed ambae
 300 in pectus cecidere manus. Hoc saevior ille
 301 ecce iterum vacuas agit inconsulta per auras
 302 bracchia. Sentit enim Pollux rationis egentem,
 303 dat genibus junctis latus effusumque secutus
 304 haud revocare gradum patitur turbatque premitque
 305 ancipitem crebros et liber congerit ictus
 306 desuper averso ; sonat omni vulnere vertex
 307 inclinis ceciditque malis. Jam tempora manant
 308 sanguineaeque latent aures, vitalia donec
 309 vincula, qua primo cervix committitur artu,
 310 solvit dextra gravis. Labentem propulit heros
 311 ac super insistens "Pollux ego missus Amyclis
 312 et Jove natus" ait ; "nomen mirantibus umbris
 313 hoc referes : sic et memori noscere sepulchro."
 314 Bebrycas extemplo spargit fuga ; nullus adempti
 315 regis amor : montem celeres silvamque capessunt.
 316 Haec sors, haec Amycum tandem manus arcuit ausis
 317 effera servantem Ponti loca vimque juventae
 318 continuum et magni sperantem tempora patris.
 319 Tenditur ille ingens hominum pavor arvaque late
 320 occupat, annosi velut si decidat olim
 321 pars Erycis vel totus Athos ; qua mole jacentis
 322 ipse etiam expleri victor nequit oraque longo
 323 comminus obtutu mirans tenet. At manus omnis
 324 heroum densis certatim amplexibus urgent
 325 armaque ferre juvat fessasque attollere palmas.
 326 "Salve, vera Jovis, vera o Jovis" undique "proles"
 327 ingeminant, "o magnanimis memoranda palaestris
 328 Taygeta et primi felix labor ille magistri."
 329 Dumque ea dicta ferunt, tenues tamen ire cruores
 330 siderea de fronte vident nec sanguine Pollux
 331 territus averso siccabat vulnera caestu.
 332 Illius excelsum ramis caput oraque Castor
 333 implicat et viridi conectit tempora lauro
 334 respiciensque ratem "Patriis", ait, "has precor oris,
 335 diva, refer frondes cumque hac freta curre corona."
 336 Dixerat. Hinc valida caedunt armenta bipenni

337 perfusique sacro placati gurgitis amne
338 graminea sternuntur humo ; tunc liba dapesque
339 frondibus accumulans, exsortia terga Laconi
340 praecipiant pecudum. Toto mox tempore mensae
341 laetus ovat nunc laude virum, nunc vatis honoro
342 carmine, Victori geminans cratera parenti.
343 Jamque dies auraeque vocant rursusque capessunt
344 aequora, qua rigidos eructat Bosphoros amnes.
345 Illos, Nile, tuis nondum dea gentibus Io
346 transierat fluctus unde haec data nomina ponto.
347 Tum pius Oeagri claro de sanguine vates
348 admonita genetrice refert casusque locorum
349 Inachidosque vias pelagusque emensa juvencae
350 exilia intentisque canit : "Videre priores
351 saepe Jovem in terras Argivaque regna Pelasgum
352 virginis Iasiae blandos descendere ad ignes.
353 Sentit Juno dolos curaque accensa jugali
354 aethere desiluit (dominam Lyrceia tellus
355 antraque deprensae tremuerunt conscia culpae)
356 cum trepida Inachiae paelex subit ora juvencae
357 sponte dei ; plausu fovet hanc et pectora mulcet
358 Juno renidenti cohibens suspiria vultu.
359 Mox ita adorta Jovem : "Da quam modo ditibus Argis
360 campus alit primae referentem cornua Phoebes
361 indomitamque bovem, da carae munera nuptae.
362 Ipsa ego dilectae pecudi jam pascua digna
363 praecipuosque legam fontes." Qua fraude negaret
364 aut quos inventos tenuisset Juppiter astus ?
365 Muneris illa potens custodem protinus Argum
366 adjungit ; custos Argus placet, inscia somni
367 lumina non aliter toto cui vertice quam si
368 Lyda nurus sparso telas maculaverit ostro.
369 Argus et in scopulos et monstris horrida lustra
370 ignotas jubet ire vias heu multa morantem
371 conantemque preces inclusaque pectore verba.
372 Ultima tum patriae cedens dedit oscula ripae :
373 flevit Amydone, flerunt Messeidos undae,
374 flevit et effusis revocans Hyperia lacertis.
375 Illa ubi vel fessi tremere erroribus artus
376 vel rueret summo jam frigidus aethere vesper,
377 heu quotiens saxo posuit latus aut, ubi longa
378 aegra siti, quos ore lacus, quae pabula carpsit,
379 verbere candentes quotiens exhorruit armos !
380 Quin et ab excelso meditantem vertice saltus
381 audentemque mori valles citus egit in imas
382 Argus et arbitrio durus servavit erili
383 cum subito Arcadio sonuit cava fistula ritu
384 imperiumque patris celerans Cyllenius ales
385 advenit et leni modulatur carmina avena
386 "Quo"que ait "hinc diversus abis ? Heus respice cantus !"
387 Haud procul insectans Argum languentia cantu
388 lumina cuncta notat dulcesque sequentia somnos
389 et celerem mediis in cantibus exigit harpen.
390 Jamque refecta Jovi paulatim in imagine prisca
391 ibat agris Io victrix Junonis et ecce
392 cum facibus spirisque et Tartareo ululatu
393 Tisiphonen videt ac primo vestigia visu
394 figit et in miserae rursus bovis ora recurrit

395 nec qua valle memor nec quo se vertice sistat
396 Inachias errore etiam defertur ad undas
397 qualis et a prima quantum mutata juvenca :
398 nec pater aut trepidae temptant accedere nymphae.
399 Ergo iterum silvas, iterum petit in via retro
400 ceu Styga dilectum fugiens caput ; inde per urbes
401 raptatur Graias atque ardua flumina ripis
402 oblato donec paulum cunctata profundo
403 incidit : absistunt fluctus et gnara futuri
404 dant pavidae alta viam ; celsis procul ipsa refulget
405 cornibus ac summa palearia sustinet unda.
406 Ast Erebi virgo ditem volat aethere Memphin
407 praecipere et Pharia venientem pellere terra.
408 Contra Nilus adest et toto gurgite torrens
409 Tisiphonen agit atque imis illidit harenis
410 Ditis opem ac saevi clamantem numina regni.
411 Apparent sparsaeque faces disjectaque longe
412 verbera et abruptis excussi crinibus hydri.
413 Nec Jovis interea cessat manus. Intonat alto
414 insurgens caelo genitor curamque fatetur
415 atque ipsa imperium Juno pavet. Haec procul Io
416 spectat ab arce Phari, jam divis addita jamque
417 aspide cincta comas et ovanti persona sistro.
418 Bosporon hinc veteres errantis nomine divae
419 vulgavere. Juvet nostros nunc ipsa labores
420 immissisque ratem sua per freta provehat Euris."
421 Dixerat et placidi tendebant carbasa venti.
422 Postera non cassae Minyis Aurora retexit
423 noctis iter ; nova cuncta vident Thyneaque juxta
424 litora fatidici poenis horrentia Phinei
425 dira deum summo quem vis urgebat in aevo.
426 Quippe neque extorrem tantum nec lucis egentem
427 insuper Harpyiae Typhonides, ira Tonantis,
428 depopulant ipsoque dapes praedantur ab ore.
429 Talia prodigia et tales pro crimine poenas
430 perpetitur. Spes una seni quod pellere saevam
431 quondam fata luem dederunt Aquilone creatis.
432 Ergo ubi jam Minyas certamque accedere Phineus
433 sentit opem, primas baculo defertur ad undas
434 vestigatque ratem atque oculos attollit inanes.
435 Tunc tenuem spirans animam "Salve, o mihi longum
436 exspectata manus nostrisque", ait, "agnita votis.
437 Novimus et divis geniti quibus et via jussos
438 quae ferat ac vestri reputabam tempora cursus
439 proxima quaeque legens, quantum Vulcania Lemnos
440 traxerit, infelix tulerit quae Cyzicus arma.
441 Sensi et Bebrycio supremam in litore pugnam
442 jam propior jamque hoc animum solamine mulcens.
443 Non ego nunc magno quod cretus Agenore Phineus
444 aut memorem mea quod vates insedit Apollo
445 pectora ; praesentis potius miserescite fati.
446 Nec mihi diversis erratum casibus orbem
447 amissas aut flere domos aut dulcia tempus
448 lumina ; consumptis serum est ex ordine fatis
449 ingemere. Harpyiae semper mea pabula servant
450 fallere quas nusquam misero locus : illicit omnes
451 deveniunt niger intorto ceu turbine nimbus
452 jamque alis procul et sonitu mihi nota Celaeno ;

453 diripiunt verruntque dapes foedataque turbant
 454 pocula, saevit odor surgitque miserrima pugna
 455 parque mihi monstrisque fames. Sprevere quod omnes
 456 pollueruntque manu quodque unguibus excidit atris
 457 has mihi fert in luce moras. Nec rumpere fata
 458 morte licet ; trahitur victu crudelis egestas.
 459 Sed vos o servate precor, praedicta deorum
 460 si non falsa mihi, vos finem imponite poenis.
 461 Nempe adsunt qui monstra fugent Aquilonia proles
 462 non externa mihi ; nam rex ego divitis Hebri
 463 junctaque vestra meo quondam Cleopatra cubili."
 464 Nomen ad Actaeae Calais Zetesque sororis
 465 prosiliunt, Zetesque prior "Quem cernimus ? " inquit,
 466 "Tunc ille Odrysiae Phineus rex inclitus orae ?
 467 Tu Phoebi comes et nostro dilecte parenti ?
 468 O ubi nunc regni generisque ubi gloria ? Quam te
 469 exedit labor et miseris festina senectus !
 470 Quin age mitte preces ; namque est tibi nostra voluntas
 471 si non ira deum, vel si placabilis urget."
 472 Sustulit hic geminas Phineus ad sidera palmas
 473 "Te"que ait "infesti quae nunc premis ira Tonantis
 474 ante precor, nostrae tandem jam parce senectae,
 475 sit modus (et fore credo equidem), nam vestra voluntas
 476 quid, juvenes, sine pace deum ? nec credite culpam
 477 saevitiae scelerumve mihi nunc crimina pendi :
 478 fata loquax mentemque Jovis quaeque abdita solus
 479 consilia et terris subito ventura parabat
 480 prodideram miserans hominum genus : hinc mihi tanta
 481 pestis et offusae media inter dicta tenebrae.
 482 Jam tandem cessere irae nec casus ab alto,
 483 ipse volens nostris sed vos deus, adpulit oris."
 484 Sic ait et fatis ita jam cedentibus omnes
 485 impulit et durae commovit imagine poenae.
 486 Instituire toros mediisque tapetibus ipsum
 487 accipiunt circumque jacent ; simul aequora servant,
 488 astra simul vescique jubent ac mittere curas,
 489 cum subitus misero tremor et pallentia primae
 490 ora senis fugere manus. Nec prodita pestis
 491 ante sed in mediis dapibus videre volucres.
 492 Fragrat acerbus odor patriique exspirat Averni
 493 halitus ; unum omnes incessere planctibus, unum
 494 infestare minis, inhiat Cocytia nubes
 495 luxurians ipsoque ferens fastidia visu.
 496 Tum sola colluvie atque illisis stramina mensis
 497 foeda rigant ; stridunt alae praedaeque retenta
 498 saevit utrimque fames nec solum horrenda Celaeno
 499 Phinea sed miseras etiam prohibere sorores.
 500 Emicat hic subito seseque Aquilonia proles
 501 cum clamore levat ; genitor simul impulit alas.
 502 Hoste novo turbata lues lapsaeque rapinae
 503 faucibus, et primum pavidae Phineia tecta
 504 pervolitant, mox alta petunt ; stant litore fixi
 505 Haemonidae atque oculis palantia monstra sequuntur.
 506 Sicut, prorupti tonuit cum forte Vesevi
 507 Hesperiae letalis apex, vixdum ignea montem
 508 torsit hiems jamque eoas cinis induit urbes,
 509 turbine sic rapido populos atque aequora longe
 510 transabeunt nullaque datur considerare terra.

511 Jamque et ad Ionii metas atque ultima tendunt
 512 saxa (vocat magni Strophadas nunc accola ponti).
 513 Hic fessae letique metu propioris anhelae
 514 dum trepidant humilique graves timidoque volatu
 515 implorant clamore patrem Typhona nefando,
 516 extulit adsurgens noctem pater imaque summis
 517 miscuit et mediis vox exaudita tenebris :
 518 "Jam satis huc pepulisse deas. Cur tenditis ultra
 519 in famulas saevire Jovis quas, fulmina quamquam
 520 aegidaque ille gerens, magnas sibi legit in iras ?
 521 Nunc quoque Agenoreis idem decedere tectis
 522 imperat ; agnoscunt monitus jussaeque recedunt.
 523 Mox tamen et vobis similis fuga, cum premet arcus
 524 letifer. Harpyiae nunquam nova pabula quaerent
 525 donec erunt divum meritae mortalibus irae."
 526 Haesit uterque polo dubiisque elanguit alis ;
 527 mox abit et sociae victor petit agmina pubis.
 528 Interea Minyae pulsa lue prima Tonanti
 529 sacra novant ; tum vina toris epulasque reponunt.
 530 Ipse inter medios ceu dulcis imagine somni
 531 laetus ab oblitae Cereris suspirat honores ;
 532 agnoscit Bacchi latices, agnoscit et undam
 533 et nova non pavidae miratur gaudia mensae.
 534 Hunc ubi reclinem stratis et pace fruentem
 535 aspicit ac longae ducentem obliviam poenae,
 536 talibus appellat supplexque ita fatur Iason :
 537 "Vota, senex, perfecta tibi ; nunc me quoque curis
 538 eripe et ad nostros animum converte labores.
 539 Omnis adhuc sors laeta quidem, nec numine vano,
 540 siqua fides curae superum, tantum aequor adorti
 541 tendimus : ipsa mihi puppem Jovis optima proles
 542 instituit, dedit et socios Saturnia reges,
 543 fidere mens sed nostra nequit, quantumque propinquat
 544 Phasis et ille operum summus labor, hoc magis angunt
 545 proxima, nec vates sat jam mihi Mopsus et Idmon."
 546 Ille ducem nec ferre preces nec dicere passus
 547 amplius hic demum vittas laurumque capessit
 548 numina nota ciens. Stupet Aesonis inclita proles
 549 Phinea ceu nunquam poenis nullaque gravatum
 550 peste Jovis : tam largus honos, tam mira senectae
 551 majestas infusa ; vigor novus auxerat artus.
 552 Tum canit : "O terras fama venture per omnes
 553 quem sociis ducibusque deis atque arte benigna
 554 Pallados ipse ultro Pelias ad sidera tollit
 555 demens, dum profugi non sperat vellera Phrixi,
 556 fata locosque tibi, possum quas reddere grates,
 557 expediam rerumque vias finemque docebo.
 558 Ipse etiam, qui me prohibet sua pandere terris
 559 saecula, te propter fandi mihi Juppiter auctor.
 560 Hinc iter ad Ponti caput errantesque per altum
 561 Cyaneas. Furor his medio concurrere ponto
 562 necdum ullas videre rates ; sua cominus actae
 563 saxa premunt cautesque suas. Cum vincula mundi
 564 ima labent, tremere ecce solum, tremere ipsa repente
 565 tecta vides : illae redeunt, illae aequore certant.
 566 Di tibi progresso propius, di forsitan ipsi
 567 auxilium mentemque dabunt. Ast ipse juvare
 568 ausa quibus monitis possim tua ? Quippe per altum

569 tenditis unde procul venti, procul unde volucres,
570 et pater ipse maris pavidas detorquet habenas.
571 Siqua brevis scopulis fieret mora, si semel orsis
572 ulla quies, fuga tunc medio properanda recursu :
573 vix repetunt primae celeres confinia terrae
574 jamque alio clamore ruunt omnisque tenetur
575 pontus et infestis anceps cum montibus errat.
576 Verum animo redit illa meo sors cognita divum
577 (fabor enim nec spe dubios solabor inani) :
578 cum mihi Tartareas saevo clangore volucres
579 protulit ira Jovis, vox haec simul excidit auris :
580 "Ne vanas impende preces finemque malorum
581 expete, Agenoride ; Pontum penetraverit una
582 cum ratis et rabidi steterint in gurgite montes,
583 tum sperare modum poenae veniamque licebit."
584 Sic deus. Aut vobis ergo fera saxa patescunt
585 aut mea jam saevae redeunt ad pabula Dirae.
586 Verum inter medias dabitur si currere cautes
587 (certe digna manus) vacuumque exhibis in aequor,
588 proxima regna Lyci, remeat qui victor ab oris
589 Bebryciis. Toto non ullus litore Ponti
590 mitior. Hic lecto comitum de robore siquem
591 perculerit vicina lues, ne defice casus
592 praedicti memor, atque animos accinge futuris.
593 Illic pestiferas subter juga concava torquet
594 alter aquas Acheron vastoque exundat hiatu
595 fumeus et caeca sequitur caligine campus.
596 Linque gravem fluvium et miseris sua fata colonis ;
597 sic quoque non uno dabitur transcurrere luctu.
598 Quid tibi nubifera surgentem rupe Carambin,
599 quid memorem quas Iris aquas aut torqueat Ancon ?
600 Proxima Thermodon hinc jam secat arva ; memento :
601 inclita Amazonidum magnoque exorta Gradivo
602 gens ibi ; femineas nec tu nunc crede catervas
603 sed qualis, sed quanta viris insultat Enyo
604 divaque Gorgonei gestatrix innuba monstri.
605 Ne tibi tunc horrenda rapax ad litora puppem
606 ventus agat ludo volitans cum turma superbo
607 pulvereis exsultat equis ululataque tellus
608 intremittit et pugnas mota pater incitat hasta.
609 Non ita sit metuenda tibi saevissima quamquam
610 gens Chalybum, duris patiens cui cultus in arvis
611 et tonat adflicta semper domus ignea massa.
612 Inde omnem innumeri reges per litoris oram
613 hospitii quis nulla fides ; sed limite recto
614 puppis et aequali transcurrat carbasus aura.
615 Sic demum rapidi venies ad Phasidis amnem.
616 Castra ibi jam Scythiae fraterna surgit Erinys.
617 Ipse truces illic Colchos hostemque juvabis
618 auxiliis. Nec plura equidem discrimina cerno ;
619 fors etiam optatam dabitur contingere pellem.
620 Sed te non animis nec solis viribus aequum
621 credere : saepe acri potior prudentia dextra.
622 Quam tulerit deus, arripe opem. Jamque ultima nobis
623 promere fata nefas : sileo prior." Atque ita facto
624 fine dedit tacitis superum responsa tenebris.
625 Tum subita resides socios formidine Iason
626 praecipitat rumpitque moras tempusque timendi.

627 Ipse viros gradiens ad primi litoris undam
628 prosequitur Phineus. "Quaenam tibi praemia", dixit,
629 "quas, decus o Boreae, possim persolvere grates ?
630 Me Pangaea super rursus juga meque paterna
631 stare Tyro dulcesque iterum mihi surgere soles
632 nunc reor. Exactae (verumne ?) abiere volucres
633 nec metuam, tutaeque dapes ? Date tangere vultus,
634 dem sinite amplexus, propiusque accedite dextrae."
635 Dixerat. Abscedunt terris et litora condunt.
636 Omnibus extemplo saeva sub imagine rupes
637 Cyanaeae propiorque labor. Quando adfore quaque
638 parte putent ? Stant ora metu nec fessa recedunt
639 lumina diversas circum servantibus undas,
640 cum procul auditi sonitus insanaque saxa,
641 (saxa neque illa viris sed praecipitata profundo
642 siderei pars visa poli), dumque ocius instant
643 ferre fugam maria ante ratem, maria ipsa repente
644 deficere adversosque vident discedere montes,
645 omnibus et gelida rapti formidine remi.
646 Ipse per arma volans et per juga summa carinae
647 hortatur supplexque manus intendit Iason
648 nomine quemque premens. "Ubi nunc promissa superba
649 ingentesque minae mecum quibus ista secuti ?
650 Idem Amyci certe viso timor omnibus antro
651 inciderat ; stetimus tamen et deus adfuit ausis.
652 Quin iterum idem aderit, credo, deus." Haec ubi fatus,
653 corripit abjecti remumque locumque Phaleri
654 et trahit ; insequitur flammata pudore juvenus.
655 Unda laborantes praeceps rotat ac fuga ponti
656 obvia ; miscentur rupes, jamque aequore toto
657 Cyanaeae juga praecipites infisa remittunt.
658 Bis fragor infestas cautes adversaque saxis
659 saxa dedit, flamma expresso bis fulsit in imbri.
660 Sicut multifidus ruptis e nubibus horror
661 effugit et tenebras nimbosque intermicat ignis
662 terrificique ruunt tonitrus elisaque noctem
663 lux dirimit (pavor ora virum, pavor occupat aures) :
664 haud secus implevit pontum fragor ; effluit imber
665 spumeus et magno puppem procul aequore vestit.
666 Advertere dei defixaque lumina ponto,
667 quid scopulis praeclusa ratis, quid dura juvenus
668 expediat ; pendet magnis favor ortus ab ausis.
669 Prima coruscanti signum dedit aegide virgo
670 fulmineam jaculata facem. Vixdum ardua cautes
671 cesserat, illa volans tenui per concita saxa
672 luce fugit ; rediere viris animique manusque
673 ut videre viam. "Sequor, o quicumque deorum"
674 Aesonides "vel fallis" ait praecepsque fragores
675 per medios ruit et fumo se condidit atro.
676 Coeperat hinc cedens abductis montibus unda
677 ferre ratem pelagoque dies occurrere aperto.
678 Sed neque permissis jam fundere rector habenis
679 vela neque eniti remis pote, cum super adsunt
680 Cyanaeae. Premit umbra ratem scopulique feruntur
681 comminus. Hic Juno praecepsque ex aethere Pallas
682 insiliunt pariter scopulos : hunc nata coercet,
683 hunc conjunx Jovis, ut valido qui robore tauros
684 sub juga et invito detorquet in ilia cornu.

685 Inde, velut mixtis Vulcanius ardor harenis
686 verset aquas, sic ima fremunt, fluctuque coacto
687 angitur et clausum scopulos super effluit aequor.
688 Contra omnes validis tenui discrimine remis
689 pergere iter mediosque ratem transferre per ictus.
690 Saxa sed extremis tamen increpuere corymbis
691 parsque (nefas !) deprensa jugis ; nam cetera caelo
692 debita. Conclamant Minyae, latera utraque quippe
693 dissiluisse putant. Fugit ipse novissimus ictus
694 Tiphys et e mediis sequitur freta rapta ruinis
695 nec prius obsessum scopulis respexit ad aequor
696 aut sociis temptata quies nigrantia quam jam
697 litora longinquique exirent flumina Rhebae.
698 Tunc fessas posuere manus, tunc arida anhel
699 pectora, discussa quales formidine Averni
700 Alcides Theseusque comes pallentia jungunt
701 oscula vix primis amplexi luminis oris.
702 Nec vero ipse metus curasque resolvere ductor
703 sed maria aspectans : "Heu qui datus iste deorum
704 sorte labor nobis ! Serum ut veniamus ad amnem
705 Phasidis et mites", inquit, "dent vellera Colchi,
706 unde per hos iterum montes fuga ? " Talia fundit
707 imperio fixos Jovis aeternumque revinctos
708 nescius. Id fati certa nam lege manebat
709 siqua per hos undis unquam ratis isset apertis.
710 Tum freta, quae longis fuerant impervia saeculis,
711 ad subitam stupere ratem, Pontique jacentis
712 omne solum regesque patent gentesque repostae.
713 Non alibi effusis cesserunt longius undis
714 litora nec, tantas quamvis Tyrrhenus et Aegon
715 volvat aquas, geminis et desint Syrtibus undae.
716 Nam super huc vastos tellus quoque congerit amnes.
717 Non septemgemi memorem quas exitus Histri,
718 quas Tanais flavusque Tyres Hypanisque Novasque
719 addat opes quantosque sinus Maeotia laxent
720 aequora. Flumineo sic agmine fregit amari
721 vim salis hinc Boreae cedens glaciantibus auris
722 Pontus et exorta facilis concreescere bruma.
723 Utque vel immotos Ursae rigor invenit amnes
724 vel freta versa vadis, hiemem sic unda per omnem
725 aut campo jacet aut tumido riget ardua fluctu ;
726 atque hac Europam curvis anfractibus urget,
727 hac Asiam, Scythicum specie sinuatus in arcum.
728 Illic umbrosae semper stant aequore nubes
729 et non certa dies primo nec sole profundum
730 solvitur aut vernis cum lux aequata tenebris,
731 sed redit extremo tandem in sua litora Tauro.
732 Jam Mariandynis advertit puppis harenis
733 atque celer terras regemque exquirat Echion
734 dicta ferens, lectos (fama est si nominis unquam)
735 Haemoniae subiisse viros, det litora fessis.
736 Adproperat Lycus auditis laetatus Achivis
737 ac simul Aesoniden omnemque in regia turbam
738 tectata trahit modo Bebryciis praefixa tropaeis
739 mitis et in mediis effatur talia Graeis :
740 "Haud temere est : fato divum reor ad mea vectos
741 litora vos, odium quibus atque eadem ira furentis
742 Bebryciae saevaue pares de gente triumphis.

743 Certa fides animis, idem quibus incidit hostis.
 744 Nos quoque, nos Amycum, tanto procul orbe remoti,
 745 sensimus et saevis frater mihi fusus harenis.
 746 Ultor ego atque illuc cunctis accensus in armis
 747 tunc aderam cum vos mediis contenta ferebant
 748 vela fretis. Illum in sanie taboque recenti
 749 vidimus aequoreo similem per litora monstro.
 750 Nec vero praecepta mihi suprema tyranni
 751 fata queror bello magis laetarer et armis
 752 procubuisse meis, quam lege quod occidit ultus
 753 ipse sua meritoque madent quod sanguine caestus."
 754 Excipit Aesonides : "Tuus ergo in montibus ignis
 755 ille ? Tuas acies medio de gurgite vidi ? "
 756 fatur et ostentans prolem Jovis "Hic tibi Pollux
 757 en" ait, "invito solvit cui pectore poenas."
 758 Ille virum circa mirantia lumina volvit.
 759 Festa dehinc mediis ineunt convivium tectis
 760 communesque vocant superos, quorum eruta nutu
 761 Bebrycia, et votis pariter praedaque fruuntur.

AR_5 v.1 Altera lux haud laeta viris emersit Olympo :
 2 Argolicus morbis fatisque rapacibus Idmon
 3 labitur extremi sibi tum non inscius aevi.
 4 At memor Aesonides nimium jam vera locuti
 5 Phineos hinc alios rapto pavet Idmone luctus.
 6 Tum comiti pia justa tulit caelataque multa
 7 arte Dolionii donat velamina regis,
 8 hospes humum sedemque Lycus. Flens arma revellit
 9 Idmonis e celsa Mopsus rate. Robora caedunt
 10 pars silvis portantque arae, pars auguris alba
 11 fronde caput vittisque ligant positumque feretro
 12 congemuere ; dies simul et suus admonet omnes.
 13 Ecce inter lacrimas interque extrema virorum
 14 munera, quem cursus penes imperiumque carinae,
 15 Tiphyn agit violenta lues, cunctique pavore
 16 attoniti fundunt maestas ad sidera voces :
 17 "Arquipotens adverte, precor, nunc denique, Apollo :
 18 hoc, pater, hoc nobis refove caput, ulla laboris
 19 si nostri te cura movet, qui cardine summo
 20 vertitur atque omnis manibus nunc pendet ab unis."
 21 Dicta dabant ventis nec debita fata movebant.
 22 Qualem praecipiti gravidum jam sorte parentem
 23 natorum flet parva manus trepidique precantur
 24 duret ut invalidis et adhuc genitoris egenis,
 25 haud aliter socii supremo in tempore Tiphyn
 26 ante alios superesse volunt. Mors frigida contra
 27 urget et ille recens oculis intervolat Idmon.
 28 Exanimum frustra Minyae clamore morantur
 29 avellique negant ; vix membra rigentia tandem
 30 imposuere rogo lacrimasque et munera flammis
 31 vana ferunt : crescit donis feralis acervus.
 32 Ut vero amplexus fessi rupere supremos
 33 et rapidae sonuere faces, tunc ipsa cremari
 34 visa ratis medioque viros deponere ponto.
 35 Non tulit Aesonides geminis flagrantia cernens

36 corpora cara rogis, sed pectore ductor ab imo
37 talia voce gemit : "Quid tantum infensa repente
38 numina ? Quas nostri poenas meruere labores ?
39 Bina (nefas !) tuto pariter mihi funera surgunt
40 litore. Magna adeo comitum numerosaque pubes ?
41 Aut socios rapit atra dies aut ipse relinquo
42 sontibus impulsus Furiis. Ubi Tiphys ? Ubi Idmon
43 fata canens ? Ubi monstriferae par ille novercae ?
44 Te sine, Thespiade, nos ulla movebimus ultra
45 aequora ? Nec summa speculantem puppe videbo
46 Pleiadumque globos et agentes noctibus Arctos ?
47 Cui Minyas caramque ratem, cui sidera tradis ?
48 Carpere securas quis jam jubet Aesona noctes ?
49 Hoc labor, hoc dulci totiens fraudata sopore
50 lumina et admotis nimium mens anxia Colchis
51 profuit ? Heu quantum Phasis, quantum Aea recessit !
52 Nunc quoque, si tenui superant in imagine curae,
53 adsis umbra, precor, venturi praescia caeli
54 rectoremque tuae moneas ratis." Haec ubi fatus,
55 sola virum flammis vidit labentibus ossa.
56 "Quod tamen externis unum solamen in oris
57 restat", ait, "caras humus haec non dividat umbras,
58 ossaque nec tumulo nec separe contegat urna,
59 sed simul, ut junctis venistis in aequora fatis."
60 Haud mora : relliquias socii defletaque miscent
61 nomina ; tum vivo frondens e caespite tellus
62 aggeritur cineremque Lyco commendat Iason.
63 Maesti omnes dubiique ratem fidissima cujus
64 dextra regat. Simul Ancaeus sollersque petebat
65 Nauplius. Erginum fato vocat ipsa monenti
66 quercus et ad tonsas victi rediere magistri.
67 Ac velut ille, gregis cessit cui regia, taurus
68 fertur ovans (hunc omnis honos, hunc omnis in unum
69 transit amor), primos laeto sic pectore rector
70 ingreditur cursus ; etenim dat candida certam
71 nox Helicen. Jam prora fretum commoverat et jam
72 puppe sedens tristes dimiserat ancora terras.
73 Inde premente Noto tristes Acherusidos oras
74 praeterit et festa vulgatum nocte Lyaei
75 Callichoron, nec vana fides : his Bacchus in undis
76 abluit eoo rorantes sanguine thyrsos.
77 Illum post acies Rubrique novissima claustra
78 Aequoris hic resides thiasos, hic aera moventem
79 udaqque pampinea nectentem cornua vitta
80 nunc etiam meministis, aquae, Boeotia qualem
81 Thyias et infelix cuperet vidisse Cithaeron.
82 Fama per extremos quin jam volat improba manes
83 interea et magnis natorum laudibus implet,
84 addita jamque fretis repetens freta jamque patentes
85 Cyaneas. Ardent avidos attollere vultus
86 quos pietas vel tangit adhuc quos aemula virtus.
87 Fata immota manent ; unum, qui litore in illo
88 conditus, ad carae mittunt spectacula turbae.
89 It Sthenelus. Qualem Mavortia vidit Amazon
90 cumque suis comitem Alcides ut condidit armis,
91 talis ab aequorei consurgens aggere busti
92 emicuit ; fulsere undae, sol magnus ut orbem
93 tolleret aut nubem quateret polus. Atque ea vixdum

94 visa viris atra nox protinus abstulit umbra.
 95 Ille dolens altum repetit Chaos. Omina Mopsus
 96 dum stupet, in prima tumulum procul aspicit acta
 97 obnubensque caput cineri dat vina vocato.
 98 Carmina quin etiam visos placantia manes
 99 Odrysius dux rite movet mixtoque sonantem
 100 percutit ore lyram nomenque relinquit harenis.
 101 Altius hinc ventos recipit ratis ac fugit omne
 102 Crobiali latus et fatis tibi, Tiphy, negatum
 103 Parthenium, ante alios Triviae qui creditur amnis
 104 fidus et Inopi materna gratior unda.
 105 Mox etiam Cromnae juga pallentemque Cytoron
 106 teque cita penitus condunt, Erythia, carina.
 107 Jamque reducebat noctem polus : alta Carambis
 108 raditur et magnae pelago tremuit umbra Sinopes.
 109 Assyrios complexa sinus stat opima Sinope,
 110 nympha prius blandosque Jovis quae luserat ignes
 111 caelicolis immota procis : deceptus amatae
 112 fraude deae nec solus Halys nec solus Apollo.
 113 Addidit hic casu comites fortuna benigno
 114 Autolycum Phlogiumque et Deileonta, secutos
 115 Herculis arma viros ; vagus hos ibi fixerat error.
 116 Ut Graiam videre manum puppemque Pelasgam,
 117 prima ruunt celeres ad litora seque precantur
 118 accipiant socios. Nova dux accedere gaudet
 119 nomina, desertos et jam sibi currere remos.
 120 Transit Halys longisque fluens anfractibus Iris
 121 saevaque Thermodon medio sale murmura volvens,
 122 Gradivo sacer et spoliis ditissimus amnis,
 123 donat equos, donat votas cui virgo secures
 124 cum redit ingenti per Caspia claustra triumpho
 125 Massageten Medumque trahens. Est vera propago
 126 sanguinis, est ollis genitor deus. Hinc magis alta
 127 Haemonidae petere et monitus non temnere Phinei.
 128 Ipse autem comitum conversus ad ora novorum
 129 "Vos mihi nunc pugnas" ait "et victricia" ductor
 130 "Herculis arma mei vestrasque in litore Martis
 131 interea memorate manus." Sic fatus et aegro
 132 corde silens audit casus bellicae labores
 133 virginei, exciderit frenis quae prima remissis,
 134 semianimem patrius quam sanguine vexerit amnis,
 135 quae pelta latus atque umeros nudata pharetris
 136 fugerit Herculeae mox vulnere prensa sagittae,
 137 utque securigeras stimulaverit Ira catervas
 138 fleturusque pater, quantus duce terror in ipsa,
 139 qui furor, insignis quo balteus arserit auro.
 140 Nocte sub extrema clausis telluris ab antris
 141 pervigil auditur Chalybum labor : arma fatigant
 142 ruricolae, Gradive, tui ; sonat illa creatrix
 143 prima manus belli terras crudelis in omnes.
 144 Nam prius ignoti quam dura cubilia ferri
 145 eruerent ensesque darent, Odia aegra sine armis
 146 errabant Iraeque inopes et segnis Erinys.
 147 Inde Genetaei rupem Jovis, hinc Tibarenum
 148 dant virides post terga lacus, ubi deside mitra
 149 feta ligat partuque virum fovet ipsa soluto.
 150 Vos quoque non notae mirati vela carinae
 151 Mossynoeci, et vos stabulis, Macrones, ab altis

152 Byzeresque vagi Philyraeque a nomine dicta
153 litora quae cornu pepulit Saturnus equino.
154 Ultimus inde sinus saevumque cubile Promethei
155 cernitur, in gelidas consurgens Caucasus Arctos.
156 Ille etiam Alciden Titania fata morantem
157 attulerat tum forte dies : jamque aspera nisu
158 undique convellens veteris cum strage pruinae
159 vincula presa manu saxis abduxerat imis
160 arduus et laevo gravior pede ; consonat ingens
161 Caucasus et summo pariter cum monte secutae
162 incubuere trabes abductaque flumina ponto.
163 Fit fragor aetherias ceu Juppiter arduus arces
164 impulerit, manus aut imas Neptunia terras ;
165 horruit immensum Ponti latus, horruit omnis
166 Armeniae praetentus Hiber penitusque recusso
167 aequore Cyaneas Minyae timuere relictas.
168 Tum gemitu propiore chalybs densusque revulsis
169 rupibus audiri montis labor et grave Titan
170 vociferans, fixos scopulis dum vellitur artus.
171 Contra autem ignari (quis enim nunc credat in illis
172 montibus Alciden dimissave vota retemptet ?)
173 pergere iter socii. Tantum mirantur ab alto
174 litora discussa sterni nive ruptaque saxa
175 et simul ingentem moribundae desuper umbram
176 alitis atque atris rorantes imbribus auras.
177 Sol propius flammabat aquas extremaque fessis
178 coeperat optatos jam lux ostendere Colchos,
179 magnus ubi adversum spumanti Phasis in aequor
180 ore ruit. Cuncti pariter loca debita noscunt
181 signaque commemorant emensasque ordine gentes
182 dantque ratem fluvio. Simul aethere frena corusco
183 Pallas et alipedum Juno juga sistit equorum.
184 Ac dum prima gravi ductor subit ostia pulsu,
185 populeos flexus tumulumque virentia supra
186 flumina cognati medio videt aggere Phruxi,
187 quem comes infelix Pario de marmore juxta
188 stat soror, hinc saevae formidine maesta novercae,
189 inde maris pecudique timens imponere palmas.
190 Sistere tum socios jubet atque hinc prima ligari
191 vincula ceu Pagasas patriumque intraverit amnem.
192 Ipse gravi patera sacri libamina Bacchi
193 rite ferens umbram vocat et sic fatur ad aras :
194 "Per genus atque pares tecum mihi, Phruxe, labores,
195 te precor orsa regas meque his tuteris in oris
196 tot freta, tot prora properanti sidera passum.
197 Phruxe, fave et patrias placidus reminiscere terras.
198 Tu quoque nunc, tumulo nequiquam condita inani,
199 adnue, diva maris, numeroque accede tuorum.
200 Quando egomet rursus per te vehar ? Aurea quando
201 Seston et infaustos agnoscent vellera fluctus ?
202 Vos etiam silvae, vos Colchidos hospitis orae,
203 pandite dives ubi pellis micet arbore sacra.
204 Tunc tibi, fecundi proles Jovis, orte nivali
205 Arcados axe deae, fluvio modo, Phasi, quieto
206 Palladium patiare ratem, nec dona nec arae
207 defuerint tellure mea : venerenda fluentis
208 effigies te, Phasi, manet, quam magnus Enipeus
209 et pater aurato quantus jacet Inachus antro."

210 Dixerat atque illi dextra sine versa magistri
211 protinus in proram rediit ratis omine certo,
212 fluminis os pontumque tuens. "Promittis ut ecce
213 utque vocas, revehemur", ait. Sic deinde precatus
214 arma jubet celsa socios depromere puppe ;
215 dona dehinc Bacchi casusque ut firmet in omnes
216 rapta Ceres viridesque premunt longo ordine ripas.
217 Incipe nunc cantus alios, dea, visaque vobis
218 Thessalici da bella ducis. Non mens mihi, non haec
219 ora satis : ventum ad furias infandaque natae
220 foedera et horrenda trepidam sub virgine puppem ;
221 impia monstriferis surgunt jam proelia campis.
222 Ante dolos, ante infidi tamen exsequar astus
223 Soligenae falli meriti meritique relinqui,
224 inde canens : Scythica senior jam Solis in urbe
225 fata laborati Phrixus compleverat aevi.
226 Illius extremo sub funere mira repente
227 flamma poli magnoque aries apparuit astro
228 aequora cuncta movens. At vellera Martis in umbra
229 ipse sui Phrixus monumentum insigne pericli
230 liquerat ardenti quercum complexa metallo.
231 Quondam etiam tacitae visus per tempora noctis
232 effigie vasta socerumque exterruit ingens
233 prodita vox : "O qui patria tellure fugatum
234 quaerentemque domos his me considerare passus
235 sedibus, oblata generum mox prole petisti,
236 tunc tibi regnorum labes luctusque supersunt
237 rapta soporato fuerint cum vellera luco.
238 Praeterea infernae quae nunc sacrata Dianae
239 fert castos Medea choros, quaecumque procorum
240 pacta petat, maneat regnis ne virgo paternis !"
241 Dixit et admota pariter fatalia visus
242 tradere terga manu ; tum falso fusus ab auro
243 currere per summi fulgor laquearia tecti.
244 Membra toris rapit ille tremens patriumque precatur
245 numen et Eoo surgentes litore currus :
246 "Haec tibi fatorum, genitor, tutela meorum,
247 omnituens, tua nunc terris, tua lumina toto
248 sparge mari ; seu nostra dolos molitur opertos
249 sive externa manus, primus mihi nuntius esto.
250 Tu quoque, sacrata rutilant cui vellera quercu,
251 excubias, Gradive, tene ; praesentia luco
252 arma tubaeque sonent, vox et tua noctibus exstet."
253 Vix ea Caucaseis cum lapsus montibus anguis,
254 haud sine mente dei spiris, nemus omne refusis
255 implicuit Graiumque procul respexit ad orbem.
256 Ergo omnes prohibere minas praedictaque Phrivi
257 invigilat plena necdum Medea juvena
258 adnuitur thalamis Albani virgo tyranni.
259 Interea auguriis monstrisque minacibus urbem
260 territat ante monens semper deus, et data seri
261 signa mali. Reddi jubet exitiale sacerdos
262 vellus et Haemoniis infaustum mittere terris.
263 Contra Sole satus Phrivi praecepta volutans
264 aegro corde negat, nec vulgi cura tyranno
265 dum sua sit modo tuta salus. Tunc ordine regi
266 proximus et frater materno sanguine Perses
267 increpitare virum ; sequitur duce turba reperto.

268 Ille furens ira solio se proripit alto
 269 praecipitatque patres ipsumque, ut talibus ausis
 270 spem sibi jam rerum vulgi levitate serentem,
 271 ense petit. Rapit inde fugam crudelia Perses
 272 signa gerens omnemque quatit rumoribus Arcton.
 273 Jamque aderat magnis regum cum milibus urbi,
 274 primaque in adversos frustratus proelia muros
 275 constiterat, datus et sociis utrimque cremandis
 276 ille dies alterque dies, cum Marte remisso
 277 debitus Aeaeis dux Thessalus adpulit oris.
 278 Nox hominum genus et duros miserata labores
 279 rettulerat fessis optata silentia terris.
 280 At Juno et summi virgo Jovis intima secum
 281 consilia et varias sociabant pectore curas.
 282 Virgo prior : "Magna pariter quos mole petimus,
 283 cernis", ait, "Colchos habeant quae proelia quique
 284 nunc status : hinc Perses, illinc non viribus aequis
 285 apparat Aeetes aciem. Quibus addimur armis ? "
 286 Cui Juno : "Dimitte metus ne proelia forte
 287 nunc tibi grata negem : manet ingens aegida sudor
 288 et nostros jam sudor equos. Stat pectore fixum
 289 Aeetae sociare manus. Scio perfida regis
 290 corda quidem (nullos Minyis exsolvet honores),
 291 verum alios tunc ipsa dolos, alia orsa movebo."
 292 "Sint precor haec. Tua namque mihi comitanda potestas"
 293 Pallas ait, "liceat Graeis ut reddere terris
 294 Aesonium caput et puppem quam struximus ipsae
 295 jactatam tandem nostro componere caelo."
 296 Talia tunc hominum superi pro laude movebant.
 297 Tristior at nunquam tantove paventibus ulla
 298 nox Minyis egesta metu : nil quippe reperto
 299 Phasidae, nil domitis actum Symplegados undis
 300 cunctaque adhuc, magni veniant dum regis ad urbem,
 301 ambigua et dubia rerum pendentia summa.
 302 Praecipue Aesoniden varios incerta per aestus
 303 mens rapit undantem curis ac multa moventem.
 304 Qualiter ex alta cum Juppiter arce coruscat
 305 Pliadas ille movens mixtumque sonoribus imbrem
 306 horriferaeque nivem, canis ubi tollitur omnis
 307 campus aquis, aut sanguinei magna ostia Belli
 308 aut alios durus fatorum gentibus ortus,
 309 sic tum diversis hinc atque hinc motibus anceps
 310 pectora dux crebro gemitu quatit, optat et alium
 311 jam jubar et certi tandem discriminis horas.
 312 Tunc defixa solo coetuque intenta silenti
 313 versus ad ora virum : "Quod primum ingentibus ausis
 314 optavistis", ait, "veterumque quod horruit aetas,
 315 adsumus en tantumque fretis enavimus orbem.
 316 Nec pelagi nos mille viae nec fama fefellit
 317 soligenam Aeeten media regnare sub Arcto.
 318 Ergo ubi lux altum sparget mare, tecta petenda
 319 urbis et ignoti mens experienda tyranni.
 320 Adnuet ipse, reor, (neque inexorabile certe)
 321 quod petimus. Sin forte preces et dicta superbus
 322 respuerit (jam nunc animos firmate repulsae !
 323 Quaque via patriis referamus vellera terris !
 324 Stet procul et rebus semper pudor absit in artis !"
 325 Dixerat et Scythicam qui se comitentur ad urbem

326 sorte legit numeroque novem ducuntur ab omni.
327 Inde viam qua Circaeï plaga proxima campi
328 corripiunt regemque petunt jam luce reducta.
329 Forte deum variis per noctem territa monstris,
330 senserat ut pulsas tandem Medea tenebras,
331 rapta toris primi jubar ad placabile Phoebi
332 ibat et horrendas lustrantia flumina noctes.
333 Namque soporatos tacitis in sedibus artus
334 dum premit alta quies nullaeque in pectore curae,
335 visa pavens castis Hecates excedere lucis ;
336 dumque pii petit ora patris, stetit arduus inter
337 pontus et ingenti circum est stupefacta profundo,
338 fratre tamen conante sequi. Mox stare paventes
339 viderat intenta pueros nece seque trementem
340 spargere caede manus et lumina rumpere fletu.
341 His turbata minis fluvios ripamque petebat
342 Phasidis aequali Scythidum, comitante caterva.
343 Florea per verni qualis juga duxit Hymetti
344 aut Sicula sub rupe choros, hinc gressibus haerens
345 Pallados, hinc carae Proserpina juncta Dianae,
346 altior ac nulla comitum certante, priusquam
347 palluit et viso pulsus decor omnis Averno,
348 talis et in vittis geminae cum lumine taedae
349 Colchis erat, nondum miseros exosa parentes.
350 Ut procul extremi gelidis a fluminis undis
351 prima viros tacito vidit procedere passu,
352 substitit ac maesto nutricem adfata timore est :
353 "Quae manus haec, certo ceu me petat agmine, mater,
354 advenit haud armis, haud unquam cognita cultu ?
355 Quaere fugam, precor, et tutos circumspice saltus."
356 Audit virginei custos grandaeva pudoris
357 Henioche, cultus primi cui creditus aevi ;
358 tum trepidam dictis firmans hortatur alumnam :
359 "Non tibi ab hoste minae nec vis", ait, "ulla propinquat
360 nec metus ; externo jam flammea murice cerno
361 tegmina, jam vittas frondemque imbellis olivae.
362 Graius adest : Graio sunt cuncta simillima Phrixo."
363 Sic ait. At Juno, pulchrum longissima quando
364 robur cura ducis magnique edere labores,
365 mole nova et roseae perfudit luce juventae.
366 Jam Talaum jamque Ampyciden astroque comantes
367 Tyndaridas ipse egregio supereminet ore,
368 non secus autumnno quam cum magis asperat ignes
369 Sirius et saevo cum nox accenditur auro
370 luciferas crinita faces, hebet Arcas et ingens
371 Juppiter ; ast illum tanto non gliscere caelo
372 vellet ager, vellent calidis jam fontibus amnes.
373 Regina, attonito quamquam pavor ore silentem
374 exanimet, mirata tamen paulumque reductis
375 passibus in solo stupuit duce. Nec minus inter
376 ille tot ignoti socias gregis haeret in una
377 defixus sentitque ducem dominamque catervae.
378 "Si dea, si magni decus huc ades", inquit, "Olympi,
379 has ego credo faces, haec virginis ora Dianae,
380 teque renodatam pharetris ac pace fruentem
381 ad sua Caucaseae producunt flumina nymphae.
382 Si domus in terris atque hinc tibi gentis origo,
383 felix prole parens, olimque beatior ille

384 qui tulerit longis et te sibi junxerit annis.
385 Sed fer opem, regina, viris : nos hospita pubes
386 advehimur, Graium proceres tua tecta petentes.
387 Duc ,precor, ad vestri quicumque est ora tyranni
388 ac tu prima doce fandi tempusque modumque ;
389 nam mihi sollicito deus ignaroque locorum
390 te dedit ; in te nos atque omnia nostra repono."
391 Dixit et opperiens trepidam stetit. Illa parumper
392 virgineo cunctata metu sic orsa vicissim :
393 "Quem petis, Aetes, genitor meus, ipsaque juxta
394 moenia, si vivos possis discernere calles :
395 hac adeo duce ferte gradus ; ingentia namque
396 castra alios aditus atque impius obsidet hostis."
397 Dixerat haec patriumque viam detorquet ad amnem
398 sacraque terrificae supplex movet irrita Nocti.
399 Ille autem inceptum famula duce protinus urget
400 aere saeptus iter, patitur nec regia cerni
401 Juno virum prior Aetae ne nuntius adsit.
402 Jamque inerat populo mediaeque incognitus urbi,
403 cum comes orsa loqui : "Phoebi genitoris ad aras
404 ventum", ait. "Huc adytis jam se de more paternis
405 rex feret ; hic proceres audit populosque precantes
406 adloquiis facilis. Praesens pater admonet aequi."
407 Dixerat. Ast illi propere monstrata capessunt
408 limina, non aliter quam si radiantis adirent
409 ora dei verasque aeterni luminis arces ;
410 tale jubar per tecta micat. Stat ferreus Atlans
411 Oceano, genibusque tumens infringitur unda.
412 At medii per terga senis rapit ipse nitentes
413 altus equos curvoque diem subtexit Olympo ;
414 pone rota brevior soror densaeque sequuntur
415 Pliades et madidis rorantes crinibus ignes.
416 Nec minus hinc varia dux laetus imagine templi
417 ad geminas fert ora fores, cunabula gentis
418 Colchidos hic ortusque tuens, ut prima Sesostris
419 intulerit rex bella Getis, ut clade suorum
420 territus hos Thebas patriumque reducat ad amnem,
421 Phasidis hos imponat agris Colchosque vocari
422 imperet. Arsinoen illi tepidaeque requirunt
423 otia laeta Phari pinguemque sine imbris annum,
424 et jam Sarmaticis permutant carbasa braxis.
425 Barbarus in patriis sectatur montibus Aean
426 Phasis amore furens : gravidas jacit illa pharetras
427 virgineo turbata metu, discursibus et jam
428 deficit ac volucris victam deus alligat unda.
429 Flebant populeae juvenem Phaethonta sorores,
430 ater et Eridani trepidum globus ibat in amnem ;
431 at juga vix Tethys sparsumque recolligit axem
432 et formidantem patrios Pyroenta dolores.
433 Aurea quin etiam praesaga Mulciber arte
434 vellera venturosque olim caelarat Achivos :
435 textitur Argea pinus Pagasaea securi ;
436 jamque eadem remos, eadem dea flectit habenas.
437 Ipsa subit nudaque vocat dux agmina dextra,
438 exoritur Notus et toto ratis una profundo
439 cernitur ; Odrysis gaudebant carmine phocae.
440 Apparent trepidi per Phasidis ostia Colchi
441 clamantemque procul relinquens regina parentem.

442 Urbs erat hinc contra gemino circumflua ponto,
 443 ludus ubi et cantus taedaeque in nocte jugales
 444 regalique toro laetus gener : ille priorem
 445 deserit, ultrices spectant a culmine Dirae.
 446 Deficit in thalamis turbataque paelice conjunx
 447 pallam et gemmiferae donum exitiale coronae
 448 apparat, ante omnes secum dequesta labores.
 449 Munere quo patrias paelex ornatur ad aras
 450 infelix et jam rutilis correpta venenis
 451 implicat igne domos. Haec tum miracula Colchis
 452 struxerat Ignipotens nondum noscentibus, ille
 453 quis labor, aligeris aut quae secet anguibus auras
 454 caede madens ; odere tamen visusque reflectunt.
 455 Quin idem Minyas operum defixerat horror
 456 cum se Sole satus patriis penetralibus infert.
 457 Filius hunc juxta primis Absyrtus in annis,
 458 dignus avo quemque insontem meliora manerent.
 459 Tum gener Albanis Styryus qui advenerat oris,
 460 distulerant sed bella toros ; tum Phrontis et Argus
 461 Aeolidae fraterque Melas, quos advena Phrixus
 462 progenuit, pariterque levi Cytisorus in hasta.
 463 Post alii, quos praecipuo Titania proles
 464 legit honore patres, motique ad proelia reges.
 465 Admonet hic socios nebulamque erumpit Iason
 466 siderea ora ferens : nova lux offusa Cytaeis.
 467 Conveniunt stipantque viros rogitantque quid ausi
 468 quidve ferant. Postquam primis inhiantia dictis
 469 agmina suppressumque videt jam murmur Iason,
 470 talia miranti propius tulit orsa tyranno :
 471 "Rex Hyperionide, quem per freta tanta petendum
 472 caelicolae et prima dignum statuere carina,
 473 siquando hic aliquam nostro satus orbe solebat
 474 Thessaliam, siquos Phrixus memorare Pelasgos,
 475 hi tibi, tot casus, horrenda tot avia mensi
 476 cernimur. Ipse egomet proprio de sanguine Phrivi :
 477 namque idem Cretheus ambobus et Aeolus auctor
 478 cum Jove Neptunoque et cum Salmonide nympha.
 479 Meque nec huc enses araeque egere paternae
 480 nec tua Thessalicis quamquam inclita nomina terris
 481 sponte sequor : cui non jusso tot adire voluptas
 482 monstra maris ? Cui Cyaneos intrare fragores ?
 483 Sceptra tui toto Pelias sub lumine Phoebi
 484 maxima sorte tenens, totque ille premantia clivos
 485 oppida, tot vigili pulcherrima flumina cornu,
 486 ille meum imperiis urget caput, ille labores
 487 dat varios, suus ut magnum rex spargit ab Argis
 488 Alciden, Sthenelo ipse satus. Tamen aspera regum
 489 perpetimur juga, nec melior parere recuso.
 490 Hic sibi me auratae pecudis quiscumque periclis
 491 exuvias perferre jubet. Tibi gratia nostri
 492 sit, precor, haec meritique loco quod jussa recepi
 493 teque alium quam quem Pelias speratque cupitque
 494 promisi et meliora tuae mihi foedera dextrae.
 495 Si petere hoc saevi statuissem sanguine belli,
 496 Ossa dabat Pindusque rates quotque ante secuti
 497 inde nec audacem Bacchum nec Persea reges ;
 498 sed me nuda fides sanctique potentia justis
 499 huc tulit ac medii sociatrix gratia Phrivi

500 jamque tibi nostra geniti de stirpe nepotes.
 501 Nec tamen aut Phrygios reges aut arva furentis
 502 Bebryciae spernendus adi : seu fraude petivit
 503 seu quis honore meos, sua reddita dona deumque
 504 nos genus atque ratem magnae sensere Minervae.
 505 Vix tandem longis quaesitam Colchida votis
 506 contigimus qualemque dabat te fama videmus.
 507 Tu modo ne claros Minyis incideris actus
 508 (non aliena peto terrisve indebita nostris,
 509 siquis et in precibus vero locus) atque ea Phrixo
 510 crede dari, Phrixum ad patrios ea ferre penates.
 511 Munera tu contra victum mihi vecta per aequor
 512 accipe, Taenarii chlamydem de sanguine aeni
 513 frenaque et accinctum gemmis fulgentibus ensem :
 514 hoc patrium decus, haec materni texta laboris,
 515 his Lapithes adsuerat equos. Da jungere dextram,
 516 da Scythicas sociare domos. Sciat effera regis
 517 ira mei quem te horrifero sortitus in axe
 518 Caucasus atque tuis quantum mitescat habenis."
 519 Talibus orantem vultu gravis ille minaci
 520 jamdudum premit et furiis ignescit opertis.
 521 Ceu tumet atque imo sub gurgite concipit Austros
 522 unda silens, trahit ex alto sic barbarus iras,
 523 et nunc ausa viri, nunc heu sua prodita Graeis
 524 regna fremit ; quin et facili sibi mente receptum
 525 jam Phrixum dolet et Scythiae periisse timores.
 526 Nunc quassat caput ac juvenis spes ridet inanes :
 527 quid vesanus agat quod vellera poscat ab angue !
 528 Urit et antiquae memorem vox praescia sortis :
 529 cum simul aut Persen illinc sibi moverit atque hinc
 530 Thessalicam Fortuna ratem, num debitus ista
 531 finis agat saevaeque petant jam vellera Parcae.
 532 Interea quoniam belli pugnaeque propinquae
 533 cura prior, fingit placidis fera pectora dictis,
 534 reddit et haec : "Cuperem haud tali vos tempore tectis
 535 advenisse meis quo me gravis adsidet hostis.
 536 Frater enim (sceptri sic omnibus una cupido)
 537 excidium parat et castris me ingentibus urget.
 538 Quare age cognatas primum defendite sedes
 539 nec decus oblatis dimiseris advena belli ;
 540 namque virum trahit ipse chalybs. Tum vellera victor
 541 tam meritis, nec sola, dabo." Contra inscius astus :
 542 "Ergo nec hic nostris derat labor arduus actis"
 543 excipit Aesonides "et ceu nihil aequore passis
 544 additus iste dies ! Veniant super haec quoque fato
 545 bella meo : non hunc parva mihi caede dolorem
 546 quasque dedit luet ille moras." Tum Castora mittit
 547 qui ferat Aeaei sociis responsa tyranni.
 548 Acribus ast illos curis mora saeva trahebat
 549 ac, simul ut medio viderunt Castora campo,
 550 crebrior incussit mentem pavor. "O Jovis alma
 551 progenies, fare an patriam spes ulla videndi,
 552 fare !" omnes. Ille in mediis sic orsus Achivis :
 553 "Nec ferus Aeetes ut fama nec aurea nobis
 554 terga negat, bello interea sed pressus iniquo
 555 auxilium petit. Armatos dux protinus omnes
 556 accelerare jubet ; longo nam tuta recessu
 557 puppis et apposita fluvius defenditur urbe."

558 Haud mora, prosiliunt quos nec Rhipaea juvenus,
 559 quos nec Hiber aut tota suis Aurora pharetris
 560 sustineat. Stetit explicito prius agmine pubes
 561 expertique simul si tela artusque sequantur.
 562 Nec quisquam freta nec patrias jam respicit urbes
 563 sed magis ad praesens itur decus. Incita cristas
 564 aura quatit, variis floret via discolor armis,
 565 qualis ab Oceano nitidum sol aethera vestit,
 566 qualibus adsurgens nox aurea cingitur astris.
 567 Illos Sole satus tacita maestissimus ira
 568 miratur temere adsumptos nec talia mallet
 569 robora quam medios hostem subiisse penates.
 570 Interea laeto patitur convivium vultu
 571 et juxta Aesoniden magno cratere lacessit
 572 nunc sibi monstrantem natos Jovis oraque juxta
 573 Aeacidum, nunc ingentes Calydonis alumnos,
 574 audit et Alciden infando errore relictum
 575 defletosque duces terraeque marisque labores.
 576 Ipse autem tantis concita furoribus arma
 577 expetit Aesonides et amicos ordine reges :
 578 "Quis procul ille virum, nodis quem balteus asper
 579 subligat et stricto stat proximus armiger arcu,
 580 ceu pugnam paret et positas confundere mensas ? "
 581 Contra flammigeri proles Perseia Solis
 582 "Quem rogitas, Carmeus" ait ; "mos cominus arma
 583 semper habere viro, semper meminisse pharetrae."
 584 "Illum" ait Aesonides "pariter refer, horrida signis
 585 cui chlamys et multa spirat coma flexilis aura."
 586 Respicit Aeetes atque hunc quoque nomine reddit :
 587 "Dives Aron. Croceos sic illius omnis odores
 588 jactat eques, cunctis sic est coma culta maniplis,
 589 sed ne sperne virum et comptis diffide capillis.
 590 Campesus hic spoliis in tigridis. Ille profundo
 591 incumbens Odrussa mero : vide lata comantem
 592 pectora et ingenti turbantem pocula barba ?"
 593 Hinc et Iaxarten dictis stupet hospes acerbis
 594 immodicum linguaque gravem, cui nulla minanti
 595 non superum, non praesentis reverentia belli.
 596 Contra autem Aeetes, "Non frustra magna superbo
 597 dicta volant", ait, "et vocem paria arma sequuntur,
 598 nec requies quin Marte diem noctemque fatiget.
 599 Atque ubi Rhipaea stupuerunt flumina bruma,
 600 jam pavidi cum prole Getae, jam pervigil illum
 601 Medus et oppositis exspectat Hiberia claustris.
 602 Quid Latagum, quid si amnigeram mirere Choaspen ?
 603 Bellatoris equi potantem cerne cruores,
 604 nec tamen immissis hic segnior ibit habenis".
 605 Hos autem quae quemque manus, quae signa sequantur
 606 si memorem, prius umentem lux solverit umbram.
 607 Cras acies atque illa ducum cras regna videbis
 608 dissona, saxiferae surgat quibus imber habenae,
 609 quae jaculo gens apta levi, quae picta pharetris
 610 venerit. Ingentes animo jam prospice campos
 611 atque hanc alipedi pulsantem corpora curru
 612 Euryalen, quibus exsultet Mavortia turmis
 613 et quantum elata valeat peltata securi,
 614 cara patri et veras inter non ultima natas."
 615 fatur et occiduo libat cratera parenti.

616 Quisque suis tum vota deis et pocula fundit,
 617 dent aciem, dent belligeros superare labores.
 618 Ecce autem Geticis veniens Gradivus ab arvis
 619 ingentemque trahens Arctoa per aequora nubem
 620 aspicit Aeaea Minyas stupefactus in urbe
 621 ambitumque senem promissaque vellera pubi
 622 Thessalicae. Citus ad summi stellantia patris
 623 tecta ruit questuque Jovem testatur acerbo :
 624 "Quae studiis, rex magne, quies ? Jam mutua divi
 625 exitia in solos hominum molimur honores
 626 teque ea cuncta juvant, rabidam qui Pallada caelo
 627 non abigis neque femineis jus obicis ausis.
 628 Non queror exstructa quod vexerit ipsa carina
 629 vellera sacra meis sperantem avertere lucis
 630 quodque palam tutata viros : sic cetera pergat
 631 si valet. Insiidiis quid nunc fallacibus ambit,
 632 nostra ut Phrixeo spolientur templa metallo ?
 633 Non opus auxilio Colchis nec foedere vestro :
 634 et Persen simul et Minyas deposcimus hostes.
 635 Quin age (quid tantae coeunt in proelia gentes ?
 636 quid tuus Aesonides ?) imus nos, protinus imus
 637 in nemus auriferum et sumptis decernimus armis ?
 638 Vel tu sola polo tacitis inopina tenebris
 639 labere : quantus ibi deus experiere, nec illas
 640 adstiteris impune trabes. An Martia templa
 641 intemeranda minus, tantum mihi lucus et agger
 642 quod rudis et sola colimur sic gentibus umbra ?
 643 Est amor et rerum cunctis tutela suarum.
 644 Ut tibi, magne pater, terris donaria certent,
 645 est honor his etiam silvis. Ego cara Mycenes
 646 culmina, virgineas praeder si Cecropis arces,
 647 jam conjunx, jam te gemitu lacrimisque tenebit
 648 nata querens. Metuant ergo nec talia possim !"
 649 Non tulit haec animis quin longa silentia Pallas
 650 rumperet irridens strepitemque minasque Gradivi :
 651 "Non tibi Aloidae, quibus haec fera murmura jactes,
 652 non Lapithae, sed Pallas" ait "neque ego aegide digna
 653 nec vocer ulterius proles Jovis, excidat iste
 654 ni tibi corde tumor : lituos miser armaque faxo
 655 oderis et primis adimam tua nomina bellis.
 656 Quin simili matrem demens gravitate secutus ?
 657 Digna quidem, monstrum superis quae tale creavit.
 658 Quod tamen adgressae scelus aut quo crimine sontes,
 659 si juvenem, qui jussa sui tam dira tyranni
 660 impavidus maria et nondum qui nota subibat,
 661 juvimus et magnis aliquam spem movimus ausis ?
 662 An nullas praeferre preces nec foedera regis
 663 ulla sequi, caeca sed cuncta impellere pugna
 664 debuimus ? Sic Thraces agunt, sic turbidus iste
 665 siqua petit. Cuperem haec etiamnum bella remitti
 666 nec socias armare manus. Da vellera, rector,
 667 et medio nos cerne mari. Quod sin ea Mavors
 668 abnegat et solus nostris sudoribus obstat,
 669 ibimus indecores frustra que tot aequora vectae ?
 670 Mas aliqua et nequeat, si femina." Coeperat ardens
 671 hic iterum alternis Mavors insurgere dictis.
 672 Excipit hinc contra pater et sic voce coercet :
 673 "Quid, vesane, fremis ? Cum vos jam paenitet acti

674 peccatumque satis, tunc ad mea jura venitis.
 675 Quolibet ista modo, quacumque impellite pugna
 676 quae coepistis, habent quoniam sua fata furores.
 677 Te tamen hoc, conjunx, et te, mea nata, monebo :
 678 sit Persen pepulisse satis nec vana retentet
 679 spes Minyas finemve velint imponere bello.
 680 Illum etenim talis rerum manet (accipite) ordo :
 681 victa retro nunc castra dabit bellumque remittet
 682 territus adventu ducis et virtute Pelasgi ;
 683 mox, ubi Thessalicis referent hos flamina terris,
 684 tunc aderit victorque domos et sceptrata tenebit
 685 donec et Aeeten inopis post longa senectae
 686 exilia (heu magnis quantum licet) impia (fatis)
 687 nata juvet Graiusque nepos in regna reponat.
 688 Hic labor amborumque haec sunt discrimina fratrum.
 689 Vadite et adversis, ut quis volet, irruat armis."
 690 Dixerat. Instaurat mensas pacemque reducit
 691 et jam sidereo noctem demittit Olympo.
 692 Tunc adsuetus adest Phlegraeas reddere pugnas
 693 Musarum chorus et citharae pulsator Apollo
 694 fertque gravem Phrygius circum cratera minister.
 695 Surgitur in somnos seque ad sua limina flectunt.

AR_6 v.1 At vigil isdem ardet furiis Gradivus et acri
 2 corde tumet nec quas acies, quae castra sequatur
 3 invenit. Ire placet tandem praesensque tueri
 4 sternere si Minyas magnoque rependere luctu
 5 regis pacta queat Graiamque absumere pubem.
 6 Impulit hinc currus, monstrum inrevocabile belli
 7 concutiens, Scythiaequae super tentoria sistit.
 8 Protinus e castris fugit sopor : excita tela,
 9 turbati coiere duces. Hos insuper ingens
 10 fama movet, rate quae sacra vulgabat Achivos
 11 advenisse sui repetentes vellera Phryxi,
 12 quos malus hospitio junctaque ad foedera dextra
 13 luserit Aeetes atque in sua traxerit arma.
 14 Ergo, consiliis dum nox vacat alta movendis,
 15 legatos placet ire duces, mandataque Perses
 16 edocet adfari Minyas fraudemque tyranni
 17 ut moneant : quinam hinc animos averterit error ?
 18 Se primum Haemoniis hortatum ea vellera terris
 19 reddere et exuvias pecudis dimittere sacrae :
 20 hinc odium et tanti venisse exordia belli.
 21 Quin potius dextramque suam suaque arma sequantur,
 22 aut remeant : neque enim Aeetae promissa fidemque
 23 esse loco. Abstineant alienae sanguine pugnae :
 24 non illos ideo tanti venisse labores
 25 per maris. Ignotis quid opus concurrere nec quos
 26 oderis ? Haec medio Perses dum tempore mandat,
 27 aureus effulsit campis rubor armaque et acres
 28 sponte sua strepuere tubae. Mars saevus ab altis
 29 "Hostis io" conclamat equis, "agite ite, propinquat !"
 30 ac simul hinc Colchos, hinc fundit in aequora Persen.
 31 Tum gens quaeque suis commisit proelia telis
 32 voxque dei pariter pugnas audita per omnes.

33 Nunc age, Rhipaeo quos videris orbe furores,
34 Musa, mone, quanto Scythiam molimine Perses
35 concierit, quis fretus equis per bella virisque.
36 Verum ego nec numero memorem nec nomine cunctos
37 mille vel ora movens ; neque enim plaga gentibus ulla
38 ditior : aeterno quamquam Maeotia pubes
39 Marte cadat, pingui nunquam tamen ubere defit
40 quod geminas Arctos magnumque quod impleat Anguem.
41 Ergo duces solasque, deae, mihi promite gentes.
42 Miserat ardentem mox ipse secutus Alanos
43 Heniochosque truces jam pridem infensus Anausis,
44 pacta quod Albano conjunx Medea tyranno,
45 nescius, heu, quanti thalamos accedere monstri
46 arserit atque urbes maneat qui terror Achaeas,
47 gratior ipse deis orbaque beatior aula.
48 Proxima Bisaltae legio ductorque Colaxes,
49 sanguis et ipse deum, Scythicis quem Juppiter oris
50 progenuit viridem Myracen Tibisenaque juxta
51 ostia, semifero (dignum si credere) captus
52 corpore, nec nymphae geminos exhorruit angues.
53 Cuncta phalanx insigne Jovis caelataque gestat
54 tegmina dispersos trifidis ardoribus ignes,
55 nec primus radios, miles Romane, corusci
56 fulminis et rutilas scutis diffuderis alas.
57 Insuper auratos collo gerit ipse dracones,
58 matris Horae specimen, linguisque adversus utrimque
59 congruit et tereti serpens dat vulnera gemmae.
60 Tertius unanimis veniens cum milibus Auchus
61 Cimmerias ostentat opes, cui candidus olim
62 crinis inest, natale decus (dat longior aetas
63 jam spatium) triplici percurrens tempora nodo ;
64 demittit sacro geminas a vertice vittas.
65 Datin Achaemeniae gravior de vulnere pugnae
66 misit in arma Daraps, acies quem Martia circum
67 Gangaridum potaque Gerus quos efferat unda
68 quique lacum cinxere Bycen. Non defuit Anxur,
69 non Radalo cum fratre Sydon, Acesinaque laevo
70 omine fatidicae Phrixus movet agmina cervae.
71 Ipsa comes, saetis fulgens et cornibus aureis
72 ante aciem celsi vehitur gestamine conti
73 maesta nec in saevae lucos reditura Dianae.
74 Movit et Hylaea supplex cum gente Syenen
75 impia germani praetentans vulnera Perses.
76 Densior haud usquam nec celsior extulit ullas
77 silva trabes fessaeque prius rediere sagittae
78 quin et ab Hyrcanis Titanus expulit antris
79 Ciris in arma viros, plaustrisque ad proelia cunctas
80 Coelaetae traxere manus ; ibi utilis illis
81 est domus et crudo residens sub vellere conjunx
82 et puer e primo torquens temone cateias.
83 Linquitur abruptus pelago Tyra, linquitur et mons
84 Ambenus et gelidis pollens Ophiusa venenis,
85 degeneresque ruunt Sindi glomerantque paterno
86 crimine nunc etiam metuentes verbera turmas.
87 Hos super aeratam Phalces agit aequore nubem
88 cum fremitu densique levant vexilla Coralli,
89 barbaricae quis signa rotae ferrataque dorso
90 forma suum truncaequae, Jovis simulacra, columnae.

91 Proelia nec rauco curant incendere cornu,
 92 indigenas sed rite duces et prisca suorum
 93 facta canunt veterumque viris hortamina laudes.
 94 Ast ubi Sidonicas inter pedes aequat habenas,
 95 illinc juratos in se trahit Aea Batarnas,
 96 quos duce Teutagono crudi mora corticis armat
 97 aequaque nec ferro brevior nec rumpia ligno.
 98 Nec procul albentes gemina ferit aclyde parmas
 99 hiberni qui terga Novae gelidumque securi
 100 eruit et tota non audit Alazona ripa.
 101 Quosque Taras niveumque ferax Evarchus olorum.
 102 Te quoque venturis, ingens Ariasmene, saeculis
 103 tradiderim, molem belli lateque ferentem
 104 undique falcatos deserta per aequora currus.
 105 Insequitur Drangea phalanx claustrisque profusi
 106 Caspiadae, quis turba canum non segnius acres
 107 exsilit ad lituos pugnasque capessit eriles.
 108 Inde etiam par mortis honos tumulisque recepti
 109 inter avos proavosque virum. Nam pectora ferro
 110 terribilesque innexa jubas ruit agmine nigro
 111 latratuque cohors quanto sonat horrida Ditis
 112 janua vel superas Hecates comitatus in auras.
 113 Ducit ab Hyrcanis vates sacer agmina lucis
 114 Vanus. Eum Scythiae jam tertia viderat aetas
 115 magnanimos Minyas Argoaque vela canentem.
 116 Illius et dites monitis spondentibus Indi
 117 et centumgeminae Lagea novalia Thebes
 118 totaque Rhipaeo Panchaia rapta triumpho.
 119 Discolor hastatas effudit Hiberia turmas,
 120 quas Otaces, quas Latris agunt et raptor amorum
 121 Neurus et expertes canentis Iacyges aevi.
 122 Namque, ubi jam viresque aliae notusque refutat
 123 arcus et inceptus jam lancea temnit eriles,
 124 magnanimis mos dictus avis haud segnia mortis
 125 jura pati, dextra sed carae occumbere prolis
 126 ense dato, rumpuntque moras natusque parensque,
 127 ambo animis, ambo miri tam fortibus actis.
 128 Hic et odorato spirantes crine Mycael
 129 Cessaeaeque manus et qui tua jugera nondum
 130 eruis, ignotis insons Arimaspe metallis,
 131 doctus et Auchates patulo vaga vincula gyro
 132 spargere et extremas laqueis adducere turmas.
 133 Non ego sanguineis gestantem tympana bellis
 134 Thyrsageten cinctumque vagis post terga silebo
 135 pellibus et nexas viridantem floribus hastas.
 136 Fama ducem Jovis et Cadmi de sanguine Bacchum
 137 hac quoque turiferos, felicia regna, Sabaeos,
 138 hac Arabas fudisse manu, mox, rumperet Hebri
 139 cum vada, Thyrsagetas gelida liquisse sub Arcto.
 140 Illis omnis adhuc veterum tenor et sacer aeris
 141 pulsus et euae memoratrix tibia pugnae.
 142 Jungit opes Emeda suas, sua signa secuti
 143 Exomatae Torynique et flavi crine Satarchae.
 144 Mellis honor Torynis, ditant sua mulctra Satarchen,
 145 Exomatas venatus alit nec clarior ullis
 146 Arctos equis. Abeunt Hypanin fragilemque per undam
 147 tigridis aut saevae profugi cum prole leaenae,
 148 maestaque suspectae mater stupet aggere ripae.

149 Impulit et dubios Phrixei velleris ardor
 150 Centoras et diros magico terrore Choatras.
 151 Omnibus in superos saevus honor, omnibus artes
 152 monstrificae, nunc vere novo compescere frondes,
 153 nunc subitam trepidis Maeotin solvere plaustris.
 154 Maximus hos inter Stygia venit arte Coastes,
 155 sollicitat nec Martis amor sed fama Cytaeae
 156 virginis et paribus spirans Medea venenis.
 157 Gaudet Averno palus, gaudet jam nocte quieta
 158 portitor et tuto veniens Latonia caelo.
 159 Ibant et geminis aequantes cornibus alas
 160 Balloniti comitumque celer mutator equorum
 161 Moesus et ingentis frenator Sarmata conti.
 162 Nec tot ab extremo fluctus agit aequore nec sic
 163 fratribus adversa Boreas respondet ab unda
 164 aut is apud fluvios volucrum canor, aethera quantus
 165 tunc lituum concentus adit lymphataque miscet
 166 milia quot foliis, quot floribus incipit annus.
 167 Ipse rotis gemit ictus ager tremibundaque pulsu
 168 nutat humus, quatit ut saevo cum fulmine Phlegram
 169 Juppiter atque imis Typhona reverberat arvis.
 170 Prima tenent illinc patriis Absyrtus in armis
 171 et gener ingentesque inter sua milia reges.
 172 At circa Aesoniden Danaum manus ipsaque Pallas
 173 aegide terrifica, quam non dea lassat habendo,
 174 nec putat horrentem colubris vultuque tremendam
 175 Gorgoneo nec semineces ostendere crines
 176 tempus adhuc primasque sinit concurrere pugnas.
 177 Impulit hos contra Mavors pater et mala leti
 178 Gaudia Tisiphoneque caput per nubila tollens
 179 ad sonitum litui mediaque altissima pugna
 180 necdum certa quibus sese Fuga mentibus addat.
 181 Illi ubi consertis junxere frementia telis
 182 agmina virque virum galeis adflavit adactis,
 183 continuo hinc obitus perfractaque caedibus arma
 184 corporaque, alternus cruor alternaeque ruinae.
 185 Volvit ager galeas et thorax erigit imbres
 186 sanguineos. Hinc barbarici glomerantur ovatus,
 187 hinc gemitus mixtaeque virum cum pulvere vitae.
 188 Caspius Aeaem correpto crine Monesen
 189 abstulit ; hinc pariter Colchi Graique sequuntur
 190 missilibus, rapit ille necem praedamque relinquit
 191 nec sociis jam cura viri. Dipsanta Caresus
 192 Strymonaque obscura spargentem vulnera funda
 193 deicit. Albani cadit ipse Chremodonis hasta
 194 jamque latet currusque super turmaeque feruntur.
 195 Processere Melas et Idasmenus. Incipit hasta
 196 ante Melas, levis ast abies elusit utrumque.
 197 Ensibus inde ruunt. Prior occupat aere citato
 198 cassidis ima Melas : infracta est vulnere cervix.
 199 Mixta perit virtus : nescit qui debeat Ocheus
 200 aut cui fata Tyres. Dum sibila respicit Iron
 201 cuspidis Argivae, Pyliam latere accipit hastam.
 202 Viderat Hyrcanos paribus discurrere fratres
 203 Castor equis, pater armento quos dives ab omni
 204 nutrierat fatisque viam monstrarat iniquis.
 205 Tum magis atque magis peditem candore notato
 206 Tyndariden incendit amor. Simul obvius hastam

207 pectus in adversum Gelae jacit alipedemque
 208 insilit excusso victor duce. Risit ab alta
 209 nube pater prensisque equitem cognovit habenis.
 210 At pariter luctuque furens visuque Medores
 211 Tyndariden petit et superos sic voce precatur :
 212 "Hunc age vel caeso comitem me reddite fratri,
 213 primus at hic nostra sonipes cadet impius hasta,
 214 credita qui misero non rettulit arma parenti
 215 meque venit contra captivaque terga ministrat."
 216 Dixerat, Actaei sed eum prior hasta Phaleri
 217 deicit ; ad socias sonipes citus effugit alas.
 218 Quis tibi fatales unquam metuisset Amyclas
 219 Oebaliamque manum, tot, Rhyndace, montibus inter
 220 diviso totidemque fretis ? Cadit impiger una
 221 inguine transfosso clari Taulantis alumnus
 222 semidea genetrice Tages, cui plurima silvis
 223 pervigilat materna soror cultusque laborat.
 224 Tenuia non illum candentis carbasa lini,
 225 non auro depicta chlamys, non flava galeri
 226 caesaries pictoque juvant subtegmine bracae.
 227 Vadit eques densa spargens hastilia dextra
 228 fulmineumque viris profundens ingerit ensem
 229 huc alternus et huc, cum, saevior, ecce juvenus,
 230 Sarmaticae coiere manus fremitusque virorum
 231 semiferi. Riget his molli lorica catena.
 232 Id quoque tegmen equis ; at equi porrecta per armos
 233 et caput ingentem campis hostilibus umbram
 234 fert abies obnixa genu vaditque virum vi,
 235 vadit equum, docilis relegi docilisque relinqui
 236 atque iterum medios non tardior ire per hostes.
 237 Orbibus hos rapidis mollique per aequora Castor
 238 anfractu levioris equi deludit anhelos
 239 immemoresque mori. Sed non isdem artibus aequae
 240 concurrunt ultroque ruunt in funera Colchi.
 241 Camposus impacta latus inter et ilia quercu
 242 tollitur ac mediam moriens descendit in hastam.
 243 Oebasus infestum summisso poplite Phalcen
 244 evasisse ratus laevum per luminis orbem
 245 jamque novus mediae stupefacta per agmina pugnae
 246 transigitur ; tenerae tinguuntur vulnere malae.
 247 Contra autem geminis fidens thoracibus ictum
 248 sustinet et gladio Sibotes ferit ultima teli
 249 nequiquam. Jam cuspis inest nec fragmina curat
 250 Ambenus et trunco medium subit Ocrea ligno.
 251 Seminecem Taxes Hypanin vehit atque remissum
 252 pone trahit fugiens et cursibus exuit hastam,
 253 dumque recollectam rursus locat, inruit ultro
 254 turbatumque Lacon et adhuc invadit inermem.
 255 Impulit adverso praeceps equus Onchea conto
 256 nequiquam totis revocantem viribus armos.
 257 In latus accepit sonipes, accepit et ipse
 258 frigidus ; arma cadunt, rorat procul ultima cuspis :
 259 qualem populeae fidentem nexibus umbrae
 260 siquis avem summi deducat ab aere rami,
 261 ante manu tacita cui plurima crevit harundo :
 262 illa dolis viscoque super correpta sequaci
 263 implorat ramos atque inrita concitat alas.
 264 Parte alia infestis (nam fors ita junxit) in armis

265 Styrus adest laetusque virum cognoscit Anausis
 266 et prior : "En cujus thalamis Aetia virgo
 267 dicta manet nostrosque feret qui victor amores !
 268 Non", ait, "invitoque gener mutabere patri."
 269 Tum simul adversas conlatis cursibus hastas
 270 coniciunt. Fugit adductis Albanus habenis
 271 saucius atque datum leto non sperat Anausin
 272 nec videt. Ille autem telo moribundus adacto
 273 "Ad soceros pactaeque sinus en conjugis", inquit,
 274 "Styre, fugis, vulnus referens quod carmine nullo
 275 sustineat nullisque levet Medea venenis."
 276 Dixerat, extremus cum lumina corripit error
 277 voxque repressa gelu percussaue vertice tellus.
 278 Hinc animos acres auget magnoque doloris
 279 turbine Gesandrum Mavors rapit. Ille morantes
 280 increpat et stricto sic urget Iazygas ense :
 281 "Nempe omnes cecidere senes, nempe omnis ademptus
 282 ante pater. Quae vos subito tam foeda senectus
 283 corripuit fregitque animos atque abstulit iras ?
 284 Aut mecum mediam, juvenes, agite ite per urbem
 285 Argolicamque manum aut caris occumbite natis !"
 286 inruit et patrias coeptis ferus advocat umbras :
 287 "Sancte mihi Vorapte pater, tua pectora nato
 288 suggere nunc animumque parem, si fata peroso
 289 tarda tibi turpesque moras non segnius ipsi
 290 paruimus parvique eadem didicere nepotes."
 291 Haec ait auditusque Erebo. Tum corripit ensem
 292 turbidus et furiis ardens quatit arma paternis.
 293 Indigenis sacratus aquis magnique sacerdos
 294 Phasidis Arctois Aquites errabat in armis
 295 (populeus cui frondis honor conspectaque glauco
 296 tempora nectuntur ramo) te, Cyrne, parentis
 297 immemorem durae cupiens abducere pugnae ;
 298 jamque omnes impune globos diversaue lustrans
 299 agmina, non usquam videt. Utque iterum intrat acerba
 300 vociferans, iterum belli diversa peragrat,
 301 lancea caeruleas circum strepit incita vittas.
 302 Opprimit admissis ferus hinc Gesander habenis.
 303 Ille manum trepidans atque inrita sacra tetendit
 304 "Te"que "per hanc" inquit " genitor tibi si manet oro
 305 canitiem, compesce minas et sicubi nato
 306 parce meo." Dixit. Contra sic victor adacto
 307 ense refert : "Genitor, turpi durare senecta
 308 quem mihi reris adhuc, ipse hac occumbere dextra
 309 maluit atque ultro segnes abrumpere metas,
 310 et tibi si pietas nati, si dextra fuisset,
 311 haud medii precibus tereres nunc tempora belli,
 312 praeda future canum. Juveni sors pulchrior omnis :
 313 et certasse manu decet et caruisse sepulchro."
 314 Dixerat. Ille deos moriens caelumque precatur
 315 dextera ne misero talis foret obvia nato.
 316 Te quoque, Canthe, tui non inscia funeris Argo
 317 flevit ab invita rapientem tela carina.
 318 Jam Scythicos, miserande, sinus, jam Phasidis amnem
 319 contigeras, nec longa dies ut capta videres
 320 vellera et Euboicis patrios de montibus ignes.
 321 Illum, ubi congressu subiit Gesander iniquo,
 322 territat his : "Tu qui faciles hominumque putasti

323 has, Argive, domos, alium hic miser aspicias annum
324 altricemque nivem festinaque taedia vitae.
325 Non nos aut levibus componere bracchia remis
326 novimus aut ventos opus exspectare ferentes :
327 imus equis qua vel medio riget aequore pontus
328 vel tumida fremit Hister aqua. Nec moenia nobis
329 vestra placent, feror Arctois nam liber in arvis
330 cuncta tenens ; mecum omnis amor jacturaque plaustrum
331 sola (nec hac longum victor potiere rapina) ;
332 ast epulae quodcumque pecus, quaecumque ferarum.
333 Mitte Asiae, mitte Argolicis mandata colonis,
334 ne trepident. Nunquam has hiemes, haec saxa relinquam,
335 Martis agros, ubi tam saevo duravimus amne
336 progeniem natosque rudes, ubi copia leti
337 tanta viris. Sic in patriis bellare pruinis
338 praedarique juvat talemque hanc accipe dextram !"
339 Dixit et Edonis nutritum missile ventis
340 concitat. It medium per pectus et horrida nexu
341 letifer aera chalybs. Trepidus super advolat Idas
342 ac simul Oenides pariterque Menoetius et qui
343 Bebrycio propius remeavit ab hospite victor.
344 At vero ingentem Telamon procul extulit orbem
345 exanimem te, Canthe, tegens. Ceu saeptus in arcto
346 dat catulos post terga leo, sic cominus hastam
347 Aeacides gressumque tenet contraque ruentem
348 septeno validam circumfert tegmine molem.
349 Nec minus hinc urget Scythiae manus, armaque Canthi
350 quisque sibi et Graio poenam de corpore poscens.
351 Arduus inde labos : medio pro corpore pugna
352 conseritur. Magno veluti cum turbine sese
353 ipsius Aeoliae frangunt in limine venti,
354 quem pelagi rabies, quem nubila quemque sequatur
355 illuvies, obnixa virum sic cominus haeret
356 pugna nec arrepto velli de corpore possunt.
357 Ut bovis exuvias multo qui frangere olivo
358 dat famulis (tendunt illi tractuque vicissim
359 taurea terga domant, pingui fluit unguine tellus),
360 talis utrimque labos, raptataque limite in arto
361 membra viri miseranda meant. Hi tendere contra,
362 hi contra, alternaeque virum non cedere dextrae.
363 Hinc medium Telamon Canthum rapit, hinc tenet ardens
364 colla viri et molles galeae Gesander habenas,
365 insonuit quae lapsa solo dextramque fefellit.
366 Ille iterum in clipei septemplex improbus orbem
367 arietat et Canthum sequitur Canthumque repositum,
368 quem manus a tergo socium rapit atque receptum
369 virginis Euryales curru locat. Advolat ipsa
370 ac simul Haemonidae, Gesandrumque omnis in unum
371 it manus. Ille novas acies et virginis arma
372 ut videt : "Has etiam contra bellabimus ? " inquit,
373 "Heu pudor ! " Inde Lycen ferit ad confine papillae,
374 inde Thoen, qua pelta vacat, jamque ibat in Harpen
375 vixdum prima levi ducentem cornua nervo,
376 in labentis equi tendentem frena Menippen,
377 cum regina gravem nodis auroque securem
378 congeminans cratem capitis galeamque ferinam
379 dissipat. Hic pariter telorum immanis in unum
380 it globus. Ille diu conjectis sufficit hastis,

381 quin gravior nutuque carens exterruit Idan.
382 Tunc ruit ut montis latus aut ut machina muri,
383 quae scopulis trabibusque diu confectaque flammis
384 procubuit tandem atque ingentem protulit urbem.
385 Ecce locum tempusque ratus jamque et sua posci
386 proelia falcatos infert Ariasmenus axes
387 saevaue diffundit socium juga, protinus omnes
388 Graiugenas, omnes rapturus ab agmine Colchos.
389 Qualiter exosus Pyrrhae genus aequora rursus
390 Juppiter atque omnes fluvium si fundat habenas,
391 ardua Parnasi lateant juga, cesserit Othrys
392 piniger et mersis decrescant rupibus Alpes,
393 diluvio tali paribusque Ariasmenus urget
394 excidiis nullo rapiens discrimine currus.
395 Aegida tum primum virgo spiramque Medusae
396 ter centum saevis squalentem sustulit hydri,
397 quam soli vidistis, equi. Pavor occupat ingens
398 excussis in terga viris diramque retorquent
399 in socios non sponte luem. Tunc ensibus uncis
400 implicat et trepidos lacerat discordia currus.
401 Romanas veluti saevissima cum legiones
402 Tisiphone regesque movet, quorum agmina pilis,
403 quorum aquilis utrimque micant eademque parentes
404 rura colunt, idem lectos ex omnibus agris
405 miserat infelix non haec ad proelia Thybris,
406 sic modo concordem externaue fata petentes
407 Palladii rapuere metus, sic in sua versi
408 funera concurrunt dominis revocantibus axes.
409 Non tam foeda virum Laurenti corpora terrae
410 ejecere Noti, Libyco nec talis imago
411 litore cum fractas advolvunt aequora puppes.
412 Hinc bijuges, illinc artus tenduntur eriles
413 quos radii, quos frena secant ; trahiturque trahitque
414 currus caede madens atroque in pulvere regum
415 viscera nunc aliis, aliis nunc curribus haerent.
416 Haud usquam Colchorum animi nec cura cavere
417 tela, sed implicitos miseraue in peste revinctos
418 confodiunt ac forma necis non altera surgit
419 quam cervos ubi non Umbro venator edaci,
420 non penna petit, haerentes sed cornibus altis
421 invenit et caeca constrictos occupat ira.
422 Ipse recollectis audax Ariasmenus armis
423 desilit. Illum acies curvae secat undique falcis
424 partiturque rotis atque inde furentia raptus
425 in juga Circaeos tetigit non amplius agros.
426 Talia Certatim Minyae sparsique Cytaei
427 funera miscebant campis Scythiamque premebant,
428 cum Juno Aesonidae non hanc ad vellera cernens
429 esse viam nec sic reditus regina parandos,
430 extremam molitur opem, funesta priusquam
431 consilia ac saevas aperit rex perfidus iras.
432 Increpat et seris Vulcanum maesta querellis,
433 cujus flammiferos videt inter regia tauros
434 pascua Tartaream proflantes pectore noctem.
435 Haec etenim Minyas ne jungere Marte peracto
436 monstra satis jubeat Cadmei dentibus hydri
437 ante diem, timet et varias circumspicit artes.
438 Sola animo Medea subit, spes omnis in una

439 virgine, nocturnis qua nulla potentior aris.
 440 Illius ad fretus sparsosque per aera sucos
 441 sidera fixa pavent et avi stupet orbita Solis.
 442 Mutat agros fluviumque vias, suus alligat illi
 443 cuncta sopor, recolit fessos aetate parentes
 444 datque alias sine lege colus. Hanc maxima Circe
 445 terrificis mirata modis, hanc advena Phrixus
 446 quamvis Atracio lunam spumare veneno
 447 sciret et Haemoniis agitari cantibus umbras.
 448 Ergo opibus magicis et virginitate tremendam
 449 Juno duci sociam conjungere quaerit Achivo.
 450 Non aliam tauris videt et nascentibus armis
 451 quippe parem nec quae medio stet in agmine flammae.
 452 Nullum mente nefas, nullos horrescere visus :
 453 quid si caecus amor saevusque accesserit ignis ?
 454 Hinc Veneris thalamos semperque recentia sertis
 455 tecta petit. Visa jamdudum prosilit altis
 456 diva toris volucrumque exercitus omnis Amorum.
 457 Ac prior hanc placidis supplex Saturnia dictis
 458 adgreditur veros metuens aperire timores :
 459 "In manibus spes nostra tuis omnisque potestas
 460 nunc" ait ; "hoc etiam magis adnue vera fatenti.
 461 Durus ut Argolicis Tirynthius exsulat oris,
 462 mens mihi non eadem Jovis atque aversa voluntas,
 463 nullus honor thalamis flammaeve in nocte priores.
 464 Da, precor, artificis blanda adspiramina formae
 465 ornatusque tuos terra caeloque potentes."
 466 sensit diva dolos, jam pridem sponte requirens
 467 Colchida et invisi genus omne excindere Phoebi.
 468 Tum vero optatis potitur nec passa precari
 469 ulterius dedit acre decus fecundaque monstris
 470 cingula, non pietas quibus aut custodia famae,
 471 non pudor, at contra levis et festina cupido
 472 adfatusque mali dulcisque labantibus error
 473 et metus et demens alieni cura pericli.
 474 "Omne", ait, "imperium natorumque arma meorum
 475 cuncta dedi. Quascumque libet nunc concute mentes."
 476 Cingitur arcanis Saturnia laeta venenis
 477 atque hinc virgineae venit ad penetralia sedis
 478 Chalciopen imitata sono formaque sororem.
 479 Fulsit ab invita numen procul, et pavor artus
 480 protinus atque ingens Aetida perculit horror.
 481 "Ergo nec ignotis Minyas huc fluctibus", inquit,
 482 "advenisse, soror, nec nostro sola parenti
 483 scis socias junxisse manus ? An cetera muros
 484 turba tenet fruiturque virum caelestibus armis,
 485 tu thalamis ignava sedes, tu sola paterna
 486 fixa domo, tales quando est tibi cernere reges ? "
 487 Illa nihil contra. Neque enim dea passa manumque
 488 implicat et rapidis mirantem passibus aufert.
 489 Ducitur infelix ad moenia summa futuri
 490 nescia virgo mali et falsae commissa sorori,
 491 lilia per vernos lucent velut alba colores
 492 praecipue, quis vita brevis totusque parumper
 493 floret honor, fuscis et jam Notus imminet alis.
 494 Hanc residens altis Hecate Perseia lucis
 495 flebat et has imo referebat pectore voces :
 496 "Deseris, heu, nostrum nemus aequalesque catervas,

497 a misera, ut Graias haud sponte vageris ad urbes,
 498 non invita tamen. Neque te, mea cura, relinquam :
 499 magna fugae monumenta dabis, spernere nec usque
 500 mendaci captiva viro, meque ille magistram
 501 sentiet e raptu famulae doluisse pudendo."
 502 Dixerat. Ast illae murorum extrema capessunt
 503 defixaeque virum lituumque fragoribus horrent,
 504 quales instanti nimborum fulgure maestae
 505 succedunt ramis haerentque pavore volucres.
 506 Jamque Getae jamque omnis Hiber Drangeaque densa
 507 strage cadit legio et latis prosternitur arvis.
 508 Semineces duplicesque inter sua tela suosque
 509 inter equos saevam misero luctamine versant
 510 congeriem et longis campos singultibus implent.
 511 Victores contra patrium paeana Geloni
 512 congeminant ; eadem redeunt mox gaudia victis,
 513 qua deus et melior belli respexit imago.
 514 Quis quales obitus dederit, quis qualia facta,
 515 dic age tuque feri reminiscere, Musa, furoris.
 516 Absyrtus, clipei radiis curruque coruscus
 517 Solis avi (cujus vibrantem comminus hastam
 518 cernere nec galeam gentes potuere minantem,
 519 sed trepidae redeunt et verso vulnera tergo
 520 accipiunt magnisque fugam clamoribus augent)
 521 proterit impulsu gravis agmina corporaque atris
 522 sternit equis gemitusque premit spirantis acervi.
 523 Nec levior comitatur Aron, horrentia cujus
 524 discolor arma super squalentesque aere lacertos
 525 barbarica chlamys ardet acu tremefactaque vento
 526 implet equum, qualis roseis it Lucifer alis,
 527 quem Venus inlustri gaudet producere caelo.
 528 At non inde procul Rabelus et acer Otaxes
 529 dispulerant Colchos pariterque inglorius Armes,
 530 fraude nova stabula et furtis adsuetus inultis
 531 depopulare greges, frontem cum cornibus auxit
 532 hispidus inque dei latuit terrore Lycaeii.
 533 Hac tunc attonitos facie defixerat hostes.
 534 Quem simul ac nota formidine bella moventem
 535 vidit Aron, "Pavidos te", inquit, "nunc rere magistros
 536 et stolidum petiisse pecus ? Non pascua nec seps
 537 hic tibi, nocturnis mitte haec simulacra rapinis
 538 neve deum mihi finge : deus quoque consere dextram."
 539 Sic ait intentaque adjutum missile planta
 540 derigit et lapsis patuerunt vulnera villis.
 541 Nec minus Aeolii proles Aeetia Phrixi
 542 fertur et ipsa furens ac se modo laeta Cytaeis
 543 agminibus, modo cognatis ostentat Achivis.
 544 Atque hos in medio duri discrimine belli
 545 laudibus inque ipsis gaudens ubi vidit Iason
 546 "Macte", ait, "o nostrum genus et jam certa propago
 547 Aeoliae nec opina domus. Sat magna laborum
 548 dona fero, satis hoc visu quaecumque rependo."
 549 Dixit et in Sueten magnique in fata Ceramni
 550 emicuit gladiumque rotans hunc poplite caeso
 551 deicit, illum aperit lato per pectus hiatu.
 552 Argus, utrumque ab equis, ingenti porrigit arvo
 553 et Zacorum et Phalcen, peditem pedes haurit Amastrin.
 554 Sanguinis ille globos effusaque viscera gestat,

555 barbarus et cassa stridens sublabitur ira.
556 Dat Calais Barisanta neci semperque propinquas
557 Riphea venali comitantem sanguine pugnas.
558 Centum lecta boum bellator corpora, centum
559 pactus equos (his ille animam lucemque rependit
560 crudelis !) tandem dulces jam cassus in auras
561 respicit ac nulla caelum reparabile gaza.
562 Labitur intortos per tempora caerula crines
563 tum quoque materna velatus harundine Peucon.
564 At genetrix imis pariter Maeotis ab antris
565 implevit plangore lacus natumque vocavit
566 jam non per ripas, jam non per curva volentem
567 stagna nec in medio truncantem marmore cervos.
568 Eurytus Exomatas agit aequore. Nestoris hastae
569 immoritur primaevus Helix, nec reddit acaro
570 nutrimenta patri, brevibusque ereptus in annis.
571 At Latagum Zetenque Daraps ; illum exigit hasta,
572 hic fugit, ingentem subiti cum sanguinis undam
573 vidit et extremo lucentia pectora ferro.
574 Ecce autem muris residens Medea paternis
575 singula dum magni lustrat certamina belli
576 atque hos ipsa procul densa in caligine reges
577 agnoscit quaeritque alios Junone magistra,
578 conspicit Aesonium longe caput, ac simul acres
579 huc oculos sensusque refert animumque faventem,
580 nunc quo se raperet, nunc quo diversus abiret
581 ante videns, quotque unus equos, quot funderet arma,
582 urgentesque viros quam densis sisteret hastis.
583 Quaque iterum tacito sparsit vaga lumina vultu
584 aut fratris quaerens aut pacti conjugis arma,
585 saevus ibi miserae solusque occurrit Iason.
586 Tunc his germanam adgreditur ceu nescia dictis :
587 "Quis precor hic toto jamdudum fervere campo
588 quem tueor quemque ipsa vides ? Nam te quoque tali
589 attonitam virtute reor." Contra aspera Juno
590 reddit agens stimulis ac diris fraudibus urget :
591 "Ipsum", ait, "Aesoniden cernis, soror, aequore tanto
592 debita cognati repetit qui vellera Phruxi,
593 nec nunc laude prior generis nec sanguine quisquam.
594 Aspicias ut Minyas inter proceresque Cytaeos
595 eminent effulgens quantisque insultet acervis ?
596 Et jam vela dabit, jam litora nostra relinquet
597 Thessaliae felicis opes dilecta Phrixo
598 rura petens. Eat atque utinam superetque labores !"
599 tantum effata magis campis intendere suadet
600 dum datur ardentisque viri percurrere pugnas.
601 ac simul hanc dictis, illum dea Marte secundo
602 impulit atque novas egit sub pectora vires.
603 Ora sub excelso jamdudum vertice coni
604 saeva micant cursuque ardescit, nec tibi, Perse,
605 nec tibi, virgo, jubae laetabile sidus Achivae,
606 acer ut autumnus canis iratoque vocati
607 ab Jove fatales ad regna injusta cometae.
608 Nec sua Crethiden latuit dea, vimque recentem
609 sentit agi membris ac se super agmina tollit,
610 quantus ubi ipse gelu magnoque incanuit imbre
611 Caucasus et summas abiit hibernus in Arctos.
612 Tum vero, stabulis qualis leo saevit opimis

613 luxurians spargitque famem mutatque cruores,
614 sic neque parte ferox nec caede moratur in una
615 turbidus inque omnes pariter furit ac modo saevo
616 ense, modo infesta rarescunt cuspide pugnae.
617 Tunc et terrificis undantem crinibus Hebrum
618 et Geticum Priona ferit, caput eripit Auchi
619 bracchiaque, et vastis volvendum mittit harenis.
620 At genitus Jove completrat sua fata Colaxes
621 jamque pater maesto contristat sidera vultu
622 talibus aegra movens nequiquam pectora curis :
623 "Ei mihi, si durae natum subducere sorti
624 moliar atque meis ausim confidere regnis,
625 frater adhuc Amyci maerens nece cunctaque divum
626 turba frement quorum nati cecidere cadentque :
627 quin habeat sua quemque dies, cunctisque negaro
628 quae mihi." Supremos misero sic fatus honores
629 congerit atque animis moriturum ingentibus implet.
630 Ille volat campis immensaque funera miscet
631 per cuneos, velut hiberno proruptus ab arcu
632 imber agens scopulos nemorumque operumque ruinas,
633 donec ab ingenti bacchatus vertice montis
634 frangitur inque novum paulatim deficit amnem.
635 Talis in extremo proles Jovis emicat aevo
636 et nunc magnanimos Hypetaona Gessithoumque,
637 nunc Arinen Olbumque rotat. Jam saucius Apren
638 et desertus equo Thydrum pedes excipit hasta
639 Phasiaden, pecoris custos de more paterni
640 Caucasus ad primas genuit quem Phasidis undas.
641 Hinc puero cognomen erat famulumque ferebant
642 Phasidis intonso nequiquam crine parentes.
643 Jamque aliis instabat atrox, cum diva supremas
644 rumpit iniqua colus victorque advenit Iason.
645 Excipit hunc saeva sic fatus voce Colaxes :
646 "Vos Scythiae saturare canes Scythiaeque volucres
647 huc miseri venistis ? " ait saxumque prehensum,
648 illius et dextrae gestamen et illius aevi,
649 concussa molitur humo, quod regia Juno
650 flexit ad ignotum caput infletumque Monesi.
651 Praeceptis ille ruit. Nato non depulit ictus
652 Juppiter, Aesonidae vulnus fatale sed hastae
653 per clipeum, per pectus abit, lapsoque cruentus
654 advolat Aesonides mortemque cadentis acerbat.
655 Spargitur hinc miserisque venit jam notus Alanis.
656 At regina virum (neque enim deus amovet ignem)
657 persequitur lustrans oculisque ardentibus haeret.
658 Fit jam laeta minus praesentis imagine pugnae
659 castigatque metus et quas alit inscia curas,
660 respiciens an vera soror, nec credere falsos
661 audet atrox vultus eademque in gaudia rursus
662 labitur et saevae trahitur dulcedine flammae.
663 Ac velut ante comas ac summa cacumina silvae
664 lenibus adludit flabris levis Auster, at illum
665 protinus immanem miserae sensere carinae,
666 talis ad extremos agitur Medea furores.
667 Interdum blandae derepta monilia divae
668 contrectat miseroque aptat flagrantia collo,
669 quaque dedit teneros aurum furiale per artus,
670 deficit ; ac sua virgo deae gestamina reddit,

671 non gemmis, non illa levi turbata metallo,
672 sed facibus, sed mole dei, quem pectore toto
673 jam tenet. Extremus roseo pudor errat in ore.
674 Ac prior his : "Credisne patrem promissa daturum,
675 o soror, Argolicus cui dis melioribus hospes
676 contigit ? Aut belli quantum jam restat acerbi ?
677 Heu quibus ignota sese pro gente periculis
678 obicit ! " Haec fantem medio in sermone reliquit
679 incepti jam Juno potens securaque fraudis.
680 Imminet e celsis audentius improba muris
681 virgo, nec ablatam sequitur quaeritve sororem,
682 et, quotiens vis dura ducum densique repente
683 Aesoniden pressere viri cumque omnis in unum
684 imber iit, totiens saxis pulsatur et hastis.
685 Plurima ad infesti Lexanoris horruit arcus,
686 alta sed Aesonium supra caput exit harundo
687 teque, Caice, petit : conjunx miseranda Caico
688 linquitur et primo domus imperfecta cubili.
689 Regius Eois Myraces interpres ab oris
690 venerat ut Colchos procul atque Aeetia Parthis
691 foedera donato non inrita jungeret auro.
692 Tum juvenem terris Parcae tenuere Cytaeis
693 ac subiti Mavortis amor ; simul armiger ibat
694 semivir impubemque gerens sterilemque juventam.
695 Ipse Phari stratis residens ad frena tapetis
696 nunc levis infesto procurrit in agmina curru,
697 nunc fuga conversas spargit mentita sagittas.
698 At viridem gemmis et eoae stamine silvae
699 subligat extrema patrium cervice tiaran
700 insignis manicis, insignis acinace dextro,
701 improba barbaricae procurrunt tegmina plantae,
702 nec latuere diu saevum spolia illa Syenen
703 perque levem et multo maculatam murice tigrin
704 concita cuspis abit. Subitos ex ore cruores
705 saucia tigris agit vitamque effundit erilem
706 (ipse puer fracto pronum caput implicat arcu).
707 Sanguine tunc atro chlamys ignea, sanguine vultus
708 et gravidae maduere comae, quas rore Sabaeo
709 nutrierat liquidoque parens signaverat auro.
710 Qualem siquis aquis et fertilis ubere terrae
711 educat ac ventis oleam felicibus implet,
712 nec labor adsiduus nec spes sua fallit alentem
713 jamque videt primam tenero de vertice frondem,
714 cum subito immissis praeceps Aquilonia nimbis
715 venit hiemps nigraque evulsam tendit harena,
716 haud secus ante urbem Myraces atque ipsius ante
717 virginis ora cadit ; sed non magis illa movetur
718 unius aegra metu quam te, Meleagre, furentem,
719 quam Talaum videt aut pugnas miratur Acasti.
720 At satis hos ipsae gentes campique videbant
721 tempestate pari versis incumbere turmis.
722 Ante oculos fuga foeda ducum largusque cadentum
723 it cruor et currus dominis ingentibus orbi.
724 Non tulit hos Perses gemitus clademque suorum,
725 tergaque versa tuens his caelum questibus implet :
726 "Quid me jam patriis ejectum sedibus istas
727 ut struerem pugnas Scythiamque in bella moverem
728 vos, superi, vos augurio lusistis inani ?

729 Quid fratris meritas tum, Juppiter, omnia poenas
 730 promiserere mihi ? Nobis Argoa parabas
 731 scilicet auxilia et tantas conjungere vires !
 732 Saeva quidem lucis miseris mora ; dent tamen oro
 733 unum illum mihi fata diem, qui fallat Achivos
 734 sic meritos quoque hunc videam virtute superbum
 735 Aesoniden tantos flentem sine honore labores !"
 736 Dixerat haec pectusque suis everberat armis
 737 et galeam fletu, galeam singultibus implet ;
 738 ibat et in medii praeceps incendia belli,
 739 ni prior adversis Pallas vidisset ab armis
 740 et secum : "Ruit ecce ferox in funera Perses,
 741 quem genitor Colchis solioque imponere fratris
 742 jam statuit. Nostra vereor ne fraude peremptum
 743 increpet et culpam hanc magno terrore rependat."
 744 Haec dicens atro nebulam diffundit amictu
 745 stridentesque viri circum caput amovet hastas.
 746 Ille super socias clementi turbine gentes
 747 erigitur paulumque levi raptatus in aethra
 748 jam tandem extremas pugnae defertur in oras,
 749 forte ubi serus Hiber Essedoniaeque phalanges
 750 Marte carent solisque juvant clamoribus agmen.
 751 Nox simul astriferas profert optabilis umbras
 752 et cadit extemplo belli fragor aegraque muris
 753 digreditur longum virgo perpessa timorem.
 754 Ut fera Nyctelii paulum per sacra resistunt,
 755 mox rapuere deum jam jam in quodcumque paratae
 756 Thyiades, haud alio remeat Medea tumultu
 757 atque inter Graiumque acies patriasque phalangas
 758 semper inexpletis agnoscit Iasona curis
 759 armaque quique cava superest de casside vultus.

AR_7 v.1 Te quoque Thessalico jam serus ab hospite vesper
 2 dividit et jam te tua gaudia, virgo, relinquunt
 3 noxque ruit soli veniens non mitis amanti.
 4 Ergo, ubi cunctatis extremo in limine plantis
 5 contigit aegra toros et mens incensa tenebris,
 6 vertere tunc varios per longa insomnia questus
 7 nec pereat quo scire malo tandemque fateri
 8 ausa sibi causam medio sic fata dolore est :
 9 "Nunc ego quo casu vel quo sic pervigil usque
 10 ipsa volens errore trahor ? Non haec mihi certe
 11 nox erat ante tuos, juvenis fortissime, vultus.
 12 Quos ego cur iterum demens iterumque recordor
 13 tam magno discreta mari ? Quid in hospite solo
 14 mens mihi ? Cognati potius jam vellera Phruxi
 15 accipiat, quae sola petit quaeque una laborum
 16 causa viro. Nam quando domos has ille reviset ?
 17 Aut meus Aesonias quando pater ibit ad urbes ?
 18 Felices mediis qui se dare fluctibus ausi
 19 nec tantas timere vias talemque secuti
 20 huc qui deinde virum ; sed, sit quoque talis, abito."
 21 Tum jactata toro totumque experta cubile
 22 ecce videt tenui candescere limen Eoo.
 23 Nec minus insomnem lux orta refecit amantem

24 quam cum languentes levis erigit imber aristas
 25 grataque jam fessis descendunt flamina remis.
 26 At sua longarum Minyas jam cura viarum
 27 admonet inque ipso nequiquam tempore regem
 28 laetitiae meritique petunt. Quem passus Iason
 29 vota prius captasque deis accendere praedas,
 30 prominet atque oculos longe tenet, aurea si jam
 31 pellis et oblatis clarescant atria villis.
 32 Ille autem jamjam vultus vocesque parantem
 33 ante capit rumpitque moras inque ipsa morantis
 34 prosilit ora viri talique effunditur ira :
 35 "Orbe satos alio, sua litora regnaque habentes,
 36 quis furor has mediis tot fluctibus egit in oras
 37 quisve mei vos tantus amor ? Tu prima malorum
 38 causa mihi, tu, Phrixe gener ! Non te aequore mersum
 39 quo soror ! Ut felix nullos nunc nomine Graios
 40 nossem ego, quis regum Pelias, quis Thessalus, aut quae
 41 Graecia, quodnam hominum Minyae genus, aut ubi cautes
 42 Cyanaeae ! Venit Scythicas en hospes in oras,
 43 quinquaginta Asiam (pudet heu) penetravit Iason
 44 exulibus, meque ante alios sic spreverit una,
 45 una ratis, spoliū ut vivo de rege reportet ?
 46 Ipsum offerre meos, ipsum jam pandere lucos
 47 imperet et nullo dignetur vincere bello ?
 48 Cur age non templis sacrata avellere dona
 49 omnibus atque ipsas gremiis abducere natas,
 50 praedo, libet ? Vobisne domos, vobisne penates
 51 esse putem, ratis infandis quos sola rapinis
 52 saevaue pascit hiemps et quos, credamus ut ipsis,
 53 rex suus inlisit pelago metuitque reverti ?
 54 Scilicet, Aeoliae pecudis poteremur ut auro,
 55 ante meus caesa descendit Caucasus umbra,
 56 ac prior Haemonias rapuit super aequora praedas ?
 57 Haud ego cum vittis statui feralibus Hellen !
 58 Si tamen his aliter perstas non cedere terris
 59 teque pudor cassi reditus movet ac latet ima
 60 nescioquid plus puppe viris, haud ipse morabor
 61 quae petitis ; modo nostra prior tu perfice jussa.
 62 Martius ante urbem longis jacet horridus annis
 63 campus et ardentes ac me quoque vomere presso,
 64 me quoque cunctantes interdum agnoscere tauri.
 65 His magis atque magis rabiem nunc nostra senectus
 66 luxuriemque dedit, solitoque superior ignis
 67 ore fremit. Succede meae, fortissime, laudi
 68 et nostros recale, hospes, agros. Nec semina derunt
 69 quae prius ipse dabam, et messes, quas solus obibam.
 70 Consiliis nox una satis tecumque retracta
 71 cumque tuis haec jussa deis ; ac siquid in isto est
 72 robore, praedicti venies in jura laboris.
 73 Ipse incertus adhuc, tenebris te protinus illis
 74 involvi flammisque velim, durare parumper
 75 an magis everso jacias dum semina campo
 76 ac tibi Cadmei dum dentibus exeat hydri
 77 miles et armata florescant pube novalis."
 78 Filia prima trucis vocem mirata tyranni
 79 haesit et ad juvenem pallentia rettulit ora
 80 contremuitque metu ne nescius audeat hospes
 81 seque miser ne posse putet. Perstrinxerat horror

82 ipsum etiam et maesta stabat defixus in ira.
 83 Non ita Tyrrhenus stupet Ioniusque magister
 84 qui jam te, Tiberine, tuens clarumque serena
 85 arce pharon, pressus subito nusquam ostia, nusquam
 86 Ausoniam videt et saevas accedere syrtes.
 87 Tum tamen infando quae det responsa tyranno
 88 colligit et tandem obtutu consurgit ab alto :
 89 "Non", ait, "hos reditus, non hanc, Aeeta, dedisti
 90 spem Minyis, cum prima tuis pro moenibus arma
 91 induimus. Quo versa fides ? Quos vestra volutant
 92 jussa dolos ? Alium hic Pelian, alia aequora cerno.
 93 Quin agite hoc omnes odiisque urgete tyranni
 94 imperiisque caput : nunquam mihi dextera nec spes
 95 defuerit ; mos jussa pati nec cedere duris.
 96 Unum oro, seu me illa suis seges obruet hastis,
 97 hauriet adverso seu crastinus ignis hiatu,
 98 nuntius hinc saevas Peliae mittatur ad aures
 99 hic periisse viros et me, si vestra fuisset
 100 ulla fides, reducem patriae potuisse referri."
 101 Talibus attonitos dictis natamque patremque
 102 linquit et infida praeceps prorumpit ab aula.
 103 At trepida et medios inter deserta parentes
 104 virgo silet nec fixa solo servare parumper
 105 lumina nec potuit maestos non flectere vultus,
 106 respexitque fores et adhuc invenit euntem,
 107 visus et heu miserae tunc pulchrior hospes amanti
 108 discedens (tales umeros, ea terga relinquit).
 109 Illa domum atque ipsos ultra procedere postes
 110 optat, at ardentes tenet intra limina gressus.
 111 Qualis ubi extremas Io vaga sentit harenas
 112 fertque refertque pedem, tumido quam cogit Erinys
 113 ire mari Phariaeque vocant trans aequora matres,
 114 circuit haud aliter foribusque impendit apertis
 115 an melior Minyas revocet pater, oraque quaerens
 116 hospitis aut solo maeret defecta cubili
 117 aut venit in carae gremium refugitque sororis
 118 atque loqui conata silet, rursusque residens
 119 quaerit, ut Aeaeis hospes consederit oris
 120 Phrixus, ut aligeri Circen rapuere dracones.
 121 Tum comitum visu fruitur miseranda suarum
 122 implerique nequit solitoque parentibus haeret
 123 blandior et patriae circumfert oscula dextrae.
 124 Sic adsueta toris et mensae dulcis erili
 125 aegra nova jam peste canis rabieque futura
 126 ante fugam totos lustrat queribunda penates.
 127 Tandem etiam molli semet sic increpat ira :
 128 "Pergis", ait, "demens, teque illius angit imago
 129 curaque, qui profuga forsan tenet alta carina
 130 quique meum patrias referet nec nomen ad urbes ?
 131 Quid me autem sic ille movet, superetne labores
 132 an cadat et tanto turbetur Graecia luctu ?
 133 Saltem, fata virum si jam suprema ferebant,
 134 jussus ad ignotos potius foret ire tyrannos
 135 o utinam ut tandem non hac moreretur in urbe !
 136 Namque et sidereo nostri de sanguine Phruxi
 137 dicitur et caram vidi indoluisse sororem,
 138 seque ait has jussis actum miser ire per undas.
 139 At redeat quocumque modo meque ista precari

140 nesciat atque meum non oderit ille parentem."
141 Dixerat haec stratoque graves projecerat artus,
142 si veniat miserata quies, cum saevior ipse
143 turbat agitque sopor ; supplex hinc sternitur hospes,
144 hinc pater. Illa nova rumpit formidine somnos
145 erigiturque toro ; famulas carosque penates
146 agnoscit, modo Thessalicas raptata per urbes,
147 turbidus ut Poenis caecisque pavoribus ensem
148 corripit et saevae ferit agmina matris Orestes ;
149 ipsum angues, ipsum horrisoni quatit ira flagelli
150 atque iterum infestae se fervere caede Lacaenae
151 credit avens falsaque redit de strage dearum
152 fessus et in miserae collabitur ore sororis.
153 His ubi nequiquam nutantem Colchida curis
154 Juno videt necdum extremo parere furori,
155 non jam mentitae vultum vocemque resumit
156 Chalciopes. Quando ardor hebet leviorque pudore est
157 mensque obnixa malo, tenues sublimis in auras
158 tollitur et fulvo Venerem vestigat Olympo.
159 "Sum memor ut sis tum mecum partita laborem,
160 illa nimis sed dura manet conversaque in iram
161 et furias dolet ac me nunc decepta reliquit.
162 I precor atque istum quo me frustratur amorem
163 vince potes patriis ut tandem evadere tectis
164 audeat atque meum casu defendere ab omni
165 Aesoniden. Quin illa sacro, quo freta veneno,
166 ipsum etiam totis adstantem noctibus anguem,
167 qui nemus omne suum quique aurea (respice porro)
168 vellera tot spiris circum, tot ductibus implet,
169 fallat et in somnos ingenti solvat ab orno.
170 Haec tibi nunc, Furiis atque ipsi cetera mando."
171 Tum contra aligerum mater sic fatur Amorum :
172 "Nec tibi cum primos adgressa es flectere sensus
173 virginis ignotaque animum contingere cura
174 defuimus, data continuo quin cingula soli
175 nostra tibi, quis mota loco labefactaque cessit.
176 Haud satis id, sed me ipsa opus est : cunctantia poscunt
177 pectora me dubiusque pudor. Jam foedera faxo
178 Aesonii petat ipsa viri metuatque morari.
179 Tu fac Luciferae citus ad delubra Dianae
180 deveniat, sacras solita est ubi fundere taedas
181 Colchis et aequali dominam lustrare caterva.
182 Nec te nunc Hecates subeat metus, aut mea forte
183 impediatur ne coepta time. Quin audeat opto :
184 continuo transibit amor cantuque trilingui
185 ipsam flammiferos cogam compescere tauros..."
186 ...amplexumque petit. Volucrem tunc aspicit Irin
187 festinamque jubet monitis parere Diones
188 et juvenem Aesonium praedicto sistere luco.
189 Protinus hinc Iris Minyas, Cytherea petivit
190 Colchida, Caucaseis speculatrix Juno resedit
191 rupibus attonitos Aeaea in moenia vultus
192 speque metuque tenens et adhuc ignara futuri.
193 Vix primas occulta Venus prospexerat arces,
194 virginis ecce novus mentem perstringere languor
195 incipit, ingeminant commotis questibus aestus.
196 Ergo iterum sensus varios super hospite volvens
197 maeret et absenti nequiquam talia fatur :

198 "Si tibi Thessalicis, nunc si tua forte venenis
 199 mater et, heu siqua est, posset succurrere conjunx !
 200 Quidne tuos virgo possum nisi flere labores ?
 201 Hoc satis ipse etiam possis spectare supremos
 202 atque iterum durae cogar comes ire sorori.
 203 Et nunc ille sua non quemquam sorte moveri,
 204 non ullum ingemuisse putat cumque omnibus odit
 205 me quoque. Siquando fuerit tamen ulla potestas,
 206 illum ego qui diris cinis ultimus haeserit arvis
 207 ossaque quis tauri saevusque pepercerit ignis
 208 componam sedemque dabo. Fas tunc mihi manes
 209 dilexisse viri tumuloque has reddere curas."
 210 Dixerat. Ecce toro Venus improvisa resedit,
 211 sicut erat, mutata deam mentitaque pictis
 212 vestibus et magica Circen Titanida virga.
 213 Illa, velut lenti fallatur imagine somni,
 214 sic oculos incerta tenet magnique sororem
 215 paulatim putat esse patris. Tum flebile gaudens
 216 prosiluit saevaeque ultro tulit oscula divae
 217 ac prior : "O tandem, vix tandem reddita Circe,
 218 dura, tuis, quae te bijugis serpentibus egit
 219 hinc fuga quaeve fuit patriis mora gratior oris ?
 220 Ante et Thessalicae Phasin petiere carinae
 221 perque tot infelix frustra vada venit Iason,
 222 quam patriae te movit amor." Tum cetera rumpit
 223 occurritque Venus : "Tu nunc mihi causa viarum
 224 sola, tuae venio, jam pridem ignava, juventae.
 225 Cetera parce queri neu me, meliora secutam
 226 argue ; quippe (ut jam reputentur munera divum)
 227 omnibus hunc potius communem animantibus orbem,
 228 communes et crede deos. Patriam inde vocato
 229 qua redit itque dies ; nec nos, o nata, malignus
 230 cluserit hoc uno semper sub frigore mensis.
 231 Fas mihi non habiles, fas et tibi linqere Colchos.
 232 Et nunc Ausonii conjunx ego regia Pici
 233 nec mihi flammiferis horrent ibi pascua tauris,
 234 meque vides Tusci dominam maris. At tibi quinam
 235 Sauromatae, miseranda, proci ! Cui vadis Hiberor,
 236 ei mihi, vel saevo conjunx non una Gelono ! "
 237 Illa deae contra jamdudum spernere voces.
 238 "Non ita me immemorem magnae Perseidos", inquit,
 239 "cernis, ut infelix thalamos ego cogar in illos.
 240 I, precor, ac vanum pro me dimitte timorem.
 241 sed magis his miseram, quando potes, eripe curis
 242 unde metus aestusque mihi quaeque aspera, mater,
 243 perpetior dubiae jamdudum incendia mentis.
 244 Nulla quies animo, nullus sopor alligat artus.
 245 Quaere malis nostris requiem mentemque repone,
 246 redde diem noctemque mihi, da prendere vestes
 247 somniferas istaque oculos componere virga.
 248 Tu quoque nil, mater, prodes mihi ; fortior ante
 249 sola fui. Tristes thalamos infestaque cerno
 250 omnia, vipereos ipsi tibi surgere crines."
 251 Talia verba dabat collapsaque flebat iniquae
 252 in Veneris Medea sinus pestemque latentem
 253 ossibus atque imi monstrabat pectoris ignem.
 254 Occupat amplexu Venus et furialia figit
 255 oscula permixtumque odiis inspirat amorem,

256 dumque illam variis maerentem vocibus ambit
 257 inque alio sermone tenet, "Quin hoc", ait, "audi
 258 atque attolle genas" lacrimisque haec infit obortis :
 259 "Cum levis Hesperii ad te modo laberer oris,
 260 forte ratem primo fulgentem litore cerno
 261 qualem nostra suo nunquam dimittere portu
 262 vellet adhuc omnes quae detinet insula nautas.
 263 Unus ibi ante alios qui tum mihi pulchrior omnes
 264 visus erat (longeque ducem mirabar et ipsa)
 265 advolat atque unam comitum ratus esse tuarum
 266 "Per tibi siquis", ait, "morituri protinus horror
 267 et quem non meritis videas occurrere monstris,
 268 haec, precor, haec dominae referas ad virginis aurem.
 269 Tu fletus ostende meos ; illi has ego voces,
 270 qua datur, hasque manus, ut possum, a litore tendo.
 271 Ipsae quas mecum per mille pericula traxi
 272 defecere deae. Spes et via sola salutis
 273 quam dederit, si forte dabit. Ne vota repellat,
 274 ne mea, totque animas quales nec viderit ultra,
 275 dic, precor, auxilio juvet atque haec nomina servet.
 276 Si Pelopis duros prior Hippodamia labores
 277 expedit totque ora simul jugulata procorum
 278 respiciens tandem patrios exhorruit axes,
 279 si dedit ipsa neci fratrem Minoia virgo,
 280 cur non hospitibus fas sit succurrere dignis
 281 te quoque et Aeaeos jubeas mitescere campos ?
 282 Occidat alterna tandem Cadmeia morte
 283 jam seges et viso fumantes hospite tauri !"
 284 Ei mihi quod nullas hic possum exsolvere grates !
 285 Ac tamen hoc saeva corpus de morte receptum,
 286 hanc animam sciat esse suam ! Miserebitur ergo ?
 287 Dic", ait, "an potius..." strictumque ruebat in ensem.
 288 Promisi (ne falle, precor) cumque ipsa moverer
 289 adloquio casuque viri, te passa rogari
 290 sum potius : tu laude nova, tu supplice digno
 291 dignior es, sat fama meis jam parta venenis."
 292 Torserat illa gravi jamdudum lumina vultu,
 293 vix animos dextramque tenens quin ipsa loquentis
 294 iret in ora deae ; tanta pudor aestuat ira.
 295 Verba cavens ; horror molles invaserat annos.
 296 Jamque toro trepidas infelix obruit aures
 297 nec quo ferre fugam nec quo se vertere posset
 298 prensa videt. Rupta condi tellure premique
 299 jamdudum cupit ac diras evadere voces.
 300 Illa sequi jubet et portis exspectat in ipsis.
 301 Saevus Echionia ceu Penthea Bacchus in aula
 302 deserit innexis per roscida cornua vittis,
 303 cum tenet ille deum pudibundaque tegmina matris
 304 tympanaque et mollem subito miser accipit hastam,
 305 haud aliter deserta pavet perque omnia circum
 306 fert oculos tectisque negat procedere virgo.
 307 Contra saevus amor, contra periturus Iason
 308 urget et auditae crescunt in pectore voces.
 309 Heu quid agat ? Videt externo se prodere patrem
 310 dura viro, famam scelerum jamque ipsa suorum
 311 prospicit et questu superos questuque fatigat
 312 Tartara. Pulsat humum manibusque immurmurat uncis
 313 noctis eram Ditemque ciens, succurrere tandem

314 morte velint ipsumque simul demittere leto
315 quem propter furit. Absentem in saevissima poscit
316 nunc Pelian, tanta juvenem qui perderet ira,
317 saepe suas misero promittere destinat artes,
318 dein negat atque una potius decernit obire
319 ac neque tam turpi cessuram semet amori
320 proclamat neque opem ignoto viresque daturam
321 atque toro projecta manet, cum visa vocari
322 rursus et impulso sonuerunt cardine postes.
323 Ergo ubi nescio quo penitus se numine vinci
324 sentit et abscisum quicquid pudor ante monebat
325 tum thalami penetrare petit quae maxima norat
326 auxilia Haemoniae quaerens pro rege carinae.
327 Utque procul magicis spirantia tecta venenis
328 et saevae patuere fores oblataque contra
329 omnia quae ponto, quae manibus eruit imis
330 et quae sanguineo lunae destrinxit ab ore
331 "Tunc sequeris", ait, "quidquam aut patiēre pudendum
332 cum tibi tot mortes scelerisque brevissima tanti
333 effugia ? " Haec dicens qua non velocior ulla
334 pestis erat torto nequiquam lumine lustrat,
335 cunctaturque super morituraque colligit iras.
336 O nimium jucunda dies, quam cara sub ipsa
337 morte magis ! Stetit et sese mirata furentem est.
338 "Occidis heu primo (potes hoc durare ?) sub aevo,
339 nec tu lucis", ait, "nec videris ulla juventae
340 gaudia, non dulces fratris pubescere malas ?
341 Hunc quoque, quicumque est, crudelis, Iasona nescis
342 morte perire tua, qui te nunc invocat unam,
343 qui rogat heu nostro quam primam in litore vidit ?
344 Cur tibi fallaces placuit conjungere dextras
345 tunc, pater, atque istis juvenem non perdere monstris
346 protinus ? Ipsa etiam, fateor, tunc ipsa volebam.
347 Testor, cara, tuas, Circe Titania, voces :
348 te ducente sequor, tua me, grandaeva, fatigant
349 consilia et monitis cedo minor." Haec ubi fata,
350 rursus ad Haemonii juvenis curamque metumque
351 vertitur, hunc solum propter seu vivere gaudens
352 sive mori, quodcumque velit. Majora precatur
353 carmina, majores Hecaten immittere vires
354 nunc sibi, nec notis stabat contenta venenis.
355 Cingitur inde sinus et, qua sibi fida magis vis
356 nulla, Prometheae florem de sanguine fibrae
357 Caucaseum promit nutritaque gramina poenis,
358 quae sacer ille nives inter tristesque pruinas
359 edit alitque cruor cum viscere vultur adeso
360 tollitur e scopulis et rostro irrorat aperto.
361 Idem nec longi languescit finibus aevi
362 immortale virens, idem stat fulmina contra
363 salvus et in mediis florescunt ignibus herbae.
364 Prima Hecate Stygiis duratam fontibus harpen
365 intulit et validas scopulis effodit aristas ;
366 mox famulae monstrata seges, quae lampade Phoebes
367 sub decima juga feta metit saevitque per omnes
368 reliquias saniemque dei. Gemit irritus ille
369 Colchidos ora tuens ; totos tunc contrahit artus
370 mente dolens cunctaeque tremunt sub falce catenaē.
371 Talibus infelix contra sua regna venenis

372 instruitur noctique tremens infertur opacae.
373 Dat dextram blandisque fovens mulcet Venus illam
374 adloquiis junctoque trahit per moenia passu.
375 Qualis adhuc teneros ubi primum callida fetus
376 mater ab excelso produxit in aera nido
377 hortaturque sequi brevibusque insurgere pinnis
378 (illos caerulei primum ferit horror Olympi
379 jamque redire rogant adsuetaque quaeritur arbor),
380 haud aliter caecae per moenia deficit urbis
381 incedens horretque domos Medea silentes.
382 Hic iterum extremae nequiquam in limine portae
383 substitit atque iterum fletus animique soluti
384 respexitque deam paulumque his vocibus haesit :
385 "Ipse rogat certe meque ipse implorat Iason ?
386 Nullane culpa subest, labes non ulla pudoris,
387 nullus amor, nec turpe viro servire precanti ? "
388 Illa nihil contra vocesque abruptis inanes,
389 et jamjam magico per opaca silentia Colchis
390 coeperat ire sono, montanaque condere vultus
391 numina cumque suis averti fontibus amnes.
392 Jam stabulis gregibusque pavor strepitusque sepulchris
393 inciderat, stupet ipsa gravi nox tardior umbra.
394 Jamque tremens longe sequitur Venus. Utque sub altas
395 pervenere trabes divaeque triformis in umbram
396 hic subito ante oculos nondum speratus Iason
397 emicuit viditque prior conterrita virgo.
398 Atque hinc se profugam volucris Thaumantias ala
399 sustulit, inde Venus dextrae dilapsa tenenti.
400 Obvius ut sera cum se sub nocte magistris
401 impingit pecorique pavor qualesve profundum
402 per chaos occurrunt caecae sine vocibus umbrae,
403 haud secus in mediis noctis nemorisque tenebris
404 inciderant ambo attoniti juxtaque subibant,
405 abietibus tacitis aut immotis cyparissis
406 adsimiles, rapidus nondum quas miscuit Auster.
407 Ergo ut erat vultu defixus uterque silenti
408 noxque suum peragebat iter. Jamjam ora levare
409 Aesoniden farique cupit Medea priorem.
410 Quam simul effusis pavitantem fletibus heros
411 flagrantisque genas vidit miserumque pudorem,
412 has tandem voces dedit et solatus amantem est :
413 "Fersne aliquam spem lucis ? " ait "Miserata laborem
414 nempe venis ? An et ipsa mea laetabere morte ?
415 Ne, precor, infando similem te, virgo, parenti
416 gesseris. Haud tales decet inclementia vultus.
417 Hascine nunc grates, haec expectata laborum
418 dona dari decuit ? Sic te sub teste remitti
419 fas me, virgo, tuum ? Justas da vocibus aures.
420 Dic, pater ille tuus tantis me opponere monstris
421 quid meritum aut tales volvit cur pendere poenas ?
422 An jacet externa quod nunc mihi cuspide Canthus
423 quodque meus vestris cecidit pro moenibus Iphis
424 aut Scythiae tanta inde manus ? Jussisset abire
425 perfidus atque suis extemplo cedere regnis !
426 Spem mihi promissam per quae discrimina rursus
427 et reddat qua lege vides. Occurrere tandem
428 poscimus, idque sedet quam non quaecumque subire
429 patris jussa tui. Nunquam sine vellere abibo

430 hinc ego, degenerem nec tu me prima videbis."
431 Haec ait. Illa tremens, ut supplicis aspicit ora
432 conticuisse viri jamque et sua verba reposci,
433 nec quibus incipiat demens videt ordine nec quo
434 quave tenus, prima cupiens effundere voce
435 omnia (sed nec prima pudor dat verba timenti).
436 Haeret et attollens vix tandem lumina fatur :
437 "Quid, precor, in nostras venisti, Thessale, terras ?
438 Unde mei spes ulla tibi, tantosque petisti
439 cur non ipse tua fretus virtute labores ?
440 Nempe ego si patriis timuissem excedere tectis,
441 occideras, nempe hanc animam cras saeva manebant
442 funera. Juno ubi nunc, ubi nunc Tritonia virgo ?
443 Sola tibi quod jam tantis in casibus adsum
444 externae regina domus, miraris et ipse,
445 credo, nec agnoscunt hae nunc Aetida silvae.
446 Sed fatis sum victa tuis : cape munera supplex
447 nunc mea, teque iterum Pelias si perdere quaeret
448 inque alios casus, alias si mittet ad urbes
449 (heu formae ne crede tuae !)" Titania jamque
450 gramina Persaeasque sinu depromere vires
451 coeperat hisque iterum compellat Iasona dictis :
452 "Si tamen aut superis aliquam spem ponis in ipsis
453 aut tua praesenti virtus [te] educere leto
454 si te forte potest, etiam nunc deprecor, hospes,
455 me sine et insontem misero dimitte parenti."
456 Dixerat. Extemplo (neque enim immatura ruebant
457 sidera et extremum se flexerat axe Bootes)
458 cum gemitu et multo juveni medicamina fletu
459 non secus ac patriam pariter famamque decusque
460 obicit. Ille manu subit et vim corripit omnem.
461 Inde ubi facta nocens et non revocabilis unquam
462 cessit ab ore pudor propiorque implevit Erinys,
463 carmina tunc totos volvit figitque per artus
464 Aesonidae et totum septeno murmure fertur
465 per clipeum atque viro graviolem reddidit hastam ;
466 jamque sui tauris languent absentibus ignes.
467 "Nunc age et has" inquit "cristas galeamque resume
468 quam modo funerea tenuit Discordia dextra.
469 Hanc jace per medias, cum verteris aequora, messes :
470 protinus in sese conversa furoribus ibit
471 cuncta phalanx, atque ipse fremens mirabitur et me
472 respiciet fortasse pater." Sic deinde locuta
473 jam magis atque magis mentem super alta ferebat
474 aequora, pandentes Minyas jam vela videbat
475 se sine. Tum vero extremo percussa dolore
476 arripit Aesoniden dextra ac summissa profatur :
477 "Sis memor, oro, mei, contra memor ipsa manebo,
478 crede, tui. Quantum hinc aberis, dic quaeso, profundi ?
479 Quod caeli spectabo latus ? Sed te quoque tangat
480 cura mei quocumque loco, quoscumque per annos,
481 atque hunc te meminisse velis et nostra fateri
482 munera, servatum pudeat nec virginis arte.
483 Ei mihi, cur nulli tingunt tua lumina fletus ?
484 An me mox merita morituram patris ab ira
485 dissimulas ? Te regna tuae felicia gentis,
486 te conjunx nati que manent ; ego prodita obibo,
487 nec queror et pro te lucem quoque laeta relinquam."

488 Protinus hospes ad haec (tacitis nam cantibus illum
 489 flexerat et simili jamdudum adflarat amore)
 490 "Tunc" ait "Aesoniden quicquam te velle relicta
 491 credis et ulla peti sine te loca ? Redde tyranno
 492 me potius, recipe ingratos atque exue cantus !
 493 Quis mihi lucis amor, patriam cur amplius optem
 494 si non et genitor te primam amplectitur Aeson
 495 teque tuo longe fulgentem vellere gaudens
 496 spectat et ad primos procurrit Graecia fluctus ?
 497 Respice ad has voces et jam, precor, adnue, conjunx :
 498 per te, quae superis divisque potentior imis,
 499 perque haec, virgo, tuo redeuntia sidera nutu
 500 atque per has nostri juro discriminis horas :
 501 unquam ego si meriti sim noctis et immemor hujus,
 502 si te sceptris, domum, si te liquisse parentes,
 503 senseris et me jam non haec promissa tuentem,
 504 tum me non tauros juvet evasisse ferosque
 505 terrigenas, tum me tectis tua turbet in ipsis
 506 flamma tuaeque artes. Nullus succurrere contra
 507 ingrato queat, et siquid tu saevius istis
 508 adicias meque in medio terrore relinquis."
 509 Audiit atque simul meritis perjuriam poenis
 510 despondet questus semper Furor ultus amantis.
 511 Haec ubi dicta, tamen perstant defixus uterque
 512 et nunc ora levant audaci laeta juventa,
 513 ora simul totiens dulces rapiunt visus,
 514 nunc deicit vultus aeger pudor et mora dictis
 515 redditur ac rursus conterret Iasona virgo :
 516 "Accipe perdomitis quae deinde pericula tauris
 517 et quis in Aeolio maneat te vellere custos.
 518 Nondum cuncta tibi, fateor, promissa peregi.
 519 Saevior ingenti Mavortis in arbore restat,
 520 crede, labor. Quem tanta utinam fiducia nostri
 521 sit mihi nocturnaeque Hecates nostrique vigoris !"
 522 Dixerat, utque virum doceat quae monstra supersint
 523 protinus immensis recubantem anfractibus anguem
 524 turbat et Haemonii subito ducis obicit umbram.
 525 Ille, quod haud alias, stetit et trepidantia torsit
 526 sibila seque metu postquam sua vellera circum
 527 sustulit atque omnis spiris exhorruit arbor,
 528 incipit inde sequi et vacuo furit ore per auras.
 529 "Quis fragor hic ? Quae nam tantae, dic, virgo, ruinae ? "
 530 exclamat stricto Aesonides stans frigidus ense.
 531 Illa trahit ridens tandemque ait angue represso :
 532 "Hunc tibi postremum nostri parat ira parentis,
 533 heu miser, heu tantis iterum occursure periculis.
 534 O utinam, heu nullo te sim visura labore
 535 ipsam caeruleis squalentem nexibus ornum
 536 ipsaque pervigilis calcare volumina monstri,
 537 contingat bis deinde mori !" Sic fata profugit
 538 seque sub extremis in moenia rettulit umbris.
 539 Et jam puniceo regem spes vana sub ortu
 540 extulerat : quantis nox una diremerit undis
 541 Aesoniden, liberne freto jam vultus aperto
 542 utque prius totum sileat mare. Dumque ea longe
 543 explorare parat contra venit Arcas Echion
 544 dicta ferens jam Circaeis Mavortis in agris
 545 stare virum, daret aeripedes in proelia tauros.

546 Rex "Vocor en ultro" dixit "spesque abstulit aula.
 547 Vos mihi nunc primum in flammis invertite, tauri,
 548 aequora, nunc totas aperite et volvite flammis.
 549 Exeat Haemonio messis memoranda colono !
 550 Tuque tuum in pestem Graium da, nata, draconem.
 551 Ipsius aspectu pereant in velleris, ipsa
 552 terga mihi diros servent infecta cruores."
 553 Fatur et effusis pandi jubet aequora tauris.
 554 Pars et Echionii subeunt immania dentis
 555 semina, pars diri portant grave robur aratri.
 556 At sua magnanimum contra Pagasaea juvenus
 557 prosequitur stipatque ducem ; tum maxima quisque
 558 dicta dedit saevisque procul discessit ab agris.
 559 Fixerat ille gradus totoque ex agmine solus
 560 stabat (ut extremis desertus in axibus urus,
 561 quem jam lassa dies Austriacae ardentis harenarum
 562 aut quem Rhipaeas exstantem rursus ad arces
 563 nix et caerulei Boreae ferus abstulit horror)
 564 cum subito attoniti longissima Phasidis unda
 565 Caesariacaeque trabes omnisque Aetia tellus
 566 fulsit et ardentes stabula effudere tenebras.
 567 Ac velut ex una siquando nube corusci
 568 ira Jovis torsit geminos mortalibus ignes
 569 aut duo cum pariter ruperunt vincula venti
 570 dantque fugam, sic tum claustris evasit uterque
 571 taurus et immani proflavit turbine flammis
 572 arduus atque atro volvens incendia fluctu.
 573 Horruit Argoae legio ratis ; horruit audax,
 574 qui modo virgineis servari cantibus, Idas,
 575 flebat, et invito prospexit Colchida vultu.
 576 Non tulit ipse moras seseque immisit Iason
 577 diversos postquam ire videt galeamque minantem
 578 quassat et errantem dextra ciet obvisus ignem.
 579 Ut tandem stetit et torvo se lumine flexit
 580 qui prior adversi respexit Jasonis arma,
 581 cunctatus paulum subito furit. Aequora non sic
 582 in scopulos irata ruunt eademque recedunt
 583 fracta retro. Bis fulmineis se flatibus infert
 584 obnubilitque virum, sed non incendia Colchis
 585 adspirare sinit clipeoque inluditur ignis
 586 frigidus et viso pallescit flamma veneno.
 587 Inicit Aesonides dextram atque ardentia mittit
 588 cornua, dein totis propendens viribus haeret.
 589 Ille virum ecce ipsam tunc te, Medea, recusans
 590 concutit et tota nitens certaminis ira
 591 portat iners. Tandem gravius mugire residens
 592 incipit et fesso victus descendere cornu.
 593 Respicit hinc socios immania vincula poscens
 594 Aesonides jamque ora premit trahiturque trahiturque
 595 obnixusque genu superat cogitque trementes
 596 sub juga aena toros. Alium dehinc turbida Colchis
 597 exarmat lentumque offert timideque minantem
 598 jamque propinquanti noctem implicat. Ille fatiscens
 599 in caput inque umeros ipsa vi molis et irae
 600 proruit. Invadit totusque incumbit Iason
 601 desuper atque suis defessum flatibus urget,
 602 utque dedit vinculis validoque adstrinxit aratro,
 603 suscitatur ipse genu saevaque agit insuper hasta,

604 non secus a medio quam cum telluris hiatu
 605 terga recentis equi primumque invasit habenis
 606 murmur et in summa Lapithes apparuit Ossa.
 607 Ille, velut campos Libyes ac pingua Nili
 608 fertilis arva secet, plena sic semina dextra
 609 spargere gaudet agris oneratque novalia bello.
 610 Martius hic primum ter vomere fusus ab ipso
 611 clangor et ex omni sonuerunt cornua sulco ;
 612 bellatrix tunc gleba quati pariterque creari
 613 armarique phalanx totisque insurgere campis.
 614 Cessit et ad socios paulum se rettulit heros
 615 opperiens ubi prima sibi daret agmina tellus.
 616 At vero, ut summis jam rura recedere cristis
 617 vidit et infesta vibrantes casside terras,
 618 advolat atque, imo tellus qua proxima collo
 619 necdum umeri videre diem, prior ense sequaci
 620 aequat humo truncos ; rutilum thoraca sequentum
 621 aut primas a matre manus metit obvius ante.
 622 Nec magis aut illis aut illis milibus ultra
 623 sufficit, ad dirae quam cum Tirynthius Hydrae
 624 agmina Palladios defessus respicit ignes.
 625 Ergo iterum ad socias convertere Colchidos artes
 626 et galeae nexus ac vincula dissipat imae,
 627 cunctaturque tamen totique occurrere bello
 628 ipse cupit. Spes nulla datur, sic undique densant
 629 terrigenae jam signa truces clamore tubaque.
 630 Jamque omnes adiere virum jamque omnia contra
 631 tela ibant. Tum vero, amens discrimine tanto,
 632 quam modo Tartareo galeam Medea veneno
 633 in medios torsit ; conversae protinus hastae.
 634 Qualis ubi attonitos maestae Phrygas annua Matris
 635 ira vel exsectos lacerat Bellona comatos,
 636 haud secus accensas subito Medea cohortes
 637 implicat et miseros agit in sua proelia fratres.
 638 Omnis ibi Aesoniden sterni putat, omnibus ira
 639 letifera est. Stupet Aeetes ultroque furentes
 640 ipse viros revocare cupit, sed juncta cacebant
 641 agmina nec quisquam primus ruit aut super ullus
 642 linquitur atque hausit subito sua pignora tellus.
 643 Protinus in fluvium fumantibus evolat armis
 644 Aesonides, qualis Getico de pulvere Mavors
 645 intrat equis hauritque gravis sudoribus Hebrum
 646 aut niger ex antris rutilique a fulminis aestu
 647 cum fugit et Siculo respirat in aequore Cyclops.
 648 Redditus hinc tandem sociosque amplexus ovantes
 649 haud jam mendacem promissa reposcere regem
 650 dignatur nec, si ipse sibi terga ingerat ultro
 651 quae pepigit, velit in pacem dextramque reverti
 652 amplius. Ambo truces, ambo abscessere minantes.

AR_8 v.1 At trepidam in thalamis et jam sua facta paventem
 2 Colchida circa omnes pariter furiaeque minaeque
 3 patris habent, nec caerulei timor aequoris ultra
 4 nec miserae terra ulla procul : quascumque per undas
 5 ferre fugam, quamcumque cupit jam scandere puppem.

6 Ultima virgineis tunc flens dedit oscula vittis
 7 quosque fugit complexa toros crinemque genasque
 8 ungue per antiqui carpsit vestigia somni
 9 atque haec impresso gemuit miseranda cubili :
 10 "O mihi si profugae, genitor, nunc ipse supremos
 11 amplexus, Aeeta, dares fletusque videres
 12 ecce meos ! Ne crede, pater : non carior ille est
 13 quem sequimur. Tumidis utinam simul obruar undis !
 14 Tu precor haec longa placidus mox sceptrum senecta
 15 tuta geras meliorque tibi sit cetera proles !"
 16 Dixit et Haemonio nunquam spernenda marito
 17 condita letiferis promittit medicamina cistis
 18 virgineosque sinus ipsumque monile venenis
 19 implicat ac saevum super omnibus addidit ensem.
 20 Inde velut torto Furiarum erecta flagello
 21 prosilit, attonito qualis pede prosilit Ino
 22 in freta nec parvi meminit conterrita nati
 23 quem tenet ; extremo conjunx fuit inritus Isthmo.
 24 Jam prior in lucos curis urgentibus heros
 25 venerat et nemoris sacra se nocte tegebat,
 26 tum quoque siderea clarus procul ora juventa.
 27 Qualis, adhuc sparsis comitum per lustra catervis,
 28 Latmius aestiva residet venator in umbra
 29 dignus amore deae, velatis cornibus et jam
 30 Luna venit, roseo talis per nubila ductor
 31 implet honore nemus talisque exspectat amantem.
 32 Ecce autem pavidae virgo de more columbae
 33 quae super ingenti circumdata praepetis umbra
 34 in quemcumque tremens hominem cadit ; haud secus illa
 35 acta timore gravi mediam se misit, at ille
 36 exceptit blandoque prior sic ore locutus :
 37 "O decus in nostros magnum ventura penates
 38 solaque tantarum virgo haud indigna viarum
 39 causa reperta mihi, jamjam non ulla requiro
 40 vellera teque meae satis est quaesisse carinae.
 41 Verum age et hoc etiam, quando potes, adice tantis
 42 muneribus meritisque tuis : namque aurea jussi
 43 terga referre sumus, socios ea gloria tangit."
 44 Sic ait et primis supplex dedit oscula palmis.
 45 Contra virgo novis iterum singultibus orsa est :
 46 "Linquo domos patrias te propter opesque meorum
 47 nec jam nunc regina loquor sceptrisque relictis
 48 vota sequor. Serva hanc profugae, prior ipse dedisti
 49 quam (scis nempe) fidem. Di nostris vocibus adsunt,
 50 sidera et haec te meque vident. Tecum aequora, tecum
 51 experiar quascumque vias, modo nequis abactam
 52 huc referat me forte dies oculisque parentis
 53 ingerar. Hoc superos, hoc te quoque deprecor, hospes."
 54 Haec ait atque furens rapido per devia passu
 55 tollitur. Ille haeret comes et miratur euntem,
 56 cum subitito ingentem media inter nubila flammam
 57 conspicit et saeva vibrantes luce tenebras.
 58 "Quis rubor iste poli ? Quod tam lugubre refulsit
 59 sidus ? " ait, reddit trepido cui talia virgo :
 60 "Ipsius en oculos et lumina torva draconis
 61 aspicis. Ille suis haec vibrat fulgura cristis,
 62 meque pavens non jam solam videt : haud vocat ultro,
 63 ceum solet, et blanda poscit me pabula lingua.

64 Dic age nunc utrum vigilantibus hostemque videnti
65 exuvias auferre velis, an lumina somno
66 mergimus et domitum potius tibi tradimus anguem ? "
67 Ille silet, tacitus subiit et virginis horror.
68 Jamque manus Colchis lumenque intenderat astris,
69 carmina barbarico fundens pede, teque ciebat,
70 Somne pater. "Somne omnipotens, te Colchis ab omni
71 orbe voco inque unum jubeo nunc ire draconem,
72 quae freta saepe tuo domui, quae nubila cornu
73 fulminaque et toto quicquid micat aethere, sed nunc,
74 nunc age major ades fratrique simillime Leto.
75 Te quoque, Phrixiae pecudis fidissime custos,
76 tempus ab hac oculos tandem deflectere cura.
77 Quem metuis me adstante dolum ? Servabo parumper
78 ipsa nemus ; longum interea tu pone laborem."
79 Ille haud Aeolio discedere fessus ab auro
80 nec dare permissae, quamvis juvet, ora quieti
81 sustinet, ac primi percussus nube soporis
82 horruit et dulces excussit ab arbore somnos.
83 Contra Tartareis Colchis spumare venenis
84 cunctaque Lethaei quassare silentia rami
85 perstat et adverso luctantia lumina cantu
86 obruit atque omnem linguaque manuque fatigat
87 vim Stygiam ardentem, donec sopor occupet iras.
88 Jamque altae cecidere jubae nutatque coactum
89 jam caput itque ingens extra sua vellera cervix,
90 ceu refluens Padus aut septem projectus in amnes
91 Nilus et Hesperium veniens Alpheos in orbem.
92 Ipsa caput cari postquam Medea draconis
93 vidit humi, fuis circum projecta lacertis
94 seque suumque simul flevit crudelis alumnum :
95 "Non ego te sera talem sub nocte videbam
96 sacra ferens epulasque tibi nec talis hianti
97 mella dabam ac nostris nutribam fida venenis.
98 Quam gravida nunc mole jaces, quam segnis inertem
99 flatus habet ! Nec te saltem, miserande, peremi.
100 Heu saevum passure diem ! Jam nulla videbis
101 vellera, nulla tua fulgentia dona sub umbra.
102 Cede adeo inque aliis senium nunc egere lucis
103 immemor, oro, mei, nec me tua sibila toto
104 exagitent infesta mari. Sed tu quoque cunctas,
105 Aesonide, dimitte moras atque effuge raptis
106 velleribus. Patrios exstingi noxia tauros,
107 terrigenas in fata dedi : fusum ecce draconis
108 corpus habes, jamque omne nefas, jam, spero, peregi."
109 Quaerenti tunc deinde viam, qua se arduus heros
110 ferret ad aurigerae caput arboris, "Heia, per ipsum
111 scande age et adverso gressus" ait "imprime dorso."
112 Nec mora fit : dictis fidens Cretheia proles
113 calcat et aeriam squamis perfertur ad ornum
114 cujus adhuc rutilam servabant brachia pellem,
115 nubibus accensis similem aut cum veste recincta
116 labitur ardenti Thaumantias obvia Phoebus.
117 Corripit optatum decus extremumque laborem
118 Aesonides longosque sibi gestata per annos
119 Phrixiae monumenta fugae vix reddidit arbor
120 cum gemitu, tristesque super coiere tenebrae.
121 Egressi relegunt campos et fluminis ora

122 summa petunt. Micat omnis ager villisque comantem
123 sidereis totos pellem nunc fundit in artus,
124 nunc in colla refert, nunc implicat ille sinistrae :
125 talis ab Inachiis Nemeae Tirynthius antris
126 ibat, adhuc aptans umeris capitique leonem.
127 Ut vero sociis, qui tunc praedicta tenebant
128 ostia, per longas apparuit aureus umbras,
129 clamor ab Haemonio surgit grege. Se quoque gaudens
130 promovet ad primas juveni ratis obvia ripas.
131 Praecipites agit ille gradus atque aurea misit
132 terga prius, mox attonita cum virgine puppem
133 insilit ac rapta victor consistit in hasta.
134 Interea patrias saevus venit horror ad aures
135 fata domus luctumque ferens fraudemque fugamque
136 virginis. Hinc subitis inflexit frater in armis,
137 urbs etiam mox tota coit, volat ipse senectae
138 immemor Aeetes, complentur litora bello
139 nequiquam : fugit immissis jam puppis habenis.
140 Mater adhuc ambas tendebat in aequora palmas
141 et soror atque omnes aliae matresque nurusque
142 Colchides aequalesque tibi, Medea, puellae.
143 Exstat sola parens impletque ululatibus auras :
144 "Siste fugam, medio refer huc ex aequore puppem,
145 nata (potes) ! Quo" clamat "abis ? Hic turba tuorum
146 omnis et iratus nondum pater, haec tua tellus
147 sceptraque : quid terris solam te credis Achaeis ?
148 Quis locus Inachias inter tibi, barbara, nuptas ?
149 Istane vota domus exspectatique hymenaei ?
150 Hunc petii grandaeva diem ? Vellem unguibus uncis,
151 ut volucris, possem praedonis in ipsius ora
152 ire ratemque supra claroque reposcere cantu
153 quam genui. Albano fuit haec promissa tyranno,
154 non tibi. Nil tecum miseri pepigere parentes,
155 Aesonide, non hoc Pelias evadere furto
156 te jubet aut ullas Colchis abducere natas :
157 vellus habe et, nostris siquid super, accipe, templis !
158 Sed quid ego quemquam immeritis incuso querellis ?
159 Ipsa fugit tantoque (nefas) ipsa ardet amore.
160 Hoc erat, infelix (redeunt nam singula menti),
161 ex quo Thessalici subierunt litora remi,
162 quod nullae te, nata, dapes, non ulla juvabant
163 pocula. Non ullus tibi tum color, aegraque membra
164 errantesque genae atque alieno gaudia vultu
165 semper erant. Cur tanta mihi non prodita pestis
166 Aut gener Aesonides nostra consideret aula
167 nec talem paterere fugam, commune fuisset
168 aut certe nunc omne nefas, iremus et ambae
169 in quascumque vias. Pariter petiisse juvaret
170 Thessaliam et saevi, quaecumque est, hospitis urbem."
171 Sic genetrix similique implet soror omnia questu
172 exululans, famulae pariter clamore supremo
173 in vacuos dant verba Notos dominamque reclamant
174 nomine ; te venti procul et tua fata ferebant.
175 Inde diem noctemque volant. Redeuntibus aura
176 gratior et notae Minyis transcurrere terrae,
177 cum subito Erginus puppi sic fatur ab alto :
178 "Vos" ait "Aesonide, contenti vellere capto
179 nec via quae superet nec quae fortuna videtis.

180 Crastina namque dies trucis ad confinia Ponti
181 Cyaneasque vocat, meminique, o Tiphy, tuorum
182 saxa per illa, pater, memini, venerande, laborum.
183 Mutandum, o socii, nobis iter : altera Ponti
184 eluctanda via et cursu quem fabor eundum est.
185 Haud procul hinc ingens Scythici ruit exitus Histri,
186 fundere non uno tantum quem flumina cornu
187 accipimus. Septem exit aquis, septem ostia pandit.
188 Illius adversi nunc ora petamus et undam
189 quae latus in laevum Ponti cadit. Inde sequemur
190 ipsius amnis iter donec nos flumine certo
191 perferat inque aliud reddat mare. Sint age tanti,
192 Aesonide, quaecumque morae, quam saeva subire
193 saxa iterum, quam Cyaneos perrumpere montes.
194 Sat mihi non totis Argo rediisse corymbis."
195 Haec ait ignarus fixas jam numine rupes
196 stare neque adversis ultra concurrere saxis.
197 Reddidit Aesonides : "Et te, fidissime rector,
198 haud vani tetigere metus nec me ire recuso
199 longius et cunctis redeuntem ostendere terris."
200 Protinus inde alios flectunt regesque locosque
201 adsuetumque petunt plaustris migrantibus aequor.
202 Puppe procul summa vigilis post terga magistri
203 haeserat auratae genibus Medea Minervae
204 atque ibi dejecta residens in lumina palla
205 flebat adhuc, quamquam Haemoniis cum regibus iret,
206 sola tamen nec conjugii secura futuri.
207 Illam Sarmatici miserantur litora ponti,
208 templa Thoanteae transit defleta Dianae,
209 nulla palus, nullus Scythiae non maeret euntem
210 amnis. Hyperboreas movit conspecta pruinas
211 tot modo regna tenens. Ipsi quoque murmura ponunt
212 jam Minyae, jam ferre volunt. Vix adlevat ora
213 ad seras siquando, dapes, quas carus Iason
214 ipse dabat, jam nubiferam transire Carambin
215 significans, jam regna Lyci, totiensque gementem
216 favit ad Haemonios hortatus surgere montes.
217 Insula Sarmaticae Peuce stat nomine nymphae,
218 torvus ubi et ripa semper metuendus utraque
219 in freta per saevos Hister descendit alumnos.
220 Solvere in hoc tandem resides dux litore curas
221 ac primum socios ausus sua pacta docere
222 promissamque fidem thalami foedusque jugale.
223 Ultro omnes laeti instigant meritamque fatentur.
224 Ipse autem invitae jam Pallados erigit aras,
225 incipit Idaliae numen nec spernere divae
226 praecipueque sui, siquando, in tempore pulcher
227 conjugii Minyas nunquam magis eminet inter,
228 qualis sanguineo victor Gradivus ab Hebro
229 Idalium furto subit aut dilecta Cythera,
230 seu cum caelestes Alcidae invisere mensas
231 jam vacat et fessum Junonia sustinet Hebe.
232 Adnuit unanimis Venus hortatorque Cupido
233 suscitatur adfixam maestis Aetida curis ;
234 ipsa suas illi croceo subtegmine vestes
235 induit, ipsa suam duplicem Cytherea coronam
236 donat et arsuras alia cum virgine gemmas.
237 Tum novus implevit vultus honor ac sua flavis

238 reddita cura comis, graditurque oblita malorum.
 239 Sic, ubi Mygdonios planctus sacer abluit Almo
 240 laetaque jam Cybele festaeque per oppida taedae,
 241 quis modo tam saevos adytis fluxisse cruores
 242 cogitet ? Haut ipsi quin jam meminere ministri.
 243 Inde ubi sacrificas cum conjuge venit ad aras
 244 Aesonides unaque adeunt pariterque precari
 245 incipiunt, ignem Pollux undamque jugalem
 246 praetulit et dextrum pariter vertuntur in orbem.
 247 Sed neque se pingues tum candida flamma per auras
 248 explicuit nec tura videt concordia Mopsus
 249 promissam nec stare fidem, breve tempus amorum.
 250 Odit utrumque simul, simul et miseratur utrumque
 251 et tibi tum nullos optavit, barbara, natos.
 252 Mox epulas et sacra parant ; silvestria laetis
 253 praemia venatu facili quaesita supersunt.
 254 Pars veribus, pars undanti despumat aeno.
 255 Gramineis ast inde toris discumbitur, olim
 256 Hister anhelantem Peucen quo presserat antro.
 257 Ipsi inter medios rosea radiante juventa
 258 altius inque sui sternuntur velleris auro.
 259 Quis novus inceptos timor impediit hymenaeos
 260 turbavitque toros et sacra calentia rupit ?
 261 Absyrtus subita praeceps cum classe parentis
 262 advehitur profugis infestam lampada Grais
 263 concutiens diramque premens clamore sororem
 264 "atque hanc, o siquis vobis dolor iraque, Colchi,
 265 accelerate viam, neque enim fugit aequore raptor
 266 Juppiter aut falsi sequimur vestigia tauri.
 267 Puppe (nefas !) una praedo Phrixea reportat
 268 vellera, qua libuit remeat cum virgine ; nobis
 269 (o pudor !) et muros et stantia tecta reliquit.
 270 Quid mihi deinde satis ? Nec quaero vellera nec te
 271 accipio, germana, datam nec foederis ulla
 272 spes, erit aut irae quisquam modus. Unde reverti
 273 patris ad ora mei tam parvo in tempore fas sit ?
 274 Quinquaginta animae me scilicet unaque mersa
 275 sufficiet placare ratis ? Te, Graecia fallax,
 276 persequor atque tuis hunc quasso moenibus ignem ;
 277 nec tibi digna, soror, desum ad conubia frater,
 278 primus et ecce fero quatioque hanc lampada vestro
 279 conjugio, primus celebros dotalia sacra,
 280 qui potui : patriae veniam da, quaeso, senectae.
 281 Quin omnes alii pariter populique patresque
 282 mecum adsunt. Magni virgo ne regia Solis
 283 Haemonii thalamos adeas despecta mariti,
 284 tot decuit coiisse rates, tot fulgere taedas."
 285 Dixerat atque orans iterum ventosque virosque
 286 perque ratis supplex et remigis [lacune]
 287 Illi autem intorquent truncis frondentibus undam,
 288 quaeque die fuerat raptim formata sub uno,
 289 et tantum dejecta suis a montibus arbor
 290 (quid dolor et veterum potuit non ira virorum ?)
 291 haud longis jam distat aquis, sequiturque volentem
 292 barbara Palladium puppem ratis, ostia donec
 293 Danuvii viridemque vident ante ostia Peucen
 294 ultimaque agnoscunt Argoi cornua mali.
 295 Tum vero clamorem omnes inimicaque tollunt

296 gaudia, tum gravior remis fragor, ut procul Argo
 297 visa viris, unamque petunt rostra omnia puppem.
 298 Princeps navalem nodosi roboris uncum
 299 arripit et longa Styros prospectat ab unda,
 300 conjugio atque iterum sponsae flammatus amore.
 301 Jamque alii clipeos et tela trabalia dextris
 302 expediunt, armant alii picis unguine flammis.
 303 Impatiens tremit hasta morae nec longius inter,
 304 quam quod tela vetet, superest mare. Vocibus urgent
 305 interea et pedibus pulsant tabulata frementes.
 306 Cum subitas videre rates vibrataque flammis
 307 aequora, non una Minyae formidine surgunt,
 308 primus et in puppem deserta virgine ductor
 309 prosilit et summa galeam rapit altus ab hasta,
 310 ense simul clipeoque micat, nec cetera pubes
 311 segnius arreptis in litore constitit armis.
 312 At tibi quae scelerum facies, Medea, tuorum
 313 quisve pudor Colchos iterum fratremque videnti,
 314 quicquid et abscisum vasto jam tuta profundo
 315 credideras ! Ergo infausto sese occulit antro
 316 non aliud quam certa mori seu carus Iason
 317 seu frater Graia victus cecidisset ab hasta.
 318 Haud ita sed summo segnis sedet aethere Juno
 319 aut sinit extrema Minyas decernere pugna
 320 nec numero quoniam Colchis nec puppibus aequos.
 321 Ergo ubi diva rates hostemque accedere cernit,
 322 ipsa subit terras tempestatumque refringit
 323 ventorumque domos. Volucrum gens turbida fratrum
 324 erumpit, classem dextra Saturnia monstrat.
 325 Videre inque unum pariter mare protinus omnes
 326 infesto clamore ruunt inimicaque Colchis
 327 aequora et adversos statuunt a litore fluctus.
 328 Tollitur atque infra Minyas Argoaque vela
 329 Styros habet ; vasto rursus desidit hiatu
 330 abrupta revolutus aqua. Jamque omnis in astra
 331 itque reditque ratis, lapsoque reciproca fluctu
 332 descendit. Vorat hos vertex, hos agmine toto
 333 gurges agit. Simul ob vultus micat undique terror,
 334 crebra ruina poli caelestia limina laxat.
 335 Non tamen ardentis Styri violentia cedit ;
 336 hortatur socios media inter proelia divum :
 337 "Transferet ergo meas in quae volet oppida dotes
 338 Colchis et Haemonius nobis succedet adulter,
 339 nec mihi tot magnos inter regesque procosque
 340 profuerit prona haud dubii sententia patris ?
 341 An virtus praelata viri est et fortior ille
 342 quem sequitur ? Jungam igniferos sine carmine tauros
 343 saevaque Echionii ferro sata persequar hydri.
 344 Hoc adeo interea specta de litore pugnas
 345 amborum : victoris eris. Jam digna videbis
 346 proelia jamque illud carum caput ire cruenta
 347 sub freta, semiviri nec murra corpus Achivi
 348 sed pice, sed flammis et olentes sulphure crines.
 349 Vos modo vel solum hoc, fluctus, expellite corpus :
 350 non te, Aeeta pater, generi aut, Sol magne, pudebit.
 351 Fallor, an hos nobis magico nunc carmine ventos
 352 ipsa movet diraque levat maria ardua lingua
 353 atque iterum Aesonides, iterum defenditur arte

354 qua solet ? Haud illi cantus et futile murmur
355 proderit. Ite, rates, et frangite virginis undam !"
356 Dixit et intortis socio cum milite remis
357 prosilit. At fluctu puppis labefacta reverso
358 solvitur effunditque viros ipsumque minantem
359 tum quoque et elata quaerentem litora dextra.
360 Ibat et arma ferens et strictum naufragus ensem,
361 incipit et remos et quaerere transtra solutae
362 sparsa ratis maestasque aliis intendere voces
363 puppibus. Ast inter tantos succurrere fluctus
364 nulla potest aut ille velit, quotiensque propinquat,
365 tunc aliud rursus dirimit mare. Jam tamen extat
366 jamque abiit fundoque iterum violentus ab imo
367 erigitur, sed fluctus adest magnoque sub altis
368 turbine mergit aquis et tandem virgine cessit.
369 Absyrtus visu maeret defixus acerbo :
370 Heu quid agat ? Qua vi portus et prima capessat
371 ostia ? Qua possit Minyas invadere clausos,
372 quos videt agnoscitque fremens ? Maria obvia contra,
373 saevaque pugnat hiems totusque in vertice pontus.
374 Abscessit tandem vanaque resedit ab ira
375 et tanta de clade rates. Latus inde sinistrum
376 adversamque procul Peuces defertur in oram
377 cum sociis. Gemino nam scinditur insula flexu
378 Danuvii : hac dudum Minyae Pagasaeaque puppis
379 in statione manent, illinc Aetius heros
380 obsidet adversa tentoria Thessala classe
381 impatiens pugnaeque datur non ulla potestas.
382 Noctes atque dies vastis mare fluctibus inter
383 perfurit, expediant donec Junonia sese
384 consilia atque aliquem bello ferat anxia finem.
385 At Minyae tanti reputantes ultima belli
386 urgent et precibus cuncti fremituque fatigant
387 Aesoniden : quid se externa pro virgine clausos
388 obiciat quidve illa pati discrimina cogat ?
389 Respiceret pluresque animas majoraque fata
390 tot comitum, qui non furiis nec amore nefando
391 per freta, sed sola sese virtute sequantur.
392 An vero ut thalamis raptisque indulgeat unus
393 conjugii (id tempus enim) ? Sat vellera Graeis,
394 et posse oblata componere virgine bellum.
395 Quemque suas sinat ire domos nec Marte cruento
396 Europam atque Asiam prima haec committat Erinys.
397 Namque datum hoc fati trepidus supplexque canebat
398 Mopsus, ut in seros irent magis ista nepotes
399 atque alius lueret tam dira incendia raptor.
400 Ille trahens gemitum tantis ac vocibus impar,
401 quamquam jura deum et sacri sibi conscia pacti
402 religio dulcisque movent primordia taedae,
403 cunctatur mortemque cupit sociamque pericli
404 cogitat. Haud ultra sociis obsistere pergit.
405 Haec ubi fixa viris, tempus fluctusque quietos
406 exspectant. Ipsam interea quid restet amantem
407 ignorare sinunt decretaque tristia servant.
408 Sed miser ut vanos, veros ita saepe timores
409 versat amor fallique sinit nec virginis annos
410 ac prior ipsa dolos et quamlibet intima sensit
411 non fidi jam signa viri nimiumque silentes

412 una omnes. Haud illa sui tamen immemor unquam
413 nec subitis turbata minis, prior occupat unum
414 Aesoniden longequae trahit, mox talibus infit :
415 "Me quoque, quid tecum Minyae, fortissima pubes,
416 nocte dieque novent, liceat cognoscere tandem,
417 si modo Peliacae non sum captiva carinae
418 nec dominos decepta sequor consultaque vestra
419 fas audire mihi. Vereor, fidissime conjunx,
420 nil equidem ; miserere tamen promissaque serva
421 usque ad Thessalicos saltem conubia portus
422 inque tua me sperne domo. Scis te mihi certe,
423 non socios jurasse tuos. Hi reddere forsan
424 fas habeant, tibi non eadem permissa potestas
425 teque simul mecum ipsa traham : non sola reposcor
426 virgo nocens atque hac pariter rate fugimus omnes.
427 At fratris te bella mei patriaeque biremes
428 terrificant magnoque impar urgeris ab hoste :
429 Finge rates alias et adhuc majora coire
430 agmina : nulla fides, nullis ego digna periclis ?
431 Non merui Martemque tuum comitumque tuorum ?
432 Vellem equidem nostri tetigissent litora patris
433 te sine duxque illis alius quicumque fuisset.
434 Nunc remeant meque ecce (nefas) te reddere possunt
435 nec spes ulla super. Quin tu mea respice saltem
436 consilia et nimio comitum ne cede timori.
437 Credidit ardentis quis te tunc jungere tauros
438 posse, quis ad saevi venturum templa draconis ?
439 O utinam ergo meus pro te non omnia posset
440 atque aliquid dubitaret amor ! Quin nunc quoque quaero
441 nescioquid tuus iste pudor. Mene, optime, quondam
442 Aesonide, me ferre preces et supplicis ora
443 fas erat ? Haud hoc nunc genitor putat aut dare poenas
444 jam sceleris dominumque pati." Sic fata, parantem
445 reddere dicta virum furiata mente refugit
446 vociferans. Qualem Ogygias cum tollit in arces
447 Bacchus et Aoniis illidit Thyiada truncis,
448 talis erat talemque jugis se virgo ferebat
449 cuncta pavens fugit infestos vibrantibus hastis
450 terrigenas, fugit ardentis exterrita tauros
451 si Pagasas vel Peliacas hinc denique nubes
452 cerneret et tenui Tempe lucentia fumo,
453 hoc visu contenta mori. Tunc tota querellis
454 egeritur questuque dies, eademque sub astris
455 sola movet, maestis veluti nox illa sonaret
456 plena lupis quaterentque truces jejuna leones
457 ora vel orbatae traherent suspiria vaccae.
458 Procredit. Non gentis honos, non gloria magni
459 Solis avi, non barbaricae decor ille juventae,
460 quid jubeas. Heu dure siles, magnumque minatur
461 qualis erat cum Chaonio radiantia trunco
462 vellera vexit ovans interque ingentia Graium
463 nomina Palladia virgo stetit altera prora.
464 Haeret et hinc praesens pudor, hinc decreta suorum
465 dura premunt. Utcumque tamen mulcere gementem
466 temptat et ipse gemens et dictis temperat iras :
467 "Mene aliquid meruisse putas, me talia velle ? "